


# एक्सिडेन्ट



आदाराण बसुमतारी

RASHON

# एक्सिडेन्ट (Accident)

( खौरां गासे फावथाइनि जथाइ )

ड. आदाराम बसुमतारी

मोननायनि खुलि :

अनशुमै लाइब्रेरी

आर.एन.बि. र'ड

क 'कराझार :: बि.टि.ए.डि. ( आसाम )।

*ACCIDENT - Collection of one-act plays in Bodo  
written by Dr. Adaram Basumatary published by  
Onsumoi Library, Kokrajhar*

---

सेथि दिहुन्नाय 3 नभेम्बर, 2012

**ISBN-978-81-925087-0-2**

© लिरगिरि-  
बिखं महर: रसन

बेसेन -60.00

साफाइसालि : अनशुमै प्रिन्टार्स एण्ड पाब्लिसार्स  
आर. एन. बि. र'ड, क'कराझार।

## ॥ फावथाइगिरिनि रायफोरनाय ॥

बे बिजाबा आंनि दाइन्धि, फावथाइ हिसाबै त्रैथि बिजाब। बे बिजाबा खौरां गासे फावथाइनि जथाय। बेवहाय गासै दोंबा फावथाइ दड। बेवहाय थानाय दोंबानि दोंब्रैयाव आथिखालाव सोलिफुबाय थानाय माखासे जाथायफोरखौ लानानै लिस्त्रनाय जादों। 'एक्सिदेन्ट' आव जाब्रथायनि गेजेरजों फैनाय जेंना, 'बोर ना साव' आव गोदान मुगानि दिहुन्नाय-मबाइल, बिलाति जौ आरो मटर साइकेलनि बाहायनायजों फैनाय बिजाउन, 'मोदोमफ्रु रेस्टुरेन्टाव सोदोमस्रिनि खबाम' आव संस्कार मोनै आरो हारिमु गैयै नखरनि हालसाल, आरो 'रुगुं गोबोरनाय संसार' फावथायावबो नखर आरो गथ गथायफोरखौ एंगारनाय इनाय राहायै रां खामायनायनि बिजाउनखौ दिन्थिनो नाजानाय जादों। बाथि फावथाइ 'गोमोर रोडै अर्गे' आव हाथियारजों हारि बोखांग्राफोरनि गोहोमाव सोमजिनाय गंसे हावरिया नखरनि दुखु गोनां थासारिखौ दिन्थिनो नाजानाय जादोंमोन; लोगोसे निखावा नखरफोरा बेमारि फाहामनायाव सुजुनाय जेंनाखौ दिन्थिनो नाजानाय जादों। बेनिनो 'मोदोमफ्रु रेस्टुरेन्टाव सोदोमस्रिनि खबाम' खौ 2010 इं माइथायनि 5 डिसेम्बराव बडाइगाव फरायसालिमायाव सोदोमस्रिनि बोर ना साव' खौ M<sup>3</sup> मुंजों 2011 इं माइथायनि 6 इं नभेम्बरखालि सालबारि फरायसालिमायाव दिन्थिनाय जादों आरो 'एक्सिदेन्ट' खौ 14 (2012) जुलाइखालि कक्राझाराव लोरगि थियेटार हान्जानि बर' फावथायनि फोबोखालि बिजनीनिफ्राय दिन्थिनाय जादोंमोन।

फावथाइ हिसाबै जाफुनाय जाफुडैखौ फावथाइ बिजिरगिरि, नायगिरि आरो फरायगिरि बिथांमोनि खाथियाव नागारनाय होनाय जाबाय। बिजाब महरै साफाइनानै होनायनि थाखाय अनसुमै लाइब्रेरीनि बिगोमा उज्जल भौमिक आरो प्रेचनि मेनेंजार आशिस साहा बिथांमोन्नो साबायखर बावनाय जाबाय। बिखं महर आखिनानै हरनायनि थाखाय रसन फंबायन्नेबो अन्नाय जासिनाय जाबाय।

गोजोन्थों-

नोंथांमोनि

ड० आदाराम बसुमतारी

प्रफेसार कलनी,

कदमतला. कक्राझार।

## नाइखां बिलाइ

	फावथाइनि मुं	बिलाइ
1.	एक्सिदेन्ट	1
2.	सोदोमसिनि बोर ना साव	15
3.	गोमोर रोडै अरगें	28
4.	मोदोमफु रेस्टुरेन्टाव सोदोमसिनि खबाम	51
5.	रुगुं गोबोरलांनाय संसार	66

एक्सिडेन्ट

## : आखुफोर :

1. दाम'दर: 55-60 बोसोरनि ।
2. बिबारी : 45-50 बोसोरनि दाम'दरनि बिसि ।
3. बिबेक: 25-28 बोसोरनि दाम'दरनि फिसाज्ला सासे सरकारि  
अफिसार ।
4. मिहिर: दाम'दरनि लोगो ।
5. रेम'थि : मिहिरनि बिसि ।
6. फैसालि : 20-22 बोसोर मिहिरनि फिसाजो ।
7. जारौ : 20-22 बोसोरनि सासे कलेज फरायनाय सिख्ला
8. समाइना : 22-25 बोसोरनि सासे साखि मावनाय सिख्ला



## एक्सिडेन्ट

(दाम 'दरनि न, बेलासे सम । ननि खथाखौ साबना-हामनायै साजायनाय नुगोन । फैसालि बोलानाय लोगो लोगो बिबारीखौ आथुरै खामानि मावनाय नुगोन । बियो खामानि मावहोलां-बायदि खोथा रायलायहोलां खालामगोन । गेजेर-गेजेर बाइजोर्जो फिसाइ, फिसाज्ला आरो फैनो गोनां आलासिफोरखौ नायस' हरबाय थागोन ।)

**बिबारी:** दाबो सौफैया, दाबोनो फिफानिबो मोखां नुया, फिसाज्लानिबो मोखां नुया । आलासिफोरासो सौफैलाय लांसिगोन बिसोर । जिरायग्राफोर सौफैनानै खमपलाय बनानै होग्रा गैयाब्ला बारै जालायखो ? ननि लांगोना बारलां बाथाय नाखि ज 'यो फिफायाबो, फिसायाबो । नायनाहा बिफाखौ दहाय फुडववो थिनहरबाय आडे थाब थानानै थाब लानानै फै होन्नानै । थांग्राड, थाबाखौनो । आरो फिसाज्ला..... एमफौ गोमोन बायदि दद्रद्राय थार । गुबुननि गथखौ दुस्थद्रायनि थाखाय रायनांगौ, जौहानियाखौ दद्रद्रायनि थाखायसो रायनांगौ जायो । बि फाफिफोराखौ नायहरै नायहरैनो गौदोनाफोरासो रुबाय लायलांबाय, मेगनफोरासो आलौलाय लांबाय आंहा । (सफायाव दसे दोम जिरायो, मँगानायनि हां गोलाव बोयो । बे समावनो बाइजोयाव गारिनि सोदोब खोनानो मोनो, बिबारीया दुबफुं सिखारनानै बाइजोर्जो नायहरो ।)

नै, गारियानो सौफैबाय, आलासिफोरासो सौफैग्रोलायलांबाय, थेवबो बि सानै मानसिया सौफैग्राड । ए, नडहाय, माथो हा रोगाग्रा ट्रेक्टरसो । (दोम जिरायफिनो । बे समावनो फारनैबो आखायाव मना लानानै गोलोमफ्रुलाय जासे दाम 'दर हाबफैयो ।)



## एक्सदेन्ट

**दामदर:** देहाबो मेंबाय, आखायबो रुबायबायलै बुरै ।

**बिबारी:** फुंजा-सानजा थानानै गोजोन गोजोन लानानै फैनो मैयानिफ्रायनो बुंबाय थाबाय आडे, आनि खोथा खौथ मानिग्रांखाया ।

**दामदर:** देहाफोरनि मेंनायाखि फुं-बेलासेनि बाथ्रा थायोना बे । मावबायनालाय मेंबाय, बोरायबाय नालाय मेंबाय । बेलाय गोरलै अंक । न कमेन्टस फिलच, ग एन्ड ब्रिं मि ए ग्लाच अफ अवाटार ।

**बिबारी:** (दै गिलाच से लायनानै होफैयो, दामदरा लोडे) मानोथो एफाबां गोबाव जाबोनाय ?

**दामदर:** मा खालामनो, जाथायनि सायाव जाथाय ।

**बिबारी:** मा जाथाय जाबोलायखो नौहालाय बाजाराव थानायालाय ?

**दामदर:** जोबनो गैलालै-जाथायफोरनि । सुबुं अनजिमाया बांबोनायखाय जाथायफोराबो लामा-सामा जेरावो जाबोसै ।

**बिबारी:** गावनि एंगारहायै हाबा लानानै थानाय मानसियालाय हा मानो लामा सामाफोरनि बायदि नांला बंसा जाथायफोरखौलाय नांफादेर बोनांगौ जाखो नो फालाय ? हा माथो जामारा ?

**दामदर:** आं रिक्सा लानानै फैगासिनो थाबाय, बै लामा दिंग्रायनायाव नुहरबाय मानसिफोरनि होंगो-दोंगो । खाथियाव फैब्ला नुफैबाय सानै गथफोरा स्कुटिजों स्पिद ब्रेकाराव सौदावनानै खुन्थेनानै एक्सदेन्ट जादों । आं लाबोनाय रिक्साखौ बिसोरनो लानानै थांबाय हस्पिटालाव ।

**बिबारी:** बेनिखायनो बै सेंग्राफोरनि बाइक सालायनायखौ गिखा थारो आडे । खानाय जायला जायलि, जांलाब-जांथाब गान्नाय-खोमा गन्थं नाथर गानलायनाय, साबा दाड। फरायनायबो गैला, आखल आखुफोरबो गैलिया । फारसे आखायजों बटल, गुबुनजों चिगारेट, मा नायनो ।

**दामदर:** सेंग्राफोर नडलै, सेंग्रीफोरसो ।

**बिबारी:** सोरबा सेंग्राफोर सौदाव लाडखै बे ?

**दामदर:** रावबो सौदावलाडखैनो, गावसोर नो गाव गेद्दा-गेद्दियाव फिदिंख हायैनि बेलथायदों ।

## एक्सिदेन्ट

**बिबारी :** सोरनिबा गथ जाखो बिसोरबा । बिसोरबो नाय जालिया, सारोन नागारनाय बायदि जाजोबथारबाय ।

**दाम 'दर:** हा सोरनि फिसा जाबावनो, हरसेयाव रंनि खुबेर जाग्राफोरनि आरोमा ।  
( बे समाव बाइजोयाव गारि लाखिफैनायनि सोदोब खोनानो मोनो )

**बिबारी:** नै, गारि लाखिफैबाय, आलासिफोरा सौफैखाथारबाय बे । जौनासो आफा बिबेकआ मब्ला सौफैयो ।

**दाम 'दर:** दि, दि, गासिबो थिग-थाग खालामखादो ।

**बिबारी:** जाग्राफोरा मोनबो जोबदों दा ? नों आलासि ( मनाखौ लानानै सिडव हाबलाडे । ) फोरखौ नायसहरदो थां बिफा, आं बेफोरखौ दोनहैग्रोनोसै ।

**दाम 'दर:** ( लामाथिं आवगायलाडे, बिबारीया हाबबोफिनो, मिहिर, रैमथि आरो फैसालि हाबबोयो । सोमोन्दो लालायो, आरो जिरायो । बिबारीया गिलाचाव लोंनो दै होयो । )

**मिहिर:** सौफैनायावसो गोबाव जाबोबाय न्नोंथां, गात्रि दामोनसै ।

**बिबारी:** अरजाया दे, माथो गोबाव जाबोदोंखाय ?

**रैम 'थि:** लामाफोरानो थाबथा थुबथाथारनालाय ।

**दाम 'दर:** नोंथां मोनहालाय-एफा गोजाननिफ्राय फैनाय, आं हानोबा बाजारनिफ्राय फैनायानो खथ गोबाव जाबोदों ।

**बिबारी:** नोंसोर रायज्जलाय लायबाय थाथ 'दो, आं एसे साहाफोर फुदुं हैनोसै ।

**रैम 'थि:** थां आइ, आनथिजों मदद हैफा किटसेनाव

**फैसालि:** जागोन दे आयै । नाथाय आंदि.....

**रैम 'थि:** अरजाया, आनथिखौल हेलफ खालामफा है ।

**मिहिर:** थां आइ, मावफाहैथां ।

**बिबारी:** नांलाया आइ, नों मावफा नांलाया, गासिबो रेडि खालाय खाजोबनायसो )

**रैम 'थि:** हाब बिबारीया-आंनि फिसाखौबाथाय मावजानो बायो नामा ?

**बिबारी:** मावजानो मानो बानो । फिसा फैसालियाबा आरोबा बेसे गोबाव नोंसोरनि फिसा जाबावनानै थागोनथाय ?

**दाम 'दर:** बिहामजो खालामगुबैखांनायनि उनाव जों दै-ओंखाम गासैखौबो आइ

## एक्सदेन्ट

फैसालिनि आखायजोंनो जाजोबगोन । दाथ जोंहा आइ फैसालिया जोंनि नखरनि आलासिसो, आलासिनि आखायनिफ्रा मावनाय बोरै जालायखो ? (बिबारी आरो फैसालि हाबलाडे ।)

**रेम 'थि:** उनाव बिहामजो हिसाबै जाहोथोंसै, दिनहै फिसाजो हिसाबै जाहोथोंसै-थां आइ, नोमाजों थांफादो । (बिबारी हाबबोफिनो) ।

**मिहिर:** जोंना फिसाया-बेफोरखौ जेबो साना-नयावथ साहा होनाय, ओंखाम-दै होनाय, माबा माबि एवखुब सावखुब खालामनाया बिनोसै । आलासिफोर फैब्लाथाय बिनोसै मावनाया ।

**रेम 'थि:** लेखा-फरायाव बारा बारगनो हायाखिसैब्लाबो आखल गियानावब्ला हले बारगबाय ।

**बिबारी:** जोंनाबो नोंजामादै जागोना लेखा फरायावबो बारगनाय, आखल गियानावबो बारगनाय । बाइहानि फां फुं, लौला जाला खालामनाय बेफोरनिफ्राय बारगनो हाथारबाय । गुबुन बिमा-बिफाफोरा फिसाफोरनि दुस्तखौ लानानै गियो, आंहा गियो फिसानि दद्रखौ लानानै ।

**दाम 'दर:** दद्रयानो एखेबारी लाजा खाथारा । नयाव थाब्ला बे रुमाव एरसोनानै लेखा फरायनायानोसै । बारा रायज्लाया, जानाय लौनायावबो बारा जाला बायनोखौनो नागिरा । जायखौ हायो-बेखौलनो जायो । (फैसालिया जाग्रा-लौग्रा लानानै होफैयो । खेबसे दै, खेबसे जाग्रा आरो खेबथामाव साहा । गावबो जिरायनानै जाफायो)

**रेम 'थि:** होमब्लाथ' जों स 'नाफिथार बिजामादैखौनो मोनथारनोसै ?

**मिहिर:** बेफोर मानि खाफाल आरो मा; खाफालाव थायोब्ला गासैबो फारि-फारि जानानै फैखायो । सनाफिथरब्ला मालाय मा जानो, जों बिफाफोरालाय आरो मा मोन्नो ?

**दाम 'दर:** मानो मोना जानोसै ?

**मिहिर:** नोंथाड मोनगोन, आंहा हले गोगा जाखागोनलै राइजोफोर ।

**बिबारी:** नोंहाल' नड हाय-बियाइ, आं हाबो बिमाजादैया जेरै बिखुनजोनिल दाव दाव सनाफिथार जायो, थिक बिब्दिनो बिहामजो फोराबो

## एक्सदेन्ट

बिहावफोरनिलसो आंगो जायो ।

**रेम थि:** औ, बाश्राया बेवहायसो नांदों-नोंसोरहा ? जोंनो होनायखौनो जोंबो-नोंसोरनो खेंसालियायै हरगोनना, गात्रि दामोन, हांमा दासुर ।

**बिबारी:** मैया बिमाइनाव थांदों- फैगासिनो दड, सौफैसिगोन बि । बे बिमाइआनो लिंहरबाय थाबाय, नालाय, थांनोलाय गोसोयानो गैयामोन अफिसबो बन्दजों ।

**मिहिर:** दे जोंहाबो एफा आथुर नड, सान हाबनायजों सौहैब्लानो जायो । आरो मा एफा गोजाम लोगोनि लोगो मोनलायनाय, फिसाफोरनि सोमोन्दो खानो फैनाय, जोंबोसो एफा आथुर थांफिननायाव गैया ।

**रेम थि:** गोजाम लोगोनि गोदान सोमोन्दो ।

**दाम दर:** औ, गोजाम लोगोनि गोदान सोमोन्दो- जुगे जुगे अरजाबबाय थाथों जोंनि बे उन्दैनि लोगोया ।

(बे समावनो बिबेक आरो जारौ मोनहा हाबबोयो । बिबेकआ एसे लेंग्रा-लेंग्रा थाबायो, जारौया मोखाडव बेन्देज खानाय । मेगन थाइसे बेन्देज खानाय आखायावबो बेन्देज खानाय आरो एसे लिंग्रि लिंग्रि । बिसोरखौ नुनानै बयबो नायो, बिबेकआ लासै-लासै, जारौआ सासु-मासु दावगालाडे । बिबेकआ सिडवहाबलाडे, उन-उन जारौ ।)

**बिबारी:** बिबेक आफा, नों सौफैबाय ? थां आफा फ्रेच खालामनानै फैदो, नै आंखोल आन्टि मोन फैदों ।

**बिबेक:** जारौ, नोंबो सिडवनो फैफादो । हारसिडै-गोदाव सोराव-जागोन ।

**बिबारी:** जोंनो बयबो बेवहायनो दड-हा मानो गोदाव सोराव जानांगौ जाखोनो फालाय ?

**दाम दर:** बिबेक, नोंनि लोगोयाबो रुमाव लांफा, नों थाब फैफिन-गोबां खोथा रायज्जलायनांगौ दंथारो । (बिबेक आरो जारौ मोनहा सिडव हाबलाडे ।)

**रेम थि:** बिनोदा फिसाज्जलाया ?

**बिबारी:** औ, ।

**मिहिर:** फैफानाया बिमाइनि फिसाजो खोमा ? ना लोगोसो जाखो ?

## एक्सदेन्ट

**बिबारी:** आंथ सिनायनोनो हायाखिसै। हा मेगन खाथे लायनाय बिब्ला सोर जाखोथाय ?

**दाम 'दर:** फारसे लामानि जैसियासो फैफायाखैथ बिमा ?

**रेमथि:** लामानि जैसिखौथ नागारनानै गारहरनो हायो, ननि सुग्रैखौसो बोगारनानै गारहरनांगौया महा जाल्ला जाथारनोसै नडादा।

**मिहिर:** मुखास्थयै बाथ्रा बुंलाबायनो नाडादे।

**बिबारी:** बिबेक आफा, ओजों फैदो, नोमफानि लोगो आंखल मोनजों सिनायथि लाफैदो।

**दाम 'दर:** गोजाननिफ्राय हब्रा-हरबाय थास्लायस्लाय खाथियाव थांनानै लिंहैनो हाया, आरो सोंबोखा-सोर एक बेटारी बेलाय।

**बिबारी:** र थांनो आं (गसं हांनायावनो बिबेक आरो जारौ हाबबोफिनो) ए माथो फैबायानोलाय दे आफा जिराय।

**बिबेक:** (गोमजोर थानानैनो गोमजोरैनो बाथ्रा रायज्जलाय लांगोन) न 'यावनि मानसियानो जिरायनांलायगौ ?

**बिबारी:** नै आफा, बियो-नोमफानि लोगो आंखल, बियो आनटि आरो बियो फैसालि।

**बिबेक:** बहानि, मानो फैदों ? (सानैखौबो खुलुमो)

**दाम 'दर:** उदालगुरिनि। मानो फैदों खौ दा उनाव मिथिगोन। जों बोरै लोगो मोनखो माबोरै लोगो जाखो बेफोरखौ नोंसोर मिथिया, गोलाव सल दड।

**रेम 'थि:** दिनै ज 'लोगो मोनलायदों-दिनै बुंदो आरो।

**बिबारी:** दे बुंदो, एसे खोनासंनि।

**मिहिर:** मोनसे एक्सदेन्टनि गेजेरजों जों सिनाय लायदों।

**दाम 'दर:** गुबुनफोरनि एक्सदेन्टा बोखावलायो, जोंनि एक्सदेन्टा नाथाय अरजाबहोदोंसो।

**बिबारी:** माथो एक्सदेन्ट मोन्थो बेयो- ?

**रेम 'थि:** थाबबो बुंगाराहाहाय फाग्ला लावदुम मोनहा।

**मिहिर:** र, अधैर्ज दाजाथ', धिरे-धिरे।

## एक्सदेन्ट

**दामदर:** एक्सदेन्टा जादोंमोन-गुवाहाथिनि अफसरा चिनेमा हलाव । चले फिल्म नायनो आं थानों लोगोफोरजों, टिकेट लानानै हाबदों, खोमसि खोमलाव जिरायब्ला-

**मिहिर:** आंनि सायावसो गेम, । नाय बावगौ गुवाहाति नालाय हारसा नडब्ला सोर जानो बिलाय सान्नानै-बरनि रायसे रायनानै बिखुडव गुब ।

**दामदर:** आंबो सानगारबाय गुवाहातिनि हारसाफ्रा अन्थाय बिखा, आंबो बुंगारबाय-आइदै, साला खि जानाया ।

**बिबारी:** नोंसोरनि एक्सदेन्टजोंनो जोंनि सिनायथि, जोंनि लोगो ।

**रेम'थि:** आरो इयुननि गोजोर सोमोन्दो । (मिनिलायो)

**बिबारी:** बिबेक आफा, नों बुजिबायदा-जों मा हास्थायदों-नोंसोरखौ लानानै ?

**बिबेक:** फिसाफोरनिफ्राय आसा खालामनो रोडै-सोरथो बिमा बिफा दड? बयबो आसा खालामखायो ।

**रेम'थि:** फैसालि आय, नों गनायगोनदा जोंनि सान्नाय हनाय आरो आसा खालामनायखौ ?

**मिहिर:** नोंनो खांजोबनाय-गथ आय, जोंनि आसा खालामनायखौ नों फेलें खालामनाय नड द ?

**फैसालि:** नोंसोरनि खोथा आं सिगाडव माब्लाबाफोर फेलें खालामफेरदोंमोन ना ? नोंसोरनि खोथा आं गनायामोनब्ला मानो नोंसोरजों फैफानांगौमोन ?

**रेम'थि:** नोंगौ, आय, जों नोंखौ मिथिखागौ । नों सिगाडव माब्लाबाबो-लाजि फोनां फेराखै, आरो मोखां साइख्ल 'बो खालामबो फेसाखै ।

**मिहिर:** नोंनि मानिसुलि आखुखौ लानानैनो जों जोबोर गौरब मोनो ।

**दाम'दर:** जाय फिसाफोरा बिमा बिफाफोरनो गौरब आरो गोगगानाय लाबोनानै होफैनो हायो-बिफोर बायदि फिसा फोरानो जिउआव देरहासातनायनि बिबारनि माला मोनगानो आइ, नों सासे लक्षी फिसा । जोंनि अन्नाय आरो बोर सारसिनाया अराइ थाबाय थागोन ।

**बिबारी:** आफा बिबेक, जोंबो नोंनि रोंनाय, बुजिनाय आरो बिमा-बिफाखौ फोजोन्नायखौ लानानै जोबोर गौरब मोनो । नों दिनैसिम जेरै जोंनि सना

## एक्सिदेन्ट

फिथर, उनावबो बिब्दियैनो जानानै थाबाय था ।

**दाम'दर:** फिसा नों दिनैनि सिगांसिम जैरै गोबां गोजोनथाव आरो देरहासात हाबाफोरखौ मावनानै दिन्थिबोबाय-जिउनि मोनसे गिदिरथार हाबाखौ नों दिनहै मावनानै फोरमान होदो-नोंदि जॉनि आमाइ थख्ल, अनजालु फिसा । (बिबेकआ गोमजोर मारिनानै थायो । बयबो बिबेक, फैसालि आरो जारौ खौ नायगोमोबाय थायो ।)

**बिबेक:** (नायगंनानै गोमजोरै बुंलाडो) आं हानाय नंलिया ।

(बयबो गोमोहांबो)

**बिबारी:** मा बुंदों नों बिबेक ?

**दाम 'दर:** बिबेक-बे मा राव जाखो ? नों मा बुंखो ?

**बिबेक :**औ, नोंसोर जायखौ खोनादों बेखौनो आं बुंदों । आं नोंसोरनि सान्नायबादि फैसालिखौ हाबा खालामनो हानाय नंलिया ।

**बिबारी:**( बिबेकखौ मोदोमाव दांनानै गोबारै) - बिबेक, बेखौ नों मा बुंनो लादों ?

**दाम 'दर:** नोंथ' जॉनि खोथा बादियैनो हाबा खालामनो होन्नानै बुंदोंमोन ना ?

**बिबारी:**( फैसालिखौ आसि दिन्थिनानै) नायहर हनै, बिनो फैसालि, नोंनि नोमफानि लोगोनि फिसाजो संस्कार मोन्नाय-गियान-सोलोंथाय मोन्नाय फैसालि । नों बिखौ दा बुंदों हाबा खालामलिया ?

**मिहिर:**( रेम 'थि आरो फैसालि मोनहाबो गाबा मोखां जानानै थागोन ।)

र, नोंथांमोन, सिड्डव माबा मोनसे खोथा थानो हागौ-सॉनानै दिहुनग्री ।

**रेम 'थि:** बुजिना गथ'-गोसोफोराव माबाफोर दाहा थानो हागौ-समाय होदो । उनफोराव रायज्लायफिन जासिगोन बे । जों दिनै थांनोसै-जोंखौ थांनो होदो ।

**मिहिर:** औ, सासेल गथफोरा गोसोयाव दुखु मोन्नो गोरलै जायो, दुखु-दाहाफोरखौ बोस्रानानै लालायग्रीदो ।

**बिबारी:** बिबेक आफा, नों मैया बिमाइनाव थांनाया माथो जानानै फैखो ? सोर सिख्ला मोनबो फाखो नों आफा ?

**दाम 'दर:** जों सानदोंमोन-न 'याव जॉनि सिगाडव जैरै मोजां गथ, संस्कार मोन्नाय

## एक्सदेन्ट

गथ जाबायसो सानदोंमोन जों । नाथाय नों थगायसुला गथसो माथो,  
सिखावसो माथो नोंलाय ! मागोनासो अफिसार जाथारदों नों ।

**बिबारी:** जोंनि अन्नाय, जोंनि बोर आरो जोंनि रां-रुफाखौ लानानै नों बे बायदि  
सिखावसो खावनो लादों नों- ? नोंलाय माथो बिमानि आहार सिखावसो-  
आफा ?

**बिबेक:** नोंसोर दाय हमनाय बायदि आं नड। नोंसोर फोथाय-आं नोंसोरनि  
फोरोंनायाव सासे संस्कार मोन्नाय मानसि ।

**दाम 'दर:** सिरिथा नों लांसुनिया, संस्कार मोन्नाय गथ 'या बे बायदि लामानि सिख्ला  
खन्नानै लानानै फैयो नामा ?

**बिबेक:** एक्सदेन्ट जाफ्रांबायब्ला-आं माथो खालामनो ?

**बिबारी:** (रागाजों बिबेकखौ सोबायो) एक्सदेन्ट, एक्सदेन्ट लाजिया खिसै  
नों-बयनिबो गेजेराव बे लासिं सिं फंसे बाश्राखौ बुंनो ?

**जारौ:** मादै, नोंसोर गोरोन्थि बुजिबाय- ।

**बिबारी:** जों गोरोन्थि बुजिनो ना, नोंसोर गोरोन्थि, पाप, मावनो लामानि सिख्ला ?

**बिबेक:** एक्सदेन्टा बोरै पाप जायो आयै ?

**बिबारी:** बे बाश्राखौखि आं बिमा जानानैनो नोंसोरनो बुजायनानै होबावनांगौ ?  
(गाबो)

**बिबेक:** नोंसोर गोरोन्थि बुजिदों । जों.....

**दाम 'दर:** नाय फिसा, नों मोनै गिदिर गोरोन्थि खालामदों, बेनो पाप जादों ।

**बिबेक:** माबोरै गोरोन्थि आरो पाप जाखो ?

**दाम 'दर:** बिमा-बिफानि मदद गैयाब्लानो हाबानि गरन्थ खालामनाया गोरोन्थि  
जादों आरो लामा-सामा गाज्जि आखल दिन्थिनायनि थाखाय लामानि  
मानसिफोरजों बे बायदि बुजागोमा बायनाया पापीनि बुजानाय जादों ।  
मानोना मानसि मोजाड बे बायदि बुजाफेरा ।

**बिबेक:** आं पापी नड, आं पप मवआखै । मानोना नोंसोर संन्देह खालामनाय  
बायदि आं एक्सदेन्टबो मवआखै । फंसे बाश्रायाल नंगौ, आं बे  
सिख्लाखौ हाबा खालामसिगोन, नडब्ला बेसो पाप जानानै फैगोन ।



## एक्सिदेन्ट

**दाम'दर:** बिखौ हाबा खालामब्ला पापी जानांलायनाय मा एफा गिदिर दाय मावखो नोड्डे ?

**जारौ:** आदै-मादैमोन, नोंसोर जोंखौ गोरोंथि बुंजिदों-आं लामानि मानसि नड्ड, आं कक्राझार हिन्जावसा फरायसालिमानि हस्टेलाव थम्प्रा, दिग्रि फरायग्रासो । बियो आंखौ एक्सिदेन्ट खालामदों ।

**बिबारी:** नों लाय होयाब्ला बियो माबोरै नोंजों एक्सिदेन्ट खालामनो सुजुग मोन्नांगौ जाखो ?

**बिबेक:** आयै, बे बायदि गात्रि एक्सिदेन्ट जायाखै ।

**बिबारी :** बे बायदि गात्रि एक्सिदेन्ट जायाखैब्ला माबोरैथो बुजागोमा बायखो नोंसोर ? आरो नै सिख्ला नों गात्रिसिन खायनो बांसिन बुजादों ।

**जारौ :** जों बेफोर बायदि गात्रि एक्सिदेन्ट जायाखै, बियो आंखौ बाइक एक्सिदेन्ट खालामदों, आंहा आखाय बायदों, मेगनाव गोब्राब दुखु मोन्दों आरो नोंसोर जोंखौ.....(गाबो ।)

(गुबुनफोरा बयबो गोमोमो)

**बिबेक:** (जारौखौ बुरखायनानै) जारौ, नों दागाब, आं दड्ड। गासिबो थिग जाजोबगोन । जों जैरै गात्रि नड्ड, आइ-आफा मोनहाबो गात्रि नड्ड ।

**दाम'दर:** सोरनि बाइक सालायनानै एक्सिदेन्ट जाखो नों ?

**बिबेक:** आमाइनि, आमाइआ गाव लोमजानायखाय मुलि लायनो थिनहरदोंमोन, रोंबाडै खाय आं लाड्ड होन्दोंमोन-अखा हरबाय-फैनायाव बेवनो एक्सिदेन्ट जाबाय । सिबाय-मेगनाबो नुनाय नंलियानो, आखायाबो बायबाय, मोखाडबो दोलाबाय-आमाइ आनै मोनहाबो बुंबाय आंबो अनखांगारबाय- बिबो राजि जाबाय-आं बिखौ हाबा खालामनो थांखि लानानै नयाव लाबोबाय ।

**बिबारी :** (हां गोलाव बोनानै) नों गोरोंथि मावबाय नड्डना आफा ।

**दामदर:** नों मिथिखागौ, नोंनि थाखाय सासे मोजां सिख्ला-संस्कार मोन्नाय सिख्ला सोंनानै दोनखाबाय ।

**बिबेक:** नोंसोर आंनो जैरैबादि संस्कार होबाय, आं मा खालामनो । बिनि मेगन

## एक्सदेन्ट

खानि जानाय, आखाय बायनाय, मोखां दोलानाय-मोदोमनिफ्राय रना-  
रनि थै, मेगननिफ्राय-मोदै आरो खुगानिफ्राय खाराव-माराव  
गाबखावनाय बे बायदि बुब्लियाव आं बिखौ माजों गोजोन होनो।  
आंनाव थानाय मोनसेल राहाजों आं बे जेंनाखौ होखार गारबाय-आं  
बिखौ हाबा खालामनो खोथा होबाय। आं गोरोन्थि मावखोना थिगखौ  
मावखो आयै ?

**बिबारी :** दानिया-फैसालिखौ माखालाम बावनांगौ जाखो ? बियोबोथ' सासे  
लोक्षी गथमोन, आख 'लै-गुनै जेरावबो बारगनायमोन।

**बिबेक:** फैसालिखौथ आं मुगैयाखै, बियो मोजां गथ संस्कार मोन्नाय गथ',  
बिमा-बिफा मानिसुलि गथ। दासिम जेरै-बिमा-बिफानि आखायाव  
दड-बिखौ बिमा बिफायानो लांफिनथोंसै।

**रेमथि :** नोंसोरनि दुखु-खैफोदाव हाबफानानै जों दुखु-खैफोट बानसफानो  
सानाखिसै। जों थानायमानि जॉनिबो-नोंसोरनिबो महा जाली। बेनि  
खायनो जॉनि फिसाखौ जों लानानै थांफिननोसै।

**जारै :** रथ-मादै मोन, नोंसोर थांथनो नाड, (फैसालिनि खाथियाव थांनानै)  
बिनानाव, नॉनि दुखुखौ आं बुजिनो हाबाय, आइ-आफाया आंखौ गियान  
होदों-गावनि दुखुखौ बुंनायनि सिगां गुबुननि दुखुखौ बुजिनानै लाग्रो  
आरो गाव उदै सुफुंनायनि सिगां गुबुनखौ जाहोग्रो।

**रेमथि:** नंखायखौ थास्लिमनो दाफैनों सिख्ला।

**जारै :** आंबो नोंसोर बायदि गियानी बिमानिसो फिसा, आंनि आइआ सासे  
फोरोंगिरि। आं बिबेकखौ-गोसो थोया, आं बिखौ हाबाबो खालामनो  
खोथा होयाखै, बिखौ खैफोटनिफ्राय रैखा खालामनोसो फैफादों।

बियो आंखौ हाबा खालामनो होन्नानै बुडब्ला, आंनि सिख्ला लोगोफोरा  
बिखौ बुसे-बुनानै थानायाव सोनानै दोनसि गौमोन। बै खैफोटनिफ्राय  
बिखौ रैखा खालामनोसो आं बिजों फैफादों। आं दा नुफैबाय, आंनिया  
एक्सदेन्टजों फैनाय सोमोन्दो, नोंसोरनिया जादों गोरबोजों फैनाय  
सोमोन्दो।

## एक्सदेन्ट

(बिबारी आरो दामदरखौ नायनानै) आं फंसे खोथा बुंनोमोन ।

**बिबारी:** मा खोथा ?

**दाम 'दर:** बुं-मा खोथा ।

**जारौ:** आंहा बिदा गैया, आं बिखौ बिदा लिंनोसै । नोंसोर आंखौ फिसाजो हिसाबै गनायदो, अन्दो आरो निमांहा हीदो ।

**बिबेक:** जारौ बे बोरै जानो ?

**जारौ :** जानांगोन, बेनिखुइ साबसिन माथो राहा दंभावयो ? नोंजों-आंजोंनि हाबाया-नोमा-नोमफाखौ जेरै अलखदाव खोख्लैदों-आंनि आइखौबो खोख्लैगोन, मानोना आइजों- आं जौल जौनि नखर । आफाया आर्मिमोन, एक्सदेन्टाव कास्मिराव थैदों । आरो देरसिन बाश्राया जादों-फैसालिनि मेगननि मोदै, बिमा-बिफानि गोसोनि हांमा !

**फैसालि :** जारौ, नों मानो बिब्दि बुंदों ? जायनि थाखाय नोंनि मेगना-खानि जाबाय, आखाय बायबाय- नोंनिया जिबनानो फंगु जाबाय.....

**जारौ :** देहा आरो अंगफ्रा फंगु जादोंब्लाबो-गोसोया जायाखै फैसालि, नोंनि हाबायाव बिमा-बिफा बयनिबो गोसो गोरोबनाय दड। आंनियाव गैया; आइआ मा बुंगोन-बेबो मिथिखानाय-बियो गनायनाय नड ।

**बिबारी :** जारौ, आंहा फिसाजो गैखायाबो-नों रजिब्ला नोंखौ फिसाजो बानायनानै लागोन आं ।

**दामदर:** औ, फिसा, आंबो नोंखौ फिफा बायदि अनगोन ।

(बे समावनो समाइना हाबबोयो ।)

**बिबारी :** सोर जाखो-नों सिख्ला ? सोरखौ नागिरनानै फैदों ?

**समाइना :** आं आदा बिबेकखौ नागिरनानै फैदों । आंहा बिनो दाहार सुखनांगौ दड।

**बिबारी :** दाहार सुखनांगौ दड?

**दाम 'दर:** मा दाहार, माब्ला लानाय ?

**समाइना :** बोसोरबानि सिगां, आंजों बिजों गिदिर एक्सदेन्ट जादोंमोन ।

**दाम 'दर:** जेरावबो एक्सदेन्ट खालामबोथारो नामा नोंलाय आफा बिबेक ?

## एक्सदेन्ट

**समाइना :** (बिबेकखौ नायहरनानै) नों बावबायना गुवाहातियाव स्कुटिजों एक्सदेन्ट जानायखौ ?

**बिबेक:** बावयाखै। बेनि थाखाय 'थ आं नोंखौ निमाहा होखांबाय ना, मानोलाय फैबावनांगौ जाखो ?

**समाइना :** आं खोनाहैदों-बै एक्सदेन्टनिफ्रायनो नों लेंग्रा जादों। आइ-आफाया आंखौ थिनहरदों-आंलायनो नोंनो मोनसे गिदिरथार अनथोब (उपहार) होनांगौ।

**बिबेक:** मा बायदि अनथोब ?

**समाइना :** अनथोब मानि- नोंखौ सिबिबाय थानो होदों-नोंखौ हाबा खालामनो होदों।

**बिबारी :** (बयबो गोमोयो) हाबा ? बिबेकखौ नों हाबा खालामनो ?

**समाइना :** औ, आइआ बुंदों नेंडब्लांलायनो आंहा पापआनो उद्धार जानाय नडनो।

**दामदर:** माबारै ?

**समाइना :** गुवाहातियाव आं आदाखौ स्कुटिजों एक्सदेन्ट खालामफ्रांदों-बियो दुखु मोन्दों, आथिं लेंग्रा जादों आरो हस्पिटालाव सोनांदों। थै नांगौ जानायाव आं बिनो बटलनै थै होनांबावदों। दडना गोसोयाव आदा बिबेक ?

**जारौ :** बेनिफ्राय दानों बिनिफ्राय मा लुबैयो ?

**फैसालि :** आदा बिबेकआ नोंखौ मानो हाबा खालामनांगौ ?

**समाइना :** जोंहानाव फोथायनाय दड-जे सेंग्रा सिख्ला थै होलायलायब्ला बिजि-फिसाय जालायनांगौनो। थै होनाय बाभ्राखौ खोनानानै आइआ आंखौ थिनहरदों। आं बिखौ हाबा खालामनानै अराइ जिउ बिजि हिंसाबै-सिबिनो मोनाब्ला आंहा जिउआव पापआनो जोबनाय नड, आं अराइ पापी जानानै थानांगोन। आं मिथिगौ-नोंसोर आंनि खोथायाव मदद होनाय नड, फोथायनायबो नड। बुं आदा बिबेक-नों आंखौ पापनिफ्राय उदां होगोन ना ? आंनो थानानै थानो सुजुग होगोन ना ?

**बिबेक:** आं मा बुंनो, आंनो आइ-आफाया गियांन होदों, संस्कार होदों-बिसोर बुंगोन आं मा खालामनांगौ। आइ-आफा मोनहा-रायथिबाय फैसालिखौ, आं थांखि दिखांबाय जारौखौ आरो जाथाया-जर होबाय समाइनाखौ-बुं आयै आं मा खालामनो- ?

## एक्सिडेन्ट

**बिबारी:** नों बेसेबां संस्कार मोन्नाय-बेखौ नायनो थाखाय जों नोमाखौ लिंहरगोन ।  
**समाइना :** नोंसोर लिंहरब्लाबो आइआ फैनाय नडा, फैनाय नडा माने फैनो  
हानाय नडा ।

**दाम'दर:** मानो फैनो हाया ?

**मिहिर:** बे सिख्लाया नातक खालामदों- ।

**रेमथि:** बे सिख्लाया थगायदों ।

**समाइना :** आं थगायाखै, नातकबो खालामाखै, आइआ फैनाय नडा, फैनो हानाय  
नडा ।

**बिबेक:** मानो फैया ?

**समाइना :** मानोना आइआ थैलांबाय । दा आं हारसिं, बे उदां-गुवार बुहुम  
बिखायाव आं हारसिं । सिगाडवबो रावबो गैया, उनावबो रावबो गैया ।  
बेनिखायनो नोंसोरनि अन्नाय आरो साया साइख्लुम नागिरदों ।

**बिबेक:** आयै-आंनाव मानो बेबायदि आखाय बेरफ्राव फैखो ? बेनि जाहोना मा  
जानो हागौ ?

**बिबारी:** नों जाबाय सासे संस्कार मोन्नाय गथ, दामोलनिफ्राय साबसिन-गोदैसिन  
फिथायखौ बयबो सेलाय लायो फिसा । नों जाबाय गुननि बिगोमा,  
गियाननि थुबिल आरो इयुननि गोजोन साइख्लुम ।

**बिबेक:** होमब्ला आं-फैसालि-ना जारौ-ना समाइना ?

**बिबारी :** बिसोरनि गेजेराव गुन-गियाननि आनजात जागोन-जायनो साबसिन  
संस्कार मोन्नाय बिखौनो नों हाबा खालामगोन ।

**बयबो :** नंगौ ?

**बिबारी :** औ । बिनो आंनि नखरनि माइनाव जागोन ।

( फैसाली गोग्लैयो )



सोदोमस्रिनि बोर ना साव

सोदोमस्रिनि बोर ना साव

## : आखुफोर :

1. बुद्धिराम: 62 बोसोरनि गुदि फरायसालिनि गाहाइ फोरंगिरिनिफ्राय आजिरा मोन्नाय ।
2. सिंखावरि: बुद्धिरामनि बिसि ।
3. मोगथां : मेट्रिक फेइल, बुद्धिरामनि फिसाज्ला ।
4. मिनिमिनि : कलेज फरायनाय बुद्धिरामनि फिसाजो ।
5. मेरगा : जौजो मोखां सुलायग्रा जौफाग्ला बुद्धिरामनि फिसाज्ला गेजेर ।
6. मिनिमिनि सेंग्रा लोगो-खानाय गोलाव लानाय सानै ।
7. मोगथांनि गोसोथोनाय सिख्ला जिन्स ट्रि कवार्टार गानलायग्रा सानै ।
8. देवबार: बुद्धिरामनि सिगांनि फोरोंगिरि लोगो ।

## सोदोमस्रिनि बोर ना साव

फुंनि गु सो बाजिबाय । बुद्धिरामनि न । सिंखावरिया न सिबगोन, फिसाज्ला मोगथाड गारि हुगारबाय थानानै दान्दिसे उनाव गारि लानानै ओंखारबोगोन, फिसाज्ला मेरगाया जौ फेनानै सिटलाव बेरायगोन, बाज्रेत-बाथेत सिडव थांगोन आरो फिसाजो मिनिस्त्रिया ट्रि क्वार्टर गान्नानै मबाइल राइज्जायानानै फारसेनिफ्राय गुबुन फारसेजौं थांगोन ।

मेरगा: (मेथाइ खनो) गलाब मदिरा,  
नों आंनि जिउ सना,

.....  
.....

सिंखावरि: हाइ, भगवान, जौंनि मा दायनि थाखाय सासे नड, सानै नड-साथामबो फिसा फोरखौ फेसेवहरजोबखो नों ? आंनि आहारावसो ना बिफानि थैयावसो बेफोर बायदि बिजानुफोरा हाबनानै दडमोन ? जेब्ला आं फिसाज्ला गेदेरखौ जोनोम होदोंमोन-अब्ला आं खुसिजौं मिनिदोंमोन; जेब्ला नैथि फिसाज्लाखौ आं जोनोम होदोंमोन-मिथिया आंनि मेगननिफ्राय मानो मोदै ग 'यामोन-आरो, आरो जेब्ला फिसाजोखौ जोनोम होदोंमोन, अब्ला गोसोनि रंजानायजौंनो आं सिजारिननि एनास्टासिया जोबखांनाय लोगो-लोगोनो खेबनैसो बाज्जदोंमोन । साथाम फिसा मोन्नानै आं सान्द्रोंमोन गुबुन साखा खबब्रै गोनं गारिफोर बायदि नडब्लाबो अटरिक्साफोरबादि खारनो हासिगोन, साइखेलजौं गोग्लैनाय बादि गोग्लैनाय नंलिया । नाथाय दिनै नुबाय आं, सिगांनि साखाया फाम गनाय लोगो-लोगोनो उनावनि साखा खबनैयाबो टिउब जि जोबबाय ! देरसिना मटरसाइखेलखौ हाबा खालामबाय, गेजेरा गलाब मदिराखौ हाबा खालामबाय आरो फिसाजोया हाबा खालामबाय हेल 'खौ !

देवबार: आदाया दडना नयाव बाजै ?

सिंखावरि: ए देवबार आगै- दड, फै जिरायफै ।



## सोदोमसिनि बोर ना साव

**देवबार:** खामानि बे बायदि जेबो गैयाब्लाबो हाबफैबायदे आं बाजै ।

**सिंखावरि:** नॉनि नॉदाया साखिनिफ्राय रिथायार्द जादोंहोन्नानै-समाजनिफ्रायबो रिथायार्द हरनो सानो नामा नॉसोरलाइ देवबार आगै ?

**देवबार:** समाजनिफ्राय रिथायार्द नड्ड, समाजावसो लाबो गुबैनो सान्दों जोडो ।

**सिंखावरि:** नै, मा खालामदों न सिडवलाय ? मानसिफैदों ओंखारबो ।

**बुद्दिराम:** (ओंखारबोनानै): देवबार, मा, बहानिफ्राय सौफैखो ?

**देवबार:** लोगो मोनैयाबो गोबावसै, लोगो हमनो फैबाय आं । फ'नफोर बुबायथानोबो बाखांनाय मोनथारो आं ।

**सिंखावरि:** नॉसोर रायलायथ, आं साहा फुदुंहैनि । (सिडव थाडो)

**बुद्दिराम :** देनाय बुंनाय, माबोरै दड ?

**देवबार:** थानाय-जानायफ्रालाय मौजाडैनो दड । हा आदानिया पेनचननि खामानिया जाबायफा ?

**बुद्दिराम:**फेनचनाथ दाबोनो जायाखैलै फंबाय । बिथिबायना फंबाय, मानसिया रिथायार्दनि समाव जा बोरायो एबा बुरैया, पेनचन थाबायनानैसो बोरायसिनो । माने मा जायो मिथिगौना, रिथायार्दनि बिदाय फोरबोया बै मानसिखौ बोरायबाय होन्नानै चार्तिफिकेट होनाय, दानफ्रोमबो मोनबो बाय थानाय बेटन जोबबोनाय, सानफ्रोमबोनि रुटिना जोबबोनाय, आरो जायगानि अफिचनिफ्राय जागायनानै पेनचन अफिच आरो उनाव बेंकट्रेजारीफोराव मोननांनाय खुगाजों फोरमायख हायै सात-जाल्ला ।

(बे समावनो सिंखावरिया चाहा लानानै फैयो ।)

**देवबार:**गोसो आरो देहा बरायग्लिनायजों रां-रुफा जैरैबो आंखालाव गोग्लैथारो बिब्दिब्लालाय माथो ।

**देवबार:**गुवाहातिफोरनि अफिसाव थानायफोरखौ आदानिया फिसाज्जलाफोरानोथ मावनो हायो ।

**बुद्दिराम :** नायनायाव जारौ मारौब्लाबो दावखा खामफ्लाय फिथायखौ रावबो जाया, मान्दार बिबारा जारौ-रौ नायनो समाइना थारब्लाबो फुजायाव रावबो बावफेरा देवबार, बेखौथ नॉनो खथ' खन्थाइ-तिरबोबाय ।

## सोदोमसिनि बोर ना साव

**देवबार:** आदायाथ रौरोथोनाव रिगुलार लिरबाय थायोमोन, रिथायर्दनि उनाव निफ्रायथ माथो नुबांथारलिया ।

**बुद्दिराम:** रिथायार्द जानायजों लोगोसे आं दा मोगथां जिउखौबो औरैबायदि रोंगथि मोनबो बाय-देवबार । आं दा बुजिबाय-फेरलेब-फेरथेब सोरजिनानै जेबो खामानि गैया । आंनाव औरैबायदि मोनसे प्लट जमा जाबाय बेखौ लिरनो हाफुंब्लानो आं देरहागबाय ।

**देवबार:** 'भगवान' आव अमिताभ बच्चना लिरनाय बायदि दोसे सल ?  
( बे समावनो मेरगाया फैदेरनानै जफा फैयो )

**मेरगा :** नों लिरल ना आफा, आं दड। साफाइनानै होथारगोन आं नोंनि बिजाबखौ ।  
**सिंखावरि:** ( चाहा लानानै फैयो ) मेरगा-आफा थां नों सिडव । चाहाया प्लास्कावनो दंखायो

**मेरगा:** आं साहा लॉनो फैयाखैलै आयै ।

**बुद्दिराम:** माथो नांगौ नोंनोलाइ ? जौ ? बेरे फुंजानि लोंखांबायानोसै ।

**सिंखावरि:** नों मानो मानसि गोनां समाव बे बायदि खालामफैनांगौ ?

**मेरगा :** आफानि सोंनायनि फिन्नाया जादों-नों जैरे सोरां-स्लाब मोनै साहा लोडे औरै आंबो जौ लोडे, आरो नोंहा जैरे लेखा लिरनायनि गोसो दडथिक बिब्दिनो आंहाबों जौ लॉनायनि गोसो दड। आरो अनसुली, धोरुमसुलि आइ, नोंनि सोंनायनि फिन्नाया जादों-आंबेथ सासे मानसिना । नों आंखौ मानसि हिसाबै जोनोम होयाखै होनब्ला आइ ?

**देवबार:** र' आदै, नोमा नोमफानि गोसोखौ नों बुजिनो नाजा । बिसोरनि बाथ्राखौबो नों गोसोहोनानै खोनासं ।

**मेरगा :** आंखौ बुजायनो नाड-आं गासिबो बुजिजोबखायो । बिसोरसो आंखौ बुजियान्ना । आंथ बिसोरनि गोबां खोथाखौनो मानिखायो, फंसे खौलसो मानिनो हाया आं ।

**देवबार:** माखौ मानिनो हाया ?

**मेरगा :** बेलाइब्रा, जौ लॉनो बादा होनायखौ ।

**देवबार:** मानो गारनो हाया ?

## सोदोमसिनि बोर ना साव

**मेरगा :** बोरै गारनो हानो दे, बेखौ- गारोब्लादि आं हारसिं जाथारगोन । खोनासं आदै, आइ आरो आफा-आंनि बाथ्राखौ गोसो होनानै खोनासं । आं फरायफुंनोबो हायाखिसै, साखिबो मोनाखिसै, बिजिनेस गेलेनायावबो थगायजाबाय, आरो गोदो एल पियाव मोजां मोनज्जायनाय सिख्लायाबो आंखौ गारनानै सोरबा बिटिसि अफिसनि पियनजों हाबा जाहैबाय । दा आं हारसिंब्रा- ।

**सिंखावरि:** सिरि था, बै मोसौ मासेया खाहैदोथां ।

**मेरगा:** साला बे मोसौया आंखौ दाखालि सौनो होसोदोंमोन-खाहैया आं, रानथों सालायाखौ बे गलियावनो । बिगोमा सौग्रा बेयो ।

**बुद्धिराम :** बिगुमाखौ सोग्रा मोसौया मोनजाया-मोनलोड साजा मोन्नांगौब्ला-बिमा-बिफानि खोथा लायै फिसाफोरा माबादि साजा मोन्नांगौ दानिया नों बुंदों ।

**मेरगा:** खोथालायै नड, जदि बिमा बिफाखौ दुखु होग्रा, जाहोन गैया गारा बिमा-बिफानि सायाव उदै बुगार बुगार जाथारग्राफोरखौ साजा होग्रा मोनसे आइन दानांगौ । आन्ना हाजारे बायदि हांगार स्ट्राइक खालामनांगौ बड लेण्ड सरकारखौ आइन दानो नारसिन्नो थाखाय ।

**देवबार:** बेखौ सोर दैदेनगोन, सोर जागायग्रोगोन ?

**मेरगा :** जाय बिमा-बिफाफोरा बिब्दि खालामजादों । थारमानो जाय बिमा-बिफाफोरा फिसाफोरजों-सोगाब जादों, जायनि बिमा-बिफाफोरा फिसाफोरजों लाजिफोनांजादों बैफोरबायदि बिमा बिफाफोरा आवगायबोनांगोन ।

**सिंखावरि:** मेरगा-आं नौखौ बुंगासिनो दडनों थांदोथां ।

**मेरगा:** र' आयै-आंनि बाथ्राया जोबाखैनो । र', आंहा बुंवावनांगौ दं । साजा हिसाबै बै फिसाफोरखौ जेसे हागौ एसेबां थाबैनो हाबा होनांगौ ।

**देवबार:** मानो ?

**मेरगा :** मानोना, बिमा-बिफानि खस्थ, लुबैनाय आरो गोसोखौ थाबैनो बुजिथों ।  
( ओंखारलाडे बे समावनो मिनिमिया मबाइल राइज्जलाय राइज्जलाय हाबबो

## सोदोमसिनि बोर ना साव

गोन । गान्नाया ट्टि क्वार्टर जिनस, खानाया आइलि-जाइलि हगार सारनाय- ।)

**बुद्धिराम:** देवबार, नों थांनो ना आंनि गिदित सोरजिनि प्लटखौ नायनो ?

**सिंखावरि:** थांदो थां नोंसोर सानैबो ।

**बुद्धिराम :** सरकाराबो बैसो जाबाय होन्नानै साक्रिनिफ्राय आजिरा होबाय, ननि बिजि-फिसा फोराबो जेरावबो एरायनो थिन्नायल 'सै । थु देवबार ।-

**मिनिस्त्रि:** आयै नोंबो थांदो ना, आंहा बेवहाय खामानि दड ।

(साथामबो ओंखारलाडे, मिनिस्त्रिया सियाराव जिरायनानै टेबुलाव आथिं होग्राडे आरो फ 'नाव रायज्जायबाय थायो)

हेल, मा जाखो-बे फाग्ला रांखो लांनायालाय ? गैयाथ' मबाइलानो बुब्लाबो अराखै । एखनब्ला सुइच अफ, एखनब्ला नट रिचिबुल । गुलि गुलि खालामनो नडब्ला आंजों मानोथो गोसो थोलायदों बिलाइ ?

**फनाव रिफैनाय राव :** नों बिनाव फन खालामाखै होमब्ला ? मानसिया एखनब्ला बिब्दिनो गमथाथा थायोलै बियो । थिग आसे आं दा लानानै थांगोन दे ।

(मिनिस्त्रिया सोरबा सेंग्रानाव मबाइल बुहर बावयो ।)

यै-नों बहा दड ? मैयाथ थिख मुजि थरदोंना नोंसा ? खैथासिम जाखो ? हरनि थामबाजिसिम ? बा, मानिनांगोन दे नोंसोरखौ ।

**फनाव रिफैनाय राव:** नोंसालाय ? दिनै माथो बहाबा प्रग्राम दडनो ?

**मिनिस्त्रि:** थोत, मानसिया एसे आलादबासो, आं बेबादि गुरगुजियाखौ फसायनाय मोनथारा । आं नोंसोर बायदि हुरसां-हुरसिंखौसो मोजां मोनो । ओहो ओहो, न, नेभार, आं लाइक खालामा, बाइक सालायनायावबो बारा एक्सपार्ट नड, हिन्दीखौ एसे रोंगौब्लाबो इंराजीखौ रोंगुबैथारा ।

**फनाव रिफैनाय राव :** बे बायदियानो मजबुत, तनतना जायोलै फाग्लि । बि बायदिखौ मोन्नाया खाफाल गोनांसो बाश्रा ।

**मिनिस्त्रि:** खाफाल गोनां नडहाय फाग्ला, खाफाल हावरियानिसो सिन । मेट्रिक फेइलफोरजों गारजानाय हौवासो बियो । आं हले मिथिया, नों बे बायदि बुंबाय थाब्ला नोंनावनो थांगोन आं ।

## सोदोमसिनि बोर ना साव

(Network cut जायो, खेबथामसो कल खालाम फिनदोंमोन-  
Network busy दिन्थिजायो। रागा जोंडे। बेनि उनाव गुबुन  
साथामसोंनो कल खालाम बावयो, Network busy जायो, रागा  
जोंना मबाइलखौ खुबै खुबनो नागिरो, जोब्रेलायो। बे समावनो बिमा  
हाबबोयो)

**सिंखावरि:** माबोरै जाबावनांगौ आइ मिनि ?

**मिनिमि:** माया मा जानो ?

**सिंखावरि:** जिबनखौ बिब्दि हगारसार थारनायजों मा जाबावनो फालाय ?

**मिनिमि:** सेक्सपियारा मा बुंदों मिथिबाय ?

**सिंखावरि:** सेक्सपियारा सोर बिखौनो मिथिया आं, आरो बिनि बुंनाय बाथ्राखौ  
आं माबोरै मिथिलायखो ?

**मिनिमि:** मुलुगनि जेबो खौरां मिथियै नों बायदि ओंखामदोनि गोदोना एबा  
हरख्लाखौनो बारनो रोडै मानसिया आं मा जादों, मा जायाखै बेखौ  
बोरै-मिथिनो फालाय ? सेक्सपियारा बुंदों मा 'बे मुलुगा गंसे गिदिर  
साइनासालि, मुलुगनि साफ्रोमबो मानसिफोरानो साइनासालिफोरनि  
बायदि साफा-साफा फावगिरिल। टियेटाराव सासे बिथोनगिरि  
थानाय बायदिनो बे मुलुगनि सुबुंफोराबो इसोरजोंनो दाजादों,  
दैदेनजादों, बिनि थिन्नाय बादिसो जों साफ्रोमबो जिउ दैदेनदों।'   
बेनिखायनो आयै, भगबाना आंखौ बिब्दियैनो-आखल दिन्थिनो बिथोन  
हरदों। दानिया बुंदो नों-नोंनि थिन्नायखौ मानिनो ना भगबाननि थिन्नायखौ  
मानिनो आंलाय ?

(बे समावनो साथाम सेंग्राफोर हाबफैयो। साफ्रोम बोयानो मबाइल लादों।  
गान्नायफोरा फानथाब-फुनथाब।)

**मिनिमि:** नों सिडव थान्दो आयै, आंनिया लोगोफोरा फैबाय। नों थाफाब्ला  
आख'-फाख' जागोन, औ आयै बायाब्ला चाहा फुदुंनानै लानानै फै।

(बिमाया रागाजों सिडव हाबलाडे। सेंग्राफोरा गावबा गाव मबाइलजों  
सोरजोंबा सोरजोंबा बाथ्रा राइज्जलायहैयो। मिनिमिजों- नांजाबलायनाय

## सोदोमसिनि बोर ना साव

जिरायनानै मबाइलाव माबा-माबि सावगारि नायो आरो मिनिग्ला ग्लाबलायो । बे समावनो मिनिस्त्रिनाव कलफैयो-गाव गोसोथोनाय सेंग्राणि ।

**मिनिस्त्रि:**कमरेदफोर, आपलोक तडी समय के लिए चुप हो जाव, Silent please, silent please-my comrades; Here is my dumb darling's call over my mobile. Let me talk with him, you listen.

(call receive खालामो) हेल्ल, सोर बुंहरदों ? अ, you my darling, नों मानो दाबोनो फैदिया ? फुंथारावनो फैनो बुंनाया मानोथो दाबोनो फैदिया, आं बिब्दिखौ एखेबारे सैथारा । मा होन्दों ? गोबारै बुं..... ।

**मबाइलनि राव :** सरी देइ- मिनि, आं दिनहै बिरात सरी । बाइका पाम गैया, गेरेजाबो 10 (जि) बाजिनि सिगां खुलिया आरो गेरेजसिम लांनायाबो बिरात बाथावथावथार ।

**मिनिस्त्रि:** बाइकआसो पाम गदों ना नोंहासो पाम गदों ? आं बिब्दि थोरलौ-लौ सेंग्रा खौ साबजानाय मोनादे ।

**मबाइलनि राव :** नों आंखौ फोथाय दारलिं, आं मानो गावनि अनजालीखौनो फोलानो फालाय ।

**मिनिस्त्रि:** आंनो नांगौ मेनेज मास्थार, नों बायदि पाम गखोमाला बायग्रा खानसि बमाखौ आंनो नांला ।

(मिनिस्त्रिया रागाजों मबाइल कात खालामो । सेंग्राफोरा चिगारेट सोबनो सलाय सुखां हां जानाय समाव मेरगा हाब बोयो)

**मेरगा :** बेयो सेंग्रा सिख्ला आदा मारिग्रा फार्क नड दे-हाराय बांखो फोर ।

(सेंग्राफोरा उमु-सुमु गावजों गाव नाय लायो । एसे गिनायबो दिन्थियो ।)

**मिनिस्त्रि:**मेरगा

**मेरगा :**मेरगा नड, आदा मेरगा ।

**मिनिस्त्रि:**बिसोरो आंनि असे लोगोथारसो । आं लाजियो नोंनि आखलखौ ।

**मेरगा :**नों आंनि आखलखौ लाजियो, नाथाय आंदि नोंनि आखलखौ

## सोदोमसिनि बोर ना साव

मुगैयो.....you feel ashame of me, but I hate yours, understand-? नोंसोर सोर-सोरनि फिसाज्लाफोर ? नोंसोरनि बैसोया बेसेबां जाखो ? नोंसोर मा फरायखो ?

**मिनिस्त्रि:** आंनि लोगोफोरखौ बे बायदि लाजिफोनाडेब्ला आंबो नाथाय नोंखौ गोरलैयैनो नागारनाय नड। आंनिखुइ गात्रिसिन रावबो थानाय नडदे।

**मेरगा:** यै-सारेना आथोना सियालफोर-गेट आउट, ऑंखारलां। (सेंग्रालोगोफोरो ऑंखारलांनो नागिरो, मिनिस्त्रियाबो थांफानो नागिरो।)

मबाइलनि एमफौफोर, आरो नोंनि लामाया बिजों नड, नों सिडव थां। बाइजोयावबो सेवनाय सेंग्राफोरजों लाइन मारिनो थोया, नयावबो लाइन मारिनो थोया। बैजात जाथारदोंना नों- ?

**मिनिस्त्रि:**गावबा बेसेबां मोजां, सानफ्रोमबो जौ लोंग्रा, जौजों मोखां सुग्रा। (रागाजों सिडव हाबलाडे)।

**मेरगा:**(सिफियाव सोनानै लाखोमानाय 1/4 बटलनि जौखौ बटलैनो लोंसनो। बे समावनो मोगथाडआ बाइकआव सानै सिख्ला लानानै हाबबोयो। मोगथाड सिख्ला सानैखौ दोनथनानै गावहा सिडव हाबलाडे। सिख्लाफोरा बखानानै दोन्नायाव बेनस जिरायानानै मबाइलाव माबा नायबाय थायो। मेरगा जौ लोंनायखौ नायनानै गावजों गाव फाव खालामबाय थायो। मेरगायाबो सिख्लाफोरखौ नायनानै माबा-माबि फावखालाम हरबाय थायो। उनाव सिख्ला फोरनि खाथियाव फैनानै जौ लोंनो जासिलाय, खावलायाव एरहां, गान्नाय जिखौ दांनायहां खालामबाय थायो।

**मेरगा:** Not drinking you wine? नोंसोर नाय जारौमोन, बेयो जौ नड बेयो जादों इसोरनि बिदैसो-जायखौ लोडेब्ला मुलुगखौनो समाइना रमाइना नुनो। बेयो मुलुगनि मानसिफोरखौ अन्नो थाखायनो (2 नं सिख्लाखौ गोबानो नागिरो।)ओहो नोंसोरथ मोजां मावयाखिसै, नोंसोर आइन भंग खालामबाय; नोंसोर जादों लेखा फरा गोरों, गियानी सियान, समाइना-रमाइना सिख्लाफोर, नोंसोर मिथिगौ- 'लंकायाव थांब्ला राबन जायो।' बेवहाय फैब्लाबो जौबो लोंनांगौ आरो अनलाय नांगौबो। दे एसे जौ लों,

## सोदोमग्नि बोर ना साव

एसे अनलायनो (2 नं सिख्लाखौ जौ दौनो नागिरो आरो गोबानोबो नागिरो। सिख्लाफोरा गिनाय आरो रागाजौ होज्रिखावयो, सिख्लाफोरनि होज्रिखावनायखौ खोनानानै मोनथाड ओंखारबोयो)।

**मोगथां:** क्या हुवा? What happen? सोर मा खालामदौं ?

**1 नं सिख्ला :** (गाबनाय गारांजौं) बियो, बि गुन्दाया जौखौ जेबो जेबो खालामनो नागिरदौं। जौं बेवहाय थाबाय थालिया, थुदो थांफिननोसै।

**2 नं सिख्ला :** गिनायजौंनो बिखाखौनो खावसे थांनाय बादि मोनथारबायजौं मोगथां। जिउआनो ससे बारगथार बायमोन।

(मेरगाया फारसे थाहैनानै मोसेर नायहरो आरो मिनियो।)

**मोगथां :** मदारु साला, जौया लौंदौं, एमफौया खरयाव दावखोदौं- लम्फट बायदि खामानि मावदौं। नन सेनस, नखरनि मान सन्मान जाग्रा।

**मेरगा:** सिख्लाफोर, नौंसोर जैरे आंखौ गिदौं-औरै नोमा-नोमफामोनहाबो नौंसोरखौ गिगासिनो दंथारो-बेखौखि नौंसोर मिथिगौ ? आरो मोगथां भाइ, आंनि लम्फटा सिडवलसो; नौंदि बाइहायाव बेसेबां लम्फट खालामहैयो बेनि Live दिन्थिनो नामा ? आरो आदा आंजौं नखरनि मान-सन्माना नस्ट जायाखै, आं रैखा खालामनोसो नाजा गासिनो दंथारो।

**मोगथां:** नखराव मानसि सासे फैदाव हालिया, लाजि गैया गैया सिख्ला गोबानो नागिरग्रा- मदारु साला, (बुनो आखायदिखाडो, मेरगाया हमथायो)।

**मेरगा:** बेयो टाइ कन्द एबा मल्ल जुद्धनि रि नड मोगथां भाइ, बेयो अनलायनायनि सो थावनि। आरो नौं मिथिया जानो हागौ बाइकनि एमफौ, जौ लौंग्राफोरजौं भगवाननि साक्ति थाफादेरो, नौं आंजौं बुलायनो हानाय नड।

**मोगथां:** बे सिख्लाफोरखौ मानो गाज्रि गाज्रि एदावआ नौं- सैमा ?

**मेरगा :** सैमाया जायगा दाबसेयाव थाथेरनो हाया, बेयो सुन्दाव सुन्दाव बहा खि दड, बहा खि गैया नागिरला बायो। जैरे नौं, मानोना आंथ नखौनो गारखाया। आरो नाय, बाइक गंसेयाव सानै सिख्ला गाखोहोनाया आइन बेरेखा। नैबे (1 थि सिख्ला) सिख्लाखौ नौं गोसो थोयो, बेखौ आं मिथिगौ, (2 थि खौ) आरो नै बिखौदि आं गोसो थोयो बेखौसो नौंसोर मिथिया।

**मोगथां:** (दाद्रि होयो)

**मेरगा :** आया नौंहाल सानै गाहाम सिख्ला लानानै-आंहा सासेखौनो मोनाब्ला मा जानांगौ। मिथिबायना दावमैना (2थिखौ) आं नौंखौ गोसो थोनाय



## सोदोमसिनि बोर ना साव

बाश्नाखौ ?

**मोगथां:** (बुनो आखाय फोलावयो, नाज्रित लायो, दावराव जायो-। बिमा-बिफा, बिनानाव ओंखार बोजोबो।)

**मिनिस्त्रि:** आदा मोगथां, बियो दहाय आंनि सेंग्रा लोगोफोरखौबो होखारहरदों; जौ लोडै-लोडै-गाज्रि जाथारबाय बियो। बिखौ सद 'न हो। नखरनि बदनाम खालामग्रा।

**सिंखावरि:** जौखौ बांद्राय लोंथारबाय नों-मेरगा।

**बुद्दिराम:** सिंखावरि, बे जायगायाव जोंहा सुख गैला, गन्थनि रैखाथिबो गैला, जिउनि रैखाथिबो गैलिया, सासे मटर साइकेल फाग्ला, सासे मबाइल फाग्ली आरो सासे मदारु, जौ फाग्ला! (सिडव हाबलाडो)

**सिंखावरि:** फेसानिफ्राय फेसा जोनोम जायो, मानसिनिफ्रायथ मानसि जोनोम जानांगौमोन.....! आं माबायदि गथ 'फोरनो आहार दौबोफ्रांखो फालाय गसाइ? (गाबो) आंनि मा दाइनि थाखाय आंखौ बेफोर बायदि फिसा जोनोम होहोखो, मानो, मानो गसाइ? (खर बुयै-बुयै गाबो)।

**बुद्दिराम:** (थप्ला लानानै हाबबोफिनो) थुदो-सिंखावरि, बहा सौहैयो-ओंखार लानोसै।

**मोगथां:** आयै आरो आफा, नोंसोर थानो मोना, नांगौब्ला आंनो खारलांगोन। आरो आं बाइकखौ गाबोन्नो फान्नोबो बाइग्रा नागिरनोसै।

**मिनिस्त्रि:** आयै आरो आफा, नोंसोर आंखौ गारनानै थाडोब्ला आं सोरजों थाबावनो? नोंसोरजों आंबो थांफागोन आयै।

**मेरगा:** बा बिसोरनि रावफोरा। सासेया बिमा-बिफाखौ गारनानै खारनो नागिरबाय, गुबुन सासेया बिमा-बिफाखौ खारनो थिनबाय। आंनिया नाथाय आलादासो, आयै आरो आफा, नोंसोर बे ननि हख्लाखौ बारनानै जेरावबो थानो मोना, आरो आंबो जेरावबो थाड। आं जादों सदेसी, बिसोर सानैया जादों बिदेशी।

**मोगथां :** मेरगा.....

**मेरगा:** नोंनि मटर साइकेलनि आरो मिनिस्त्रिनि मबाइलनि प्रदाकसन कम्पानि फोरा बाइजोनि, आंनियाथ लकेल प्रदाकसन। आंनियाव हारिनि हारिमु हाबनानै दड; नोंसोरनियाव गैया।

(मोगथां आरो मिनिस्त्रि मोनहा रागाजों सिडव हाबलाडो। सिख्ला सानैया

## सोदोमसिनि बोर ना साव

गोनो-गोथो थाबाय थायो।)

**सिंखावरि:** जारौमोन, नोंसोर सोर जाखो ?

**मेरगा:** नैबे सासेया आदा मोगथांनि आमथा आमथा आरो नैबे सासेया नागिर गासिनो दड; आयै, आंनो लाखिदोना। आं प्रमिस लाबाय दानिफ्रायनो आं जौ लौला, आं दा फोन मोन्नाय सासे बैरागी बायदि जानानै थानोसै।

**बुद्धिराम:** मेरगा-बाश्राफोरा सालाइ हमथानानै बुं।

**मेरगा:** नंगौ, आफा, बिसोर सानैखौ जों बिदा-फंबाय सानैनो बिहामजो हिसाबै लाखियोब्ला नखरा गोजोन जागोन, खौसेथि फैगोन-मानोना बिसोर बिजावजालि सानैया बिलोगोखा। जों बिदा फंबाय मानिबा बुलायलायब्लाबो एबा नांलाय लायब्ला- बिसोर जोंखौ ब्रेक हमनो हागोन। लाखिगोन ना मा, फ्लिस, अन्नानै।

**सिंखावरि:** जायो जाया मोगथानियाव सोंग्रोनांगोन।

**बुद्धिराम:** आं लाजिनाय मोनबाय, नोंसोरखौ लानानै आंहा एरसोनो बेनखर, बे समाज राइजोयाव थावनि गैलिया। आं जादों सासे गोदान सदोमसिनि साव नांनाय अबुद्धिराम. (ओंखारलाडो)

**मेरगा:** मिथिबायना जारौमोन, नोंसोरनि देलायनाय, खानाय हानाय, गान्नाय जोमनाय आरो महरखौ लानानै नोंहावआ गिसे-लाजिसेनो एरसो हैनांबाय।

**सिंखावरि:** नोंसोर बहानि, सोरनि मा जायो आइफोर ?

**1 थि सिख्ला:** जों बे ओनसोलनि नड, कक्राझार हस्टेलनिसो।

**2 थि सिख्ला:** आदा मोगथां, फैदो फै थांफिनोसै।

**मोगथां:** (हाबबोनानै) नोंसोर बेवहायनो थाथदो-आं गेरेजाव बे बाइकनि ग्राहक नागिरनो खिन्था हैनि। आयै बिसोरखौ दाहगारहर। (थाडो)

**मेरगा:** हाबानि थाखाय खरच लाबो फाखादो-आफाया पुरहित हमनो थांबाय।

**सिंखावरि:** मिनिस्त्रि आइ बि आइ-मोनखौ सिडव लांदो।

**मिनिस्त्रि:** थौ-बाजैमोन। (बयबो थाडो। मेरगाया-

**मेरगा :** दहायसिम जौनि निसाजों खरखौ सुग्लायहोदोंमोन, दानिफ्राय आं संसारनि निसाजों सुग्लाय होलांनोसै। जौ बटला आंनि लोगोमोन, दानिफ्राय संसारा जासिगोन आंनि अराइ लोगो।

( फैसालि गोग्लैयो )

गोमोर रोडै अरगें

गोमोर रोडै अरगें

## : आखुफोर :

1. जैराम : 55 बोसोरसो बैसोनि-बेरामी ।
2. जोंखिल्ल : जैरामनि बिसि
3. रोमै: 14 बोसोर बैसोनि-जैरामनि फिसाजो ।
4. दाबारु: 24 बोसोर बैसोनि जैरामनि फिसाज्ला ।
5. डाक्टर:
6. जाब्रां अजा :
7. देतसुं : जैरामनि बिनानावनि फिसाज्ला ।

## गोमोर रोडै अरगें

(बेलासे सम, जैरामनि न। जैरामा बारान्दायाव दाहा बनायाव उन्दुनानै लोमजानायजों नेरगासिनो थायो। फिसाजो रोमैया बिफानि खरयाव दै दासोमै-दासोमै गय बिगुरनि गिसिबजों बार सिबै-सिबै होबाय थायो। जैरामा सम-सम गुजुनाय आरो सानायजों नेर बाय थायो)

**जैराम :** जॉख्लि आइ, नोमाया बहा थांखो ? मानो दाबोनो फैदिया आइ ?

**रोमै :** दकानाव थांदों आफा, सौफैसिगोन।

**जैराम :** रोमै आइ,.....

**रोमै :** मा आफा ? दै लोंनो नामा ? देहाखौ गात्रि मोनथारदों नामा आफा ?

**जैराम:** आइ सना, आं सहायनो हाया, हाया मोनथारबाय रोमै आइ।

**रोमै:** हामा आफा, फंसे बाश्राखौनो गले-गले बुंबाय थानो। नों सिरि था आफा, बारा बाश्रा दा बुं।

**जैराम:** मानो, मानो आइ, आं मानो बाश्रा बुंनो मोना ? आंहा बुंनायनि मोनथाय मानो गैया ? (गुजुयो)

**रोमै:** एसे बाश्रा बुंब्लानोदि नों सहायखनो हालायै गुजुयो।

**जैराम:** आथिं दंमोनब्लाबो आथिं जों आं थाबायनो हालिया, उखैब्लाबो आं जानोबो हालिया, मोनजालियाबो, आरो खुगा दडब्लाबो बाश्रा बुंनो हालिया। बेयो मानि साजा गसाइ, बेयो मानि बान्था ? बुं-बुं गसाइ (गाबो).....

**रोमै:** (बिफानि मेगन मोदै हुगारनानै) नोंबो बिब्दि बुडोब्ला-जॉनि गोसोयाबो बोलो बायो-आफा, गोसो आरो मिजिड थेर-बेथेर जालाडे। नों गोसो फोरा, जॉनो गोसोनि बोलो हो, साहस हो।

**जैराम:** मेगनजों गबोनाय मोदैखौ हुगारनानै देहानि बेरामा बहा हामनो आइ रोमै हावरियानि नखराव जोनोम जानानै सुबुंमिनि मोनथाइ नों गोमानांबाय-आं-आंनो बेफोरनि दाइनिगिरि आइ।

**रोमै:** नों बेफोरखौ मानो रोनावला बायदों आफा ?

## गोमोर रोडै अरगें

**जैराम:** रोनावनाय एबा आवनायनाय नड रोमै, बेफोरो जादों थार जाथाय । थरथिंसे गाइखेर एबा माइरं-खेन्दासे गैयाबालानो, मोदोमखौ फानफबनो जिख्लाबसे जिसिरि गिजि गैयाब्लाबो आरो अखा-बारहुंखानि समाव एरसोनो जग्रबसे देरा एबा दन्दर गैयाबालानो नोंखौ आं जोनोम लाहोबाय.....

**रोमै:** (बिफानि खुगाखौ हमथेहरनानै) दाबुंसै, आफा, दाबुंसै । नोंनि जिउआव जा जादों, आंनि खाफालाव जा जुफिदों-बेफोर गासिबो आफा आनान गसाइनि गेले होहरनायसो । बिनि सोरजिहोहरनायावसो जों मुनुस मैयाफोरनि जोनोम ।

**जैराम:** बिदिब्ला फिथाइनि थाखाय बिफां थैनांनाय एबा गुबुनांनायाबो आफा इसोरनिनो गेलेहोनाय नामा आइ रोमै ?

**रोमै:** औं आफा, बेफोरो इसोरनिनो गेलेहोनाय ।

(बे समावनो जोंखिलया जेखाइ-खबाइ लानानै नयाव फैयो ।)

**जैराम:** हे आफा इसोर, मानो, मानो, मा दाइनि थाखाय बेफोर बायदि साजा आफा ? मा पापनि थाखाय बेफोर बायदि साजा ? (उन्दु लाडे, जोंखिल आरो रोमै मोनहाबो गावजों गाव नायज्जायनानै गाबो आरो गोबालायो ।)

**रोमै:** नों ब'हा थाडमोन आइ एफा गोबाव ? आफाया बायदि बाश्ना बुंनानै गोब्रामनाय, फारसेथिं आंनि जेंना, बेफोरखौ लानानै आंदि एखनब्ला सहायखनो हायै बायदि मोनो । नों आंखौ गारनानै दाथां दे आयै-आं गोसो मोदोम बायफलेलांलायनाय बायिद मोनथारो ।

**जोंखिल:** गोसो गोरु खायसो आफा इसोरा जोंखौ बेबायदि नखराव जोनोम होदों आइ । सहायनो हायै गोसो गोरलैफोरखौ धोनि नखराव जोनोम होहरदों । नों नाय आइ, इसोरा जोंखौ जुनि नोजोरजों नायगासिनो दड । बिनि बेफोर आनजाताव जों देरहानो हायोब्लानो जोंनि जिउमाया सोरगोयाव जायगा मोनहैगोन । जोंहा मोन्नांगौ एबा खोमानांगौ जेबो गैया-मानोना सोरजिगिरिनि खाथियाव जों जादों नेहात सोरजि ।

**रोमै:** नों ना गुरहैनायालाय बहा थांजोबखो ?

## गोमोर रोडै अरगें

**जोंखिल:** (माइरं थप्लाखौ दिन्थिनानै) जोंफोर बायदि हावरियाफोरनि जेखाइआव ना-नाथुर गाखोया, माइरं-संखैफोरसो गाखोयो। थांदो आइ, बे माइरड जावसोनानै सोरां-बारां जानहैदों।

**रोमै:** (माइरं थप्ला लानानै) जागोन दे आयै।

**जोंखिल:** आरो नै, आं नोमबौ जाब्रां अजाखौ लिंबोदोंमोन। फैनोनो नागिराखैमोन, नोंदा देतसुंखौसो लिंबोनो होदों आं।

**रोमै:** आदा देतसुडा दाखालै आदाखौ लोगो मोन्दों मोन्नो।

**जोंखिल:** रोमै, नोंनो आं गले-गले खिन्थाबोबाय, नोंहा बिदा-बिनानाव रावबो गैया, आं नोंनि अनगा रावखौबो जोनोम होयाखै, आरो जदि होदोंमोनब्लाबो आं बिखौ इसोरनो दान होबाय।

(बे समावनो देतसुडा जाब्रां अजाखौ लानानै फैयो) अजाया एसेलेंग्रादब, थखन लायो, गांसे जिनि मना आलायो)

**देतसु:** रोमै, आबौनो आथिं सुनो दै हो।

**जाब्रां अजा:** जागोन दे, (आथिं-आखाय सुयो आरो जिरायो।)

**जोंखिल:** जिरायदो आफा, माबा लोमजानायानो हामथाराखसै। खावरिफोर नायदो-ननिसो ना हाग्रानिसो मोदाय अरखो, मा बार गात्रि लोगो मोनखो।

**जाब्रां अजा:** थैनाय-थांनाय इसोरनि आखायाव-आं नेहात जाब्रां अजाया मा खालामनो हागौथाय। थेवबो नायनाय जागोनबे।

**जोंखिल:** बिब्दि नडहाय आफा, गोसो होनानैनो नाजाथार। आं उनफोराव राहाफोर जायोब्ला माबाफोर गिदिर मानखौनो बावहैथारगोन।

**जाब्रां अजा :** अग्रिम गैयाब्ला बाखिजौल मालाय बोरै जानो आफि। जुगआ जैरे बायदि जाबोदों। सिफियाव रोजासे रां लानानै ऑखाराब्ला नयावनो हाबफै फिन्नाया मुस्किल जानानै फैबाय। नोंथ मिथिगौ आंहा मा दड। नखर सामलायनायनि हाल-खदाला बेनोसै आंनिया। नैबै लावथि आरो मना लानानै मानसिफोरनि न-न गिदिडब्ला नयावनो हाबहैफिन्नांगौया महा जाला। आरो दा मोनसे जिउखौ लानानै गिनांगौया जादों-साफ्रोमबो अजाफोरानो मानसिफोरनि सुथुर।

## गोमोर रोडै अरगें

**जोंखिल:** बेफोर बाश्राखौ दोनथदो आफा, दा बुंदो माखालामनांगौ ।

**देतसुं:** अजाफोरानो मानसिफोरनि सुथुर जानाय बाश्राखौ दोनथदो आबौ । बेखौ नों सिन्था खालामनो नाड ।

**जाब्रां अजा :** बेखौ लानानै आंबो गिखाया; मानोना इसोरनि पानजामुथियाव आं मानसिफोरनि आखायावनो थैनाय लिरखानानै दडब्ला गिनानै आं बहा गनो । आरो गिनानै मालाय बहानिफ्राय मा जानो लखराखौलाय ?

**रोमै:** आबौ, आफाखौ सोखानायनि माबाफोर राहा खालामदो । आफा गैयाब्ला जोंहादि रावबोयानो गैलिया ।

**जाब्रां अजा:** र आबै, बारा बोदोर बावलि जानानै बाश्रा दा बुं । आंनि नैबे लावथि आरो जलंगा थासान्दि आंथ माबा मोनसेखौ खालामखागोन । आरो नाय आबै-मेगनजों नुनायाव, खोमाजों खोनानायाव आरो आखायजों दांनो मोन्नायाव सोर दडसोर गैया बैयो अरजाबाय, अरजानांगौया जादों-सोर सहायसुंदों, सोर सहाय सुडाखै बेसो । जोंहादि नुनो मोनै, खोनानो मोनै आफा सोरजिगिरि दड-बेखौ हले दाबावदे आबै ।

**देतसुं:** यै आबौ जों नोंनिफ्राय लेकसार खोनासंनो लाबोयाखैथ-नोंखौ । आमायखौ फाहामनोसो लाबोदों ।

**जोंखिल:** देतसुं सिरि थथ' ।

**जाब्रां अजां:** बुंथों, बुंनो हो । आं गाज्जि मोना । नोंसोर बायदि बायहाजार सेंग्राफोरनि खथ गोबां बाश्रा खोनाबोफेरबाय आं । आं बेफोरखौ जेबो साना । नंगौ, आं मिथिगौ, आंखौ बुंलाय नाड, आं मानसिफोरनि नयाव लेकसार होनो थाड, खामानि भावनोसो थाडे; खामानि भावनो माने-बेमार फाहामनो । आसी आंनो गिलासाव दै, थुलुनसि बिजौ, खर गोनां माइरं गरनै लाबोदो । आं खामानिखौ जागायनोसै ।

**रोमै:** र आं लायनो । (लायनो थाडे)

**जाब्रां अजां:** नै आबौ, थां नों लाइजौ आरो फुल दावदै बिबार, जबा आरो गोमो गाबनि बिबार लायदो थां ।

**देतसुं:** जागोन दे आबौ । (सिखा लानानै थाडे)



## गोमोर रोडैः अरगें

**जाब्रां अजा:** थालिर लाइखंबो गुरसे लाबो खादो दे आबौ । (मिनिसोनानै) सेंग्राथ', बोराय-बोराय बुंनाय बाश्राफोरखौ हजम खालामनो गोब्राब मोनो बिसोरो ।

**जोंखिल:** बेफोर दायनि थाखाय निमाहा बियो आं आफा, दाय-फोदोखौ दोनथथारनानै बिखौल फाहामदो । (रोमै आरो देतसुं मोनहा लायनाय मुवाखौ लानानै फैयो ।)

**जाब्रां अजा:** आं थ बुंखाबायानो ना-आं नाजागोन होन्नानै । मैनागुरि, थाइगिरगुरि, खुमुरसालि फोरनि मानसिफोराथ हर सान बे जाब्रां अजायानोसै । सानफोराव माबाफोर गोरोन्थि नुयोब्लानो जानोबादि जालायनानै रायनानै हुहरगोन, नायब्ला हनै हरना-गुना सोरबा फिसौ लोमजानाया, सोरहाबा बिहामजो लोमजानाय, सोरहाबा न' लायै नि न' लाहोनाय बे जाब्रां अजा नडब्लानो जेरैबो खाना ।

**जोंखिल:** मानसिखौ फोजानांगोन नामा आफा ?

**जाब्रां अजा:** औ, फोजानांगोनथ । फोजानानै सोडब्ला-उन्दुलानाय मानसिखौ माबोरै सौलायखो ? दे फोजादो आबै-नोमफाया ।

**रोमै:** (बिफाखौ मोदोमाव नारनानै फोजायो । बिफाया सिरि मोनो, सिखारनो नाजायो, गोग्लैफिनो) ।

**जैराम:** ओ, सोर, मानो फोजाखो आंखौलाय ?

**रोमै:** सिखारथदो आफा, आइआ फैबाय, आबौ बो फैदों- नोंनो मुलि लाबोदों ।

**जोंखिल:** दे एसे जिरायनो नाजादो । बेसे बिसनायाव गोग्लैसोबाय थानो फालाय । नोंनो गोसो मोदोम हगारसारनानै गोग्लैनानै थायोब्ला बोरै जानांगौ फालाय ? गोसोफोरा फोरानानै लाहाय बिफा ।

**जैराम:** आखाय-आथिडनो सोलिलाब्ला, देहायानो बान जाथारलियाब्ला गोसो गोरा लानानैल बिसोनायाव गोग्लैसोबाय थानानै मा जानो जोंखिल ।

**देतसुं:** (जैरामखौ हमथानानै) दे, लासै-लासै जिरायनो नाजा आमाइ । गोसो थायोब्ला देहाया लासैनो फैफिनगोन बे ।

**जाब्रां अजा:** र-बा, नों गोसोखौल हमथा, देहाखौ आं दड । आं थिक खालामगोन ।

## गोमोर रोडै अरगें

आंनि आखायाव गोगलैबाय होमबाथाय माथो दंबावो । नैबे लावथि खेंखा,  
दिंखिया बिलाइफोरजों जारिसे जारिनानै मुलि गोथां गबा गब जाब्लानो  
राखांगोन बे । गोसो गोरा मोन्नायनिबो मुलि होलांगोन आं-गथ-नों  
जिंगादासि ।

**जैराम:** जिंगा सिमालाइ मा जानो, जिंगा सियामालाइ बहा बारगनो- आदै ।

**जाब्रां अजा:** देनाय आदै-मा मा खस्थ मोनो एसे खिन्थानाय ।

**जैराम :** जेबो जेबो मोनो, एसेलजों बबेखौ खिन्थाखनो आदै ।

**जोंखिल:** बिखा सानाय, सिं सानायफोरखौ खिन्थादों आरो मा ।

**जैराम:** औ, बिखा सायो, एखनब्ला औरैबायदि मोनोजेन न बोराय गेब्रेबलांनाय  
बायदि । माब्लाबा बिखानि खामि हाराफोरखौनो बटल बायनाय बादिं  
ग्रेब-ग्रेब मोनलाय थारो । एखनब्ला थानो हायै बायदि अरदावो । फेन्दानि  
बबेबा हाराखौबो बायनाय बायदि मोनो ।

**जाब्रां अजा:** आरो मा मा मोनबावयो ?

**जैराम:** एखनब्ला-एखनब्ला हासुनायावबो जोबोर जेंना मोनो आदै ।

**जाब्रां अजा :** जिंगादासि गथ, जारिलाय, पुजा-होलाय, नालाय; मोदाय रुजालाय  
खालामनानै अल क्लियार खालामगोन आं ।

**रोमै:** नाजाथारदो आबौ-आफाखौ फाहाम-थारदो । आफा गैयाब्ला जों आइजों-  
आंजोंल संसार जानांगैया अराइ खोमसि जागोन । (गाबो)

**जाब्रां अजा:** मावगोन, नोमफानि साखु-सुखुफोरखौ फोजोबथारगोन आं । आं  
गुबुन अजाफोरबायदि जाखां-लौंखांसो खामानि मावग्रा नड; आंनिया  
खामानियाबो सिगां, गुबुन खामानि फोरा उन थारावसो आरो आं गुबुन  
अजाफोर बायदि खुगाजों जाग्रा नड । आंनिया आखायासो सिगां, खुगाया  
उनावसो । अदेबानि आं खोब खोथा रायज्जायो, मा खालामनो आबै-  
आबौमोनिफ्राय मोनबोनाय हुदा जाबाय नालाय ।

**देतसुं:** हाब आबौया माथो-दाबोनो जलंगाखौनो बेखेवया । माब्ला जलंगा खेवगोन,  
माब्ला मन्थ आवरायगोन-आमाइआ माब्ला मुलि मोनजागोन, आरो  
माब्ला हामगोन जाखो ?

## गोमोर रोडैः अरगें

**जाब्रां अजा:** होत फिस्सौ नों मा बुजिनो, गासैबो बेरामफोरानो मुलि जानायलजों हामजो-  
बाथ' । मन्त्र जारिनायजों हामनाय बेरामबोथ गोबां दडना । ( मना खेवजेनो ) ।

**जोंखिल:** दे आफा, माखौ खालामग्रोयो-खालामदो ।

**जाब्रां अजा:** औ, फंसे बाथ्राखौसो सोंनो बावदों, जेसेबां गिदिर-गिदिर डाक्टरानो  
जाया मानो-बिसोरनि बेराम सिनायनायानो मोनसे गुबै राहायानो जादों-  
सोंनाय । इंराजीयाव बेखौनो बुडे-History लानाय । बेरामीनि  
History लाया गारा बिसोरो जेबो आनजारबो लाया, मुलिबो होया ।

**जोंखिल:** जोंनि बेनि डाक्टरफोरालाय माथो जेबो सोडबोलाय । माबाफोर खिन्थानो  
नागिरब्लानो जों मिथि खागौ होन्नानैसो लोगो लोगोनो मुलि लिरनानै  
हरो ।

**जाब्रां अजा :** बेनोब्रा फारागा; जोंनि बेनि डाक्टरफोरनि आरो बाइजोनि  
डाक्टरफोरनि सिक्त्सानि फारागा ।

**जोंखिल:** जागारगोनबो नामा ।

**जाब्रां अजा:** जागारगोनबो नामा नड, बिब्दिनो थार आफि । दानिया बुंदो दे-  
जैराम आदै नों बिब्दि बिसनायाव गोग्लैनानै थानाया बेसे गोबाव जाखो ?

**जैराम:** बोसोरसेयानो जाबायलै आदै ।

**जाब्रां अजा:** आ-नोंथ मब्लाबा पुलिचजोंबोथ हमजाखांबाय नडना ?

**जोंखिल:** हमजायाखैबा । मा हमजानायल सिखारलायनो हायै बुनानै गालानाया  
लाय माथो फाफिफोरा ।

**जाब्रां अजा :** थिखोना बुलांथारनायना फिसा ?

**जैराम:** फंनै बुजेन्नायखौ थाल मोन्दोंमोन, बेनि उनावनिखौ गैया-एसेबो थाल  
मोनाखिसै ।

**जाब्रां अजा:** पुलिसनि लावथियाव जादु दडलै, बुजेन्नाय फंसे एबा फंनैखौल  
थाल मोनहोयो, उनाव दोखो-दोखो बुग्लिनायखौ थालखौनो मोनहोया ।  
सिखावफोरखौबो फंसे-फंनै बुप्लागोन, लकापाव सोनानै मोनायाव  
हगारगोन, नाथाय सिखाव एबा दाइनिगिरि नडैखौब्ला गाग्लि-गाग्लि  
दोखो-दोखो बुगोन । उनाव लकाप, बेनि उनाव जेलाव ।

## गोमोर रोडै अरगें

**जोंखिल:** हा बिहामालाय पुलिस थानायाव सानथाम, जेइलाव ददानसो थाहैनाडाखै होमब्ला ।

**जाब्रां अजा:**जेइला जादों मोजांखौ गाज्रि, गाज्रिखौ मोजां खालामग्रा जायगा ।  
नडाना जैराम ?

**जैराम:**बेफोरखौ आं मिथियालै ।

**जाब्रां अजा:**ठेलाजों बन लायनायखौ हमखौ ना सोरबाया मोसौ खावदों होन्नाहै हमहोखो ?

**जैराम:**आदै, मानो हमहोखो बैखौ नों दासोंसै । पुलिसा फैदों, लामायाव लोगो मोन्दों, हमदों आरो बुदों ।

**जोंखिल:**दे आफा, माबाफोर मावनांगौब्ला थाब मावदो ।

**जाब्रां अजा:**आं बेरामखौ हमनो हाबाय । माबा-माबि मावनांगौब्लाबो आं दिनहै मोनसेल मावनोसै । आं फैबाय जेब्ला न नि मोदाइखौ एसे राइसनाहै होनोसै आं । एखनब्ला बिसोरबो बोराबनानै थायोथ । आरो बिसोर बोराबब्लाथाय डाक्टर-अजा रावनिबो जेबो मुलियानो अरनो नागिरा ।

**जोंखिल:**दे आफा, मा मा जगारनांगौ बिदोल ।

**जाब्रां अजा:** आंनो बारा बाबा बुबु जगार नांलाया, लाइजौ, बिबार-गोजा, गोमो, गुफुर, थुलुनसि, माइरं, सिन्दुर, अगरबाधि, आलारिबाधि फाथै गय जरा आरो थाव एसे लाबोदो ।

(गासैबो मुवाफोरखौ जगारमोनखांनानै जाब्रां अजाया सितलानि सानजाहा मोखां जानानै गिलाचाव लानाय दैजों लिरफामो आरो ननि मोदायखौ रायसंनो थाखाय आसन बानायो ।

**जोंखिल:** फाथैथ गैयाहाय आफा ।

**जाब्रां अजा:**माहाजोनफोरनि औवासुडव फाथै आवनिफोर मोनोखोमा-बेफोरखौनो लानानै फै ।

**देतसुं:** र आं लाइनि आनै । ( ओंखारलाडे ) ।

**जाब्रां अजा:**फाथै गैया-फाथै आवनि होगोन, गाइखेर गैया-रन्दै होगोन, दावदै गैया अन्थाइ दुलुर होगोन- । दावदैखौ इसोरा गावनो सोरजिदों माने

## गोमोर रोडै-अरगें

अन्थाइखौबो गावनो सोरजिदों, थिक बिब्दिनो फाथै आवनिखौबो गावनो सोरजिदों । सोरजिगिरि इसोरा औरैनोब्ला जोबोर थिउरिया, नाथाय बिब्दिनो बियो अनसुलाबोदे आफि । आसन बसाइनाय आरो रायसंनाय फोरा थिख जायोब्लानो बियो सुगलायो, अनो आरो बिब्दिजोंनो जोंनि बेराम-आजारफोरा हामो ।

( देतसुड फाथै आवनि लानानै फैयो आरो अजानो होफैयो । गासैखौबो थाख थिख खालामखांनानै अजाया जैराम; न, आरो गुबुन गासैखौबो दै सान्थि सारनानै फोथारनानै लाग्रोजोबो । लाइजौ बनानै गय जरा-फथै जरा बावयो; बाथि लगायो, लाइजौनि आगदा थिं लाइजाम बयो आरो प्रसाद होयो । गासैबो थाख-थिख खालामखांनानै बियो अजा गायो ।

मन्थः

एहेम दे, साननि गिरि सानजा  
मोदायनि गिरि बुरा बाथौ महाराजा  
खोनासं आइफोर-आफाफोर  
बैसोमाथायानो साखखि दड।  
सैथोनि गिरि सैथो राजा,  
माननि गिरि महाराजा,  
मानाव थानांगोन दे आफा,  
सैथोयाव थानांगोन दे आइ ।  
दिनै जैराम गथिया  
बोसोरसे हालागौनिफ्रायनो,  
बिखा सानाय, मोदोम सानाय  
आखाय-आथिं सानायाव  
आइखां-बाइखां जानानै  
बिसोनायाव गोग्लैसोनानै दड।  
एहेम दे सोरजिगिरि बिमा  
खांगिरि बिफा,

## गोमोर रोडै अरगें

मानिनांगोन, नायनांगोन आइफोर-आफाफोर  
जैरामनि साखुब-सुखुबखौ  
होखार थारनांगोन ।  
एहेम दे आइफोर-आफाफोर,  
लाइजौ बनानै- गय जरा-फाथै जरा बावनानै  
आलारि बाथि सावदों, धुपधुना सावदों  
गोथार गोसोयै निमाहा बिदों-  
खोनासं, खोनासं, आइफोर-आफाफोर  
जैरामनि जानानै बिजिफिसाफोरनि  
खुलुमनायखौ खोनासं ।

(जाब्रां अजाजों लोगोसे बयबो खुलुमफायो ।)

**जाब्रां अजा:**दे आइ, आबै-आबौमोन, बेमारीनि, मोजानि थाखाय सोरजिगिरिनि  
खाथियाव आरज गाबदो ।

(बयबो आरज गाबो)

**जोंखिल:**नै आफा-बुरा बाथौ महादेब, आइ पार्वति बिमा, हावरियानि नखराव  
बेमारि दोननानै मानि एफाबां गिदिर साजा बेलाइ ? बुं आइ आफामोन-  
गैजारोडैनि दाहाखौसो सहायनो ना रुगियानि दुखुखौसो सैजो हानो  
आंलाय ? मानो, मानो बेफोर मानो आफा ?

**रोमै:**आफा जब्रा जानानै थायामोनब्ला गुबुन लोगोफोर बायदि आंबो फरायनो  
मोनगौमोन । आंनि गोथार गोसोजों खुलुमनायखौ नाजावफैदो आफामोन,  
आफाखौ मोजां खालामदो ।

**जाब्रां अजा:**दे जैराम आदै, नौबो आफा इसोरजों एसे रायज्जायदो । बोर-  
बानसा बिदो ।

**जैराम:**आंखौ थाबैनो उदां होदो आफा, आंनि बिसि आरो फिसाजोखौ जेंना गैयै  
खालामदो । आंनि बबे गोरोन्थिनि थाखाय आंनो बेफोर साजाखौ जाबसिन  
हरखो नों ? गलाब बिफांनि सुया गलाब बिबार खाग्राखौ सुनो थाखाय  
ना बै बिफांखौ सुब्रेयै-सुब्रेयै फोथैनो ? आं मिथिगौमोन कमला बिफांनि

## गोमोर रोडै अरगें

सुफोरा कमला फिथाइखौं खावनानै जाग्राफोरनिफ्राय रैखा खालामनाय !

**जाब्रां अजा:** (गिलाचाव जारिनाय दै गोथार लानानै) नैबे गिलाचनि दैया साधारन दै नडदे, दै गोथारसो । बेखौं फुडव खेबसे मोनायाव खेबसे लों; नैबे बरि, बेखौं गरनै-गरनैयै खेबथाम जा आरो इसोरखौं जिरन गैयै गाबज्रिबाय था । हामगोन, हामथारगोन, हामथारनांगोन । आं थांनोसै, थैनाय थांनायखौं लानानै बारा सान लाबाय थानो नाड, बेयो आनान गसाइनि आखायावसो । (जोंखिल्या लाइजौयाव सेजौं रां होनानै खुलुमो । रोमैयाबो खुलुमहरो । जाब्राड ओंखारलाडे ।)

**जोंखिल:** रोमै आइ, नोमफानो आं ओंखाम माइदि लोंहोनो, ओंखामा संदोदे । देरहासात आनै, थां बोरमा खानाया लायदो थां ।

**देतहासात:** बोरमाखौं नायनानै आं नयाव थांब्रबगोन, दा मोनयावसो फैसिगोन आं (ओंखारलाडे)

(रोमैया ओंखाम संनो माइरं सुयो, सितलानि अगदाबाव अर जरायो) जैरामा रुखु-रुखु गाबो ।)

**जोंखिल:** हामाहाय बिफा, नों मानो एफाबां हगार सारथारो होमब्ला, एसे गोसो हमथा, हामगोन ना, मानो बे बायदि गाबबाय थालाय नांगौनो फालाय !

**जैराम:** थैनाया संसारनि मोनसे खान्थिखा बिमा, बेखौं नों गिनानैब्लाबो गया गाबनानैब्लाबो गया, मेगनाव मोदै, खुगायाव खुदै आरो बिखायाव दुखुनि दावदाब लानानैब्लाबो गनायखानांगोन । बे संसारनि खान्थिया सोरनियावबा सिगां फैयो, सोरनियावबा उनाव फैयो ।

**जोंखिल:** थैनाया संसारनि खान्थिखा होन्नानै जों नोंखौं बोरै थैजानो लुबैनो बिफा ? थैनायखौं रावबो एरायनो हाया होन्नानै जों बोरै नायगार-नायगार बुथारनानै लानो ?

**जैराम:** नों हानांगोन, बिमा, नों गनायनांगोन ।

**जोंखिल:** थैनाया जेरै संसारनि आरो मोगथानि सैथो, थिग बिब्दिनो-नोंजों आंजों, आरो नोंजों-फिसा रोमै जोंनि सोमोन्दोयाबो मोगथानि सैथो । थैनाय होन्नाय सैथोया जोंनि गेजेराव सोखावनाय आरो गाबनाय लाबोनो, नाथाय

## गोमोर रोडै-अरगें

सोमोन्दोनि सैथोया अरजाबनाय आरो गोजोन्नाय लाबोयो ।

**जैराम:** नड जॉख्लि, बाथाया नों बुजिनाय बादि नड । जेब्लासिम नों थैनायखौ बरायनो हाया, गोथैखौ गोजोन गोसोयै बिदाय हरनो हाया, अब्लासिम नोंनि मोगथांनि सोमोन्दो, रंजा-बाजा फोरा ऑंथि गैयै जानानै फैगोन ।

**जॉख्लि:** (गाबनानै) बिफा-नों मानो बिब्दिल बुंग्रा जाथारखो फालाय ?

**जैराम:** मानोना थैनाय गैयामोनब्ला नोंनि जोनोम, नोंनि थामोनथा आरो नोंनि गोनांथियानो गैया जागौमोन । नों बुजिनानै ला जॉख्लि, साबसिन इयुननि थाखायनो थैनायखौ नांगौ । नोंसोर दासान, गिनोबो नाड जे-आं थैखांनयनि उनाव नोंसोरनि संसार जानाया गात्रिसिम जागोन । आंल नुहरो आंनि थैनायजों नोंनि संसार जानाया गोजोनसिन आरो सुखु गोनांसिन जाबोगोन-

(जॉख्लिया खुगा मुथुहरनानै गाबो ।)

**रोमै:** आफा, नों जेबो दाबुंसै । (सासे डाक्टर, उन-उन दाबारु हाबबोयो आरो एरसो फिनलाडे । डाक्टरखौ नायनानै) आयै हनै सोरबा फैदों ।

**जॉख्लि:** सोर जाखो फिसा ? मा नागिरनानै फैदों नों ?

**डाक्टर:** (गोनो-गोथोजों) आं सासे डाक्टर, नोंसानि लोमजानाय मानसिखौ सिकित्सा खालामनो फैदों ।

**जॉख्लि:** डाक्टर, जोंहानि लोमजानायखौ फाहामनो फैदों ?

**डाक्टर:** औ ।

**जॉख्लि:** नाथाय नों बोरै मिथिखो जोंहानाव लोमजानाय दड होन्नानै ? आरो नोंखौ सोर लिंबोखो ?

**डाक्टर:** मानो, नोंसानि मानसियानोथ लिंहेदों ।

**जॉख्लि:** जोंहानि सोर मानसि ?

**रोमै:** आदा देरहासात लिंहेदों खोमा ।

**जैराम:** जोंफोर बायदि बड़ि गरसेनि फैसा होनो हायै नखराव सासे गिदिर डाक्टरनि आगान, गोमोथावथारथ । नों आंखौ सिकित्सा खालामनो हागौ, नाथाय जों नोंनो रांखौ माबोरै हरनो हालायखो डाक्टर ?



## गोमोर रोडै अरगें

**डाक्टर:** नायनायनि थाखाय आंनोथ रां नाड, मुलिन रांखौ मोनोब्लानो जाबाय ।

**जैराम:** बे मुलिन रांखौनोनथ जों माजों हरनो ?

**डाक्टर:** रांखौथ जाय लिंहेदोंमोन बिनो हरनो होन्नानै बुंबोदों ।

**जोंखिल:** लिंहेनाय बि मानसियानोनथ सोरमोन ?

**डाक्टर:** बियोथ बे नखरनिनो फिसाज्ला होन्नानै बुंदों माथो ।

**जैराम:** आंहा रावबो फिसा हौवा गैया, गोदो दड्मोन जानो हागौ-बियो गोबावसै थैनाया । बिनि गोथै बोगारनायावनोनथ आंहा बेमार थालांदों । डाक्टर बाबु नोंथाड थांफिनो हासिगौ ।

(बे समाव दाबारुया हाबफैयो, बिमा बिफाखौ खुलुमनो नागिरो, बिसोरो बादा होयो)

**जैराम:** बे मानि फाव जाखो दाबारु ?

**जोंखिल:** अ-बिदिब्ला डाक्टर लाबोप्लानानै बुथारनो फैनाय सेंग्राया नोंसो ?

**रोमै:** आदा..... !

**जैराम:** खबर्दार सेंग्रा-आंनि नयाव सोड हसिया हाबफैना नै जोंखौ फोजोबस्रानो फैनाया । रोमै नोंबो गोजानाव था । बियो मासे गोमोथाव जिबि-जायनि हांजों बिष गबोयो, जायनि मेगनजों अर ओंखारबोयो । बियो, बियो बे पृथिबिनि जिबि नड, बियो बे संसारनि जिबि नड, बियो जादों राइक्षस, जम राजानि थान्दै-बिफा बुथारग्रा, बिमाखौ गोदोना सेर थेग्रा इदिपाचसो ।

**जोंखिल:** नों, नों मानो नुजाफैबावखो जोंनि मेगन नोजोराव ? नोंनि मुडै जों बै समावनो नारजै संनानै जाहोखांबाय राइजो-राजाफोरनो, नोंहा दा बे जायगायाव जायगा गैलिया, नों ओंखारलां, नों थाबैनो ओंखारलांफिन ।  
(बे समाव दाबारुया गंसिनानै थायो, रोमैया गाबो आरो डाक्टरा जेबो बुजिमोनैयाव गोदाव सोराव जायो ।

**जैराम:** हाइ गसाइ, मानो जोनोम होया नों बेबादि बिमा बिफानि खर जाग्राखौ ?

**दाबारु:** आइयै आरो आफा.....

**जोंखिल:** खबदार-सेंग्रा-नों जोंखौ बिमा बिफा लिंनांगौब्ला ।

**दाबारु:** नोंसोर आंनि खुलुमनायखौ नाजावदो आरो बे पापी फिसाज्लानि जोबथा

## गोमोर रोडै अरगें

बाश्रा फंसेखौ खोनासंदो ।

**जैराम:** हे भगवान मानि साजा बेयो- जॉनि जिउयाव बेफोर मानि सहायख हायै जाला ?

**जॉखिल:** दाबो नों थाडखै ना भुट ? दाबो नों ओंखारलाडखै ?

**दाबारु:** आंनि जोबथा फंसे बाश्रा आइयै-आंनि जोबथा फंसे बाश्रा आं- बुंगौमोन ।

बे बाश्राखौ बुंनो मोनाब्ला-आंनि गोसोया माब्लाबाबो गोजोन्नाय नड आरो देरसिन बाश्राया जादों- बे बाश्राखौ खोनायाब्ला नोंसोरनि जिउमायाबो माब्लाबाबो गोजोन्नाय नड । रोमै बिनानाव, नों आइ-आफा मोनखौ बुं, दान्दिसे सम आंनि जोबथा बाश्राखौ जाहाथे खोनासडो । बे बाश्राखौ बुंनो मोनाब्ला, नोंसोरबो खोना सडब्ला बिमा बिफार्जों फिसाफोरनि गेजेराव थानाय सोर्गोयारी सोमोन्दोयाव गुण अरगोन; बिमा-बिफाया फिसाफोरनि सुथुर, आरो फिसाफोरा बिमाफोरनि पापी जोनोम जानानै थागोन-जाय सोमोन्दोया संसारखौ बिषनि अरजों रुमु-रुमु सावबाय थागोन !

**जैराम:** पापीफोरनि खुगायाव पाप होखारनायनि राव ! बा बेसे मोजां । हे भगवान ड. फचटाच बादिनो आंबो दिनै हांखायनो लुबैदों- बे पापी गथनि महरखौ नुनायनि सिगां आंनि मेगनखौ एरख्लनानै लां, बिनि रावखौ खोनानायनि सिगां आंनि खोमाफोरखौ बेंगा खालाम, बिजों राइज्जलायनायनि सिगां आंनि खुगाखौ बबा खालाम, आरो राजा हरि चन्द्र बादि खादायाव लानानै दैबायनाय बादि बियो दैबायनो हागौ बेनिखायनो जॉखौ नों दानो फोथैनानै लांफैदो गसाइ..... ! (गाबो)

**डाक्टर:** नोंसोरो मा बाश्रा राइज्जलायदों, नोंसोरो सोर-सोर आं एसेबो बुजिनो मोनाखिसै । आं थांनो ना थाबाय थानो ?

**रोमै:** डाक्टर बाबु, नों थांथनो नाड-बेयो जॉनि नखरनि जाथायब्लाबो नों एसे खोनासं आरो आफा आदानि गेजेराव थानाय गोरोन्थिखौ सुद्रायनानै हो ।

**डाक्टर:** जाथायनि गुदियानोथ बबे जाखो ?

**रोमै:** बियो जादों आदा-दाबारु । नखर गारनानै थांनाय बा बोसोरसो जाबाय ।

## गोमोर रोडैः अरगें

आदाखौ पुलिस फोरा नागिर फैना नै मोनैयाव आफाखौ खेबथाम जेलाव सोखांबाय ,आरो बोसोरसेनि सिगांनिफ्रायनो पुलिचफोरजों बुजानानै आफानि बे हालोत । गुसुडैः बेनो ।

**डाक्टरः** न गारनानै खारदों, पुलिसफोरा बिखौ नागिरदों-मोनैयाव बिफाखौ बुखुबसे बुखुबनानै जेलावबो सोदों, बिफाया दिनै बेंगुरा, जब्रा, फिसाज्लाया बिफाखौ फाहामनो डाक्टर लाबोदों-आरो अ-आं बुजिबाय ।

**जैरामः** बिनो डाक्टर बाबु, गावहा आखायाव हाथियार दैनानै-पुलिसनि खुगायाव आंखौ थुसोम हरनाया ।

**जोंखिलः** बिखौ नागिरनानै मोनैयावनो जों सानैखौ जुनात बायदि आखल दिन्थिफैदों पुलिसफोरा । बोराय होन्नानै बिखौ नागाराखै, बिमा होन्नानै आंखौबो रेहाय होयाखै । बिनि देहायाव लावथिनि साजा, आरो आंनि मोदोयाव इज्जोत (गोथारथि) नि साजा ! जों सहायबोनांदों- डाक्टर बाबु-जों गले-गले सहायबोनांदों ।

**रोमैः** थांखांनाय बेफोर बाश्राखौ दा एरखांसै आयै, बावगारनो नाजादो ।

**दाबारुः** आं मिथिजोबदों आयै आरो आफा, आंनि थाखाय नोंसोर देहानि आरो गोसोनि साजा मोन्नांनायफोरखौ ।

**जैरामः** मानो मिथिया जानो, जाय समाव जों पुलिसनि लावथिनि बुब्राब नायाव बाब्राब-बाब्राब सहायखहायै खेंखाय-खेंखाय गाबनांदोंमोन, जाय समाव नोंनि जोनोमगिरिनि मोदोमाव जि गैया जादोंमोन-बे समाव जानो हागौ नों थालिर बिफांयाव थाखोमा-थाखोमा नायखोमानानै मिनिखोमा हरदोंमोन ।

**दाबारुः** नंगौ आं थालिर बिफाडव थाखोमा-थाखोमा नायखोमा हरदोंमोन, नाथाय रंजानाय गोसोजों नड, दुखु आरो गाबनाय जोंसो आफा; नोंसोर फोथाय आंनि गोर्बोया बेसबां गाबदोंमोन !

**जोंखिलः** एफाबां दोखो दोखो बुग्लि होनानै बुथारनो हायैखाय दिनहै मुलि दौनानै बुथारनो नाजादों नों ?

**दाबारुः** आयै, नोंनि खुगायाव बे राव ? नड आयै नों गिनाय बायदि नड । आं

## गोमोर रोडे अरगें

पापी, पापनिफ्राय उदां मोन्नो थाखानोनथ आं दिनै नोंसोरनि खाथियाव ।  
आं बै नोंसोर नुनाय बादारु नंलिया, दा आं गोदान बादारु । दिनै आं  
नोंसोरनि साव जानाय सासेबोल । नोंसोरनि निमाहा, आरो अन्नाय बोर  
मोनोब्ला बाल्मिकि जानानै.....

**जोंखिल:** (दाद्रि होनानै) लांसुनियानि खुगायाव रामायण-महाभारतनि बाश्रा ?  
बाल्मिकि एबा रत्नाकर सिखावआथ बिमा-बिफानो जाहोयो  
लोंहोयोसोमोन, बियोथ माब्लाबाबो जोनोमगिरिफोरखौ साजा होयाखैमोन !

**डाक्टर:** बे बोसोरबायाव नोंसोरो माब्लाबा लोगो मोनलायदोंमोन ना ? नोंसोर  
बुजानाय, नोंसोरनि सायाव पुलिसफोरनि अन्नाय-अत्यासारनि सोमोन्दै-  
दाबारुया माब्लाबा खौरां लाफैनायना ?

**जैराम:** खौरां लाफैफेराखै ।

**जोंखिल:** खथ मानसिफोरनि सिगां-सिगां बुंनायमोनजों दाबारुखौ लोगो मोनब्ला  
खिन्था, जोंखौ एसे नायफैथों, बिमा-बिफानि खौरां लाफैथों होन्नानै ।

**जैराम:** मानो नायबावखो डाक्टर-बाबु-जोंनो दौनो लाबोनाय बिषनि मुलिखौ  
दौदो आरो थैहाबनानै बुथारग्रा बेजिया ब्रे सुदो । जों एखेबारे दान्दिसेबो  
थानो लुबैथारलिया, बिनि साया साइख्लुम नायनो हाथारलिया जों ।

**दाबारु:** आयै आरो आफा, नोंसोरनि जिउयाव साफिफैनाय गासैबो दुखु-दाहानि  
थाखाय आंनोल दाइनिगिरि, बेखौ आं रुजुन्नानै लायो । बे दाइनिगिरि  
पापि दाबारुया बेनिखायनो फंसे बाश्रा बुंनो लुबैयो । डाक्टरबाबु आरो  
बिनानाव रोमै, नोंसोर आंखौ फोथायनानै आइ-आफाखौल खोनासंनो  
खावलायदो । आंनि खेंफोरथिखौल खोनासं, होमब्लानो आं  
आनज्रायलांगोन नोंसोरनि मेगननि नोजोरा नुहरसयै, खोमाजों खोनासयै  
आरो गोसोजों मोन्दांस हायै बेसेबा गोजान जायगायाव ।.....

**जैराम:** आंनि गोथै देहायाव नों हले आखाय दाहो दाबारु । नों पापी आखायजों  
आंनि मोदोमाव आखाय होयोब्ला भुट जानानै नोंखौ गाग्लोब फिनगोन  
आं ।

**डाक्टर:** आसी, आं नोंसोरनि नखरनि जेबो नड, दिनैनि सिगां आं नोंसोरखौ

## गोमोर रोडै-अरगें

नुफेरनायबो गोसोयाव गैया। नोंसोरनि जिउनि जाथायजों आंहा जेबो  
नांफानायबो गैया। होमब्लाबो आंबो फंसे बाथ्रा बुंनो सानबाय।

**रोमै:** बुं आदा, नों बुंलां। नों नुबायना आदा-आइ-आफानि दुखु-दाहानि जाहोनानो  
जादों आदा बादारु-आरो आदानि दुखुनि जाहोनाबो आइ-आफा  
मोनहानो। नों एसे बुंलांदो।

**डाक्टर:** आंबो बुजिबाय आदै-आरो मादैमोन नोंसोरनि दुखुनि जाहोनखौ हमनो  
हाबाय। नोंसोर बिमा-बिफा आरो फिसाज्जलानि गेजेराव सोमजिनाय  
गावसालायनाव आरो साजा मोन्नांनया खुगानि रावजों-फोरमायखनो  
हायै। आदै आरो मादैमोन-हमनानै लाबाय जे नोंसोरो दाबारुखौ ननिफ्राय  
होखारहरबाय, दाबारुया खारलांबाय बहाबा। आदै, नोंनि देहाया नों  
बुंनाय बादिब्ला जोरनाय नंलिया। बारु, हमनानैबो लाबाय नों जिउ  
गोमालांबाय आरो बेनि दुखुयावनो मादैयाबो उन उन गोमालांफाबाय।  
थालांबाय रोमैया। दानिया मावरिया रोमैनि बिबानखौ सोर लागोन?  
बिनि मावरिया जानांनयायनि दाइनिगिरिया सोर जागोन?

**जैराम:** आंथ थाखालिया, डाक्टर बाबु, आंनि आयुया जोबथा रुगुं मोनफैबाय।  
डाक्टर मानसि एसे नायब्लानो नों हमनो हाखासिगोन।

**डाक्टर:** नों माब्ला जिउ जोबो बेखौ आं बुंनो हाया, बेयो जादों इसोरनि आखायाव।  
आंनि सोंथिया जादों रोमैनि मावरिया जानांनयायनि दाइनिगिरिया सोर  
जागोन? सासे आलाइ-सिलाइ सिख्लाखौ समाजनि मानसिफोरा मा  
नोजोरजों नाजावगोन? बिनि जानाय, थानाय, गान्नाय-जोमनाय आरो  
फरायनायनि बिबानखौ सोर लागोन? लामानि सोरबा लांसुनिया सेंग्राफोरा  
बहाबा गाञ्जि नोजोरजों एदावयोब्ला?

**रोमै:** आदा, बेफोरखौ नों मा बुंदों?

**जोंखिल:** डाक्टर बाबु फिसा रोमैआ बे बायदि जायोब्ला आं गोथै हाखरनिफ्राय  
भुट जानानै सिखांबोनानैब्लाबो गाञ्जि मानसिफोरखौ साजा होफैथारगोन।

**डाक्टर:** आरो दाबारु नों मा खालामगोन?

**दाबारु:** आं जिउ थाजासिम जुजिगोन, बिनानावखौ खैफोरनिफ्राय उदां

## गोमोर रोडै-अरगें

खालामगोन ।

**डाक्टर:** मादैया बुंदों मा भुट जानानैबो रैखा खालामफैगोन, बे नंखाय । थैखांनानैब्ला नोंबा बहा थाहैगोन, रोमैयादि नोंनि फिसामोन बेखौबा मिथिनो हानाय जायोना जाया । दा गोथां समाव मावनो हानायखौनो मावयाखै नोंसोर-आरो थैनानै थांयोब्ला- नंखाय, एखेबारे नंखायथार । आरो दाबारु, नोंबो लाथिखयाव उरायनाय सासे हारिनि पाइकि । थैजासिम जुजिगोन- साबाइस, गोमोथाव-नोंसोरनि दावहारु-बिर जोहोलावफोरनि हास्थायनाया । नोंनि थैनायजोंथ नोंनानावनि खैफोद । जोबनाय नड न । नों जदि दावहा नांहांनायावनो थैलाडोब्ला-नोंनानावखौ सोर रैखा खालामगोन ? नोंखौ जदि बिनानावनि मेगनावनो सुथुरा नायगार-नायगार साजा होनानै बुथारोब्ला-अब्ला बिनानावआ बबे दुखुखौ सहायखनो ?

**जोंखिल:** डाक्टर बाबु, नों थांदो थां, नोंहा गुबुन बेमारी नायनांगौ थागोनना, गोबावसो जाबाय ।

**डाक्टर:** आं बे नखराव बेमारी नायनो फैदों, बेमारखौ आं संनो हाबाय-बेखौ आं फाहामनो नाजागासिनो दड । बे बेमारखौ फाहामखाडब्ला आं थाड ।

**रोमै:** आदाया दैफोरसो लोंगौमोन नंदां ?

**डाक्टर:** बेसे गियान गोनां, बेसे निसपाप, आजोलि सिबाय रोमै । बिनि मिजिंका मोखाडवनो रोखा-रोखा सिखांफैदों । बेखौखि नोंसोरो माब्लाबा बिमा-बिफा होन्नानै, बिदा होन्नानै बुजिनो नाजादोंना ? बि गथनो नोंसोरो फरायनो होनो हायाखिसै, गान्नो जोमनो, थानो-जानो थिक मते होनो हायाखिसै-बेनि दाइनिगिरिखौ नोंसोरो सोर लागोन ?

**रोमै:** आदा, नों मा खामानियाव फैदोंमोन बेखौ मावनानै थांफिनदो ।

**जैराम:** बेफोरो जोंनि नखरनि जाथाय डाक्टर बाबु-नोंहा गावनि खामानिखौ मावहैदो थां ।

**डाक्टर:** बे गंसे बै गंसे नखरजोंसो गामि एबा समाज दाजायो, नोंसोरनि नखरनि जाथाया-जादों जोंनि समाजनि जाथाय, समाजनि जेंना । जोंनि समाजाव गोबां बिमा-बिफाफोर दड-जायफोरो फिसाफोरनो मोजां लामा दिन्थिनो

## गोमोर रोडैः अरगें

हायाखै । फिसाफोरनो फरायनाय आरो गियाननि जुजिलायनायनि बारहावा दायबालानो लॉनाय जानायाव गफबग्रा दड। जायनि थाखाय गथफ्रा सारोन जानानै आवसारि जालाडे । आरो समाजाव एंगार जानाय हान्जा जाहैयो । ( जैरामा गुजुयो )

**दाबारु:** डाक्टर बाबु आफानि हालोत । मोजां नंधारा, अन्नानै.....

**डाक्टर:** नॉसोरबो, दाबारु नॉसोरखौबो बुंनंगौ दड। लेखा फरायनाय आरो गियान आरजिनायखौ नेवसिनानै आखायाव खामलाबग्रा जिरात लानानै हादोद जै खालामनो थांग्राफोर । गोदोनि दिनाव राइजोखौ दाहाल-थुंग्रिजों जै खालामोमोन आरो बेफोरजोंनो राइजोबो खुडोमोन । नाथाय दा राइजोखौ जै खालामो आरो खुडे मेलेमजोंसो । राइजो खुंनाय आरो राइजो जै खालामनाया जाहारबारियाव मै होनो थानाय एबा अमा गावनो थानाय नड दाबारु ।

**दाबारु:** डाक्टर बाबु, बेफोरखौ नों मा बुंनो नागिरदों ?

**डाक्टर:** प्रब्लेमा बेवहायनो; आंनि बे गोरलै बाथ्राखौनो बुजिनो हायाब्ला बे एफा गिदिर भारत राष्ट्रनि बेंगिरिफोरनि फाव-सोलो फोरखौ नॉसोर बोरै बुजिनो ? नॉसोरनि दैदेनगिरिफोरनि बिखानि थै गोदौख्लायलायनाय, खोमोन गसंख्रालायनाय बिबुंधियानो गासैबो सैथो नड दाबारु-बिब्लिजों नॉसोर देरहासात जानो हाया । दैदेनगिरिफोरनि गिदिर-गिदिर लेकसारव खावसेयानो नंखाय खौरां थाफानो हागौ ।

( बयबो सिरि, दान्दिसे सिंस्र; निजोम । )

दानिया बुंदोनायसै दाबारु: मा फंसे बाथ्रा बुंनो नागिरदोंमोन नों बिमा-बिफानो ?

**दाबारु:** माने आं गोसो जानानै आखायाव हाथियार दैयाखैमोन । जेब्ला आं मेट्रिक टेष्ट आनजाताव फेइल जानानै बेंगालर थिं खामानि मावहैनो होन्नानै रेइल टिकिट दान्नो थाडे अब्लानो जों साथामखौ गारियाव दिखोनानै बहाबा गोजान अरन बारिनि केम्पाव लानानै थाडे । आरो बै जायगायावनो थैनि चहि लाहोयो ।

## गोमोर रोडैः अरगें

**डाक्टर:** बै सुक्तिनामायाव मा लिरनाय दडमोन ?

**दाबारु:** मिथिया, सासेया बुंदों से बोसोरनि ट्रेइनिं लाथारनांगौ, नडब्ला गावनो गावथारनानै लानांगौ। आं थांनानै थानो जोबोर गोसो, आइ-आफाखौ लानानै आं जोबोर जिंगा, बेनिखायनो आं ट्रेइनिं खौनो लानो थांगारनायसै।

**डाक्टर:** ट्रेइनिं जोबनायनि उनाव ?

**दाबारु:** ट्रेइनिं जोबनायनि उनाव भारतारी पाइकी फोरजों दावहा नांनो लुबैनाया मेवबाय थायो; भारतारी बेंगिरिफोरनि फारसे मुगैनाय बिसोरजों थाजाबनो बानाया बांबोयो-जोबोर हारि अनग्रा जाबोयो। एफा-एनै केलि-मेलिखौनो सहायनो बाग्रा आरो गावखौनो गाव हारिनि सासे बोगदात जोहोलाव मोनग्रा जाबोयो।

**डाक्टर:** नोमा-नोमफायादि पुलिसफोरजों इनाय खालाम जादों बेफोरखौ बहा नुनायमोन नों ?

**दाबारु:** बेफोरखौ आं केमेरायावसो नुदों। जौनि बसआ दिन्थियोमोन।

**डाक्टर:** दा नोंमा थांखि लाखो ?

**दाबारु:** दिनै आं मोन्दांनो हाबोबाय जे लेखा-फरा गैयाब्ला बे एफाबां गिदिर डेमक्रेटिक राष्ट्र भारतजों जुजिनांगौया मोनसे बेसेबा गिदिर बाथ्रा। हाथियारजों दावहा नांनानै जों राइजो लाबोगोन- गुबुनासो उनाव मेलेमजों सेनानै लाफैगोन। लेखा रोडैयादि जेरावबो उदाया, अराइबो गुबुननि सिडव थानानै खामानि मावनांगौ-बेखौ आं मोजाडैनो बुजिनो हाबाय डाक्टर बाबु। बेनिखायनो.....

**डाक्टर:** बेनिखायनो मा ?

**दाबारु:** आं आफादिनफ्राय आजिरा लाबाय। आरो दा आइ-आफा आरो बिनानावजों थाफानानै हारिनि खामानि मावलांनोसै।

**डाक्टर:** जोबोत मोजां थांखि आरो हाबा। आं बाखोनायबाय।

**दाबारु:** नाथाय आदा आं बायदि गियाननि हावरिया मानसिया मा मावनानै जालांनो ?

**डाक्टर:** नोंसोर बायदि लेखा फरा रोडै हाथियार दैग्राफोरनि देरसिन जेंनायानो



## गोमोर रोडै अरगें

जादों-बेनो-आं मा मावनानै जागोन ? नोंसोरनि दैदेनगिरि फोरा बेनि सायाव बिथांखि आरो सोलो नाजावनानै लानांगौ । जायखि जाया, नों सानोब्ला-नोंनि खामानिनि राहाखौ आं होगोन ।

**दाबारु:** नंगौना आदा ?

**जैराम :** ( बेमारा बारा जायो, आइखां-बाइखां खालामो ) बिमाया फिसाज्ला-फिसाजोखौ गाबज्रियो । दाबारुया डाक्टरखौ बिफाखौ नायनो बुडे )

**जैराम:** जोंखिल-आंखौ गोजोनै थानो होदो- । नों फिसाजोखौ लानौ थानानै थादो । डाक्टर बाबु-नों मिथिबाय जानांगौ आंनि देहानि आरो गोसोनि जेंनाखौ-नों थान्दै जानानै फोसावनानै हो-जाहाथे रावबो फिसाफोरा दाबारु बायदि हाबा दामावथों । आरो फंसेबाव-आंनि गोथै देहायाव बिखौ आखाय हो होनो नाड । हायोब्ला रोमैखौ बिनानाव खालामहैनानै बिनो सुबुंमिनि मोनथाइखौ होदो ।

जोंखिल, जोंखिल.....फिसा रोमै.....(जोबथा हां-बोयो, जीउ गोमायो । बयबो गाबस्राव जोबो) ।

**दाबारु:** आफाया आंनि थाखायनो अबधिरायै बिखायाव दुखुनि दावदाब लानानै थैलानांबाय । आफानि थैनाय आरो दुखुनि गासैबो दाइनिगिरिया आनो । दिनै आं गारां हब्रा-हब्रा बुंनो लुबैदों-हाथियारजों हारिनि उदांमि लाबोनो नाजानायाव आं दिनै बिफाखौ अबधिरा खोमानांबाय, बिमाखौ पुलिसफोरनि अन्याय खामानियाव गथायनांबाय । आरो आं बुजिबाय जे बे जुगा जादों गियाननि, दावहानि जुग-जेराव जों बायदि गियाननि आंखालफोरा जायगा गैया !

( फैसाली गोग्लैयो )



मोदोमफ्रु रेष्टुरेन्टआव सोदोमसिनि खबाम

“मोदोमफ्रु रेष्टुरेन्टआव-  
सोदोमसिनि खबाम”

## : आखुफोर :

1. दावहारु: 45 बोसोरनि गोसोजों बोरायनो रोडै।
2. रिगाव: दावहारुनि बिसि, भि.चि.डि.चि. नि आफादगिरि।
3. रिमोनला: दावहारुनि फिसाज्ला, मेट्रिक पेल जानाय।
4. जोमै: दावहारुनि फिसाजो, कलेजनि फरायसुलि।
5. बिरदाव: जोमैनि गोसोथोनाय सेंग्रा।
6. बिरबाइना: रिमोनलानि गोसोथोनाय सिख्ला।
7. गाइथें: जौ फान्नानै जाग्रा रान्दि, दावहारु गोसोथोनाय।
8. गावदां: बान्जायगिरि (Receptionist), रेष्टुरानि।
9. राखेब: रिगावनि पि. ए. (पार्चेनेल एसिसटेन्ट)
10. गुबुन सानै आइजोफोर, आरो रेष्टुरेन्टनि वेटारफोर सानै।

## मोदोमफ्रु रेष्टुरेन्टआव सोदोमस्रिनि खबाम

(गावदांनि मोदोमफ्रु रेष्टुरेन्ट। मोनाबिलिनि नुथाय, सिगां गावदांआ धुप-धुना लानानै गणेश खुलुमगोन; बोर बिगोन। बिरदाव-जोमै, मोनहा हाबफैग्रोगोन, चिकेन चावमिन अर्दार होगोन, फारसे खनाजों जिरायहैगोन। रिमोनला-बिरबाइनामोन हाबफैगोन, चिकेन पलाव अर्दार होगोन, गोसोथोनायनि बायदि बाश्रा सावरायगोन, दावहारु-गाइथें हाबफैगोन भेज सावमिन आरो पर्क पकड़ा अर्दार होगोन। उनथाराव लोगो साथाम लानानै रिगाव हाबफैगोन, बिसोरो गेजेरावनो जिरायनानै बियेर लोंगोन, एवनानै लाबोखानाय बेदरजों। ब्लैक स्किमनि रां बाहागो रानगोन। रान्नायनि हिसाब मिलियै, खम-बारा होलायनायखौ लानानै ग्रें-ग्रें-गु-गुं जालायगोन, नेरलायगोन। बिरदाव-जोमै मोनहा अर्दार होनाय चिकेन चावमिन आरो दावहारु मोनहा अर्दार होनाय बेदर एवनायफोरखौबो सेफोटनानै लांनानै जाहैयो। बेवहायनो दावराव जायो। बे दावरावजोंनो बिमा-बिफा, फिसा जयै नुलायलायो। रिगावआ फिसाइ दावहारु आरो रान्दि गाइथेंखौबो रायो, रिगाव आरो गाइथें मोनहा खानायाव हमनानै बोलायलायगोन।

गावदा: (धुणा सावनानै गणेशखौ खुलुमगोन)

हे, आफा गणेश, आं आरो बे बायदि गुबुननिखौल' बेसेबां नायनानै थाबावनो फालाय? आंनि खाफालाव हासार गैथारा नामा-मानो दाबोनो रोदोम होफैदियानो फालाय? जेसेबां आंनि रेष्टुरेन्टाव फैयो, रावबो हारसिं फैफेरा, 12 बोसोरनिब्लाबो जरा, 50 बोसोरनिब्लाबो जरा। नाथाय आंहा?—आंनि गोसोखौ बुजिसनो हायाब्लाबोथ'-गणेश आफा, आंनि बारफुनो हमनाय देहाखौथ'-नुबायना नों। मोजाडै नायथार नों आफा, र आं नेपालनिफ्राय चछमा लाबोगासिनो दं। सोरबा दान्थालफोर फैफ्रांबायब्लाबो एसेसो राहा लाजागौ -बेखौबो नों नागिरनानै मोनाखिसै नामा। उम, आफा गणेश मेगन खाना, अबुजन, नमस्ते।

(बिरदाव आरो जोमैमोन हाबबोयो) मोखांथिं बनानै दोन्नाय टेबुलाव जिरायफैगोन। जोमैया फैग्रो मोना मबाइलाव माबा नायगोन। बिरदावा जोमैखौ नायबाय थागोन।)

जोमै: मा नायबाय थाखो?

बिरदाव: मा अर्दार होनो?

## मोदोमफ्रु रेष्टुरेन्टआव सोदोमप्रिनि खबाम

**जोमै:** आं मिथिया ।

**बिरदाव:** चिकेन चावमिन आरो अमानि पकड़ा हरनोसै नामा ?

**जोमै:** बुंबायना आं, आं मिथिया होन्नानै ।

**बिरदाव:** जोमै, नों मानो.....

**जोमै:** आंहा गोसो गैया ।

**बिरदाव:** जोमै, नों मा जादों ?

**जोमै:** मानो नोंनोलाय ?

**बिरदाव:** आं नोंनि अखोरां, आंनि उदां बिखा सा सा नों निरिबिलियै, गोसोयाव हाजार मिजिं आरो हास्थायनाय लानानै दावबायो । बे आंनि फैलाव गोसो आरो सुमु-सुमु देहाया नोंनिनो थाखाय अराइ गेवलाडै दड' जोमै । बुं नों, माब्ला आंनि बे बिबार बारियाव गेवलाडै बारफैगोन, बाइदेमलाय-सुदेमलाय माब्ला मोसागोन, मनालिसानि मिनिनाय जों आंनि गोरबोखौ बिलिरफैगोन ?

**जोमै:** (जायगा दावश्रोदनानै गसंहैगोन)

**बिरदाव:** जोमै, बुंना, बहा सु हाबदों, आं बख 'नानै होनो बुंना । बहा हांगार नांदों आं फोसाबनानै होनो ।

**जोमै:** आर्सा, नों हागोनथ' आंनि गोसोआव हाबनाय सुखौ खायख 'नो आरो हुगारनो हागोनथ' आंनि गोसोयाव नांनाय हांगारखौ हुगारनो ?

**बिरदाव:** Oh, yes, why not?

**जोमै:** दाखालि बाइकआव सोरखौ दिखाडमोन नों ?

**बिरदाव:** औ, बेयो बियोथ' रावबो नडमोन ?

**जोमै:** सोरथोमोन बिलाइ ? भुट ना दाइनीमोन ?

**बिरदाव:** बियोथ' बाजैनि.....

**जोमै:** बाजैनि बिनानाव । जाबायदे, मिथिनो आद्रा गैलिया ।

**बिरदाव:** दड, गोबां आद्रा दड । बाजैनि.....

**जोमै:** (गोब्राबै) बिनानाव, नोंनि रमान्स । आंनो आरो बेफोरखौ खिन्थाबाय दाथासै । आं थांनोसै । (जोमैया थांहां जायोब्ला बिरदावआ जोमैखौ आखायाव

## मोदोमफ्रु रेष्टुरेन्टआव सोदोमसिनि खबाम

हमथाहरगोन) हगार आंखौ हगार। मोनसेल' गोसोखौनो नों सोरनो होख 'यो ?

**बिरदाव:** आरे, जोमै, खोनासं, बाजैनि बिनानाव नड बाजैनि बिमासोमोन।

**जोमै:** थगायदों।

**बिरदाव :** सयथिबोलै थगायाखै। सत-सत तिनि सट, सोरगो, मोरथो, पाताल जेरावबो इसोर दड। आंजों बाइक गाखोजाबनाया बाजैनि बिमासोमोन।

**जोमै:** (बिरदावखौ मिज्लिउ-मिज्लिउ नायगोन।)

**बिरदाव :**खोनाबायथ, जोमै। आंजों बाइक गाखोजाबनाया आदानि बिसि बाजैनि बिमा, थारमाने आदानिनि बिखुनजो। माने आंनि बिखुनजो।

**जोमै:** एफाबां सिख्ला उन्दै नुलायनाय, फिसाय दंनं गैया जाखोनो बिहालाय ?

**बिरदाव:**दड, गासिबो दंजोबो, बाजैयाथ बिनि ब्रैथि गथ 'सो। सेथि, नैथि, थामथि-आरो खथ थि.....। बेफोर थार्थोंसै-दानिया गबायथ सुया, हांगार नांनायनाबो साफा जाबायथ' ?

**जोमै:**( मिज्लिउ-मिज्लिउ नायनानै-नायगडे। मिनिस्लु मिनिस्लु गुबैयो। सानैबो बालाबगासे मिनियो।)

**बिरदाव:**चिकेन चाउमिन फ्लेटनै, पर्क पकड़ा फ्लेटसे।

**जोमै:**आं हले दिनै नआव थाब थाड। बेवहा दा दा द्राय, बयबो नुयो। बै खनाथिं थुदो।

**बिरदाव:** थु, जेराव मोजां नुयो।

( सानैबो फारसे ख 'नाजों थाडे आरो जिरायहैयो)

( रिमोनला आरो बिरबाइनामोन हाबबोगोन)

**बिरबाइना:** आं नोंखौ बिब्दि सानाखैमोन। नोंलाय माथो फुल पार्चेन्ट नडलायो।

**रिमोनला:** बिरबाइ, रेष्टुरेन्टफोराव आलाइनानै दोननाय गासैबो बिबारानो गेवलां-गेवथां समाइनाथारब्लाबो बेफोरनिफ्राय मोदोमनाय ओंखारबोया।

**बिरबाइना:** नोंनोथ 'रेष्टुरेन्टनि आलाइनाय बिबार।

**रिमोनला:** बिरबाइ.....

**बिरबाइना:**रमानसाव आरो बेसे गोबाव ?

## मोदोमफ्रु रेष्टुरेन्टआव सोदोमसिनि खबाम

रिमोनला: बावला र'।

बिरबाइना: आफाया नाथाय आइ.टि. आइ. मेकानिक्स। रमान्स, सानबोलावरि  
बेफोरो बारा गोबाव लाइ मोन्नाय नड।

रिमोनला: जागोन ना। आंखौ खेबसे बुंल्लानो जायो, खेबले खेबले बुंलाय  
नाड।

बिरबाआइना: खेबले खेबले माने- बुंल्लाबो जेबोयानो जानो नागिरा माथो।  
गुदुंबो मिथिया, गुसुबो मिथिया।

रिमोनला: बिरबाइ.....

बिरबाइ: आंनि मुड बिरबाइल्लाबो- आं लाथिख'आव बिरबाइलाबायथाग्रा  
नडहाय। सिमाडव, सानबोलावरियाव खथ'रमान्स खालामबोबाय, दा  
मोगथांसो सम सैफैबाय। लोगोयाब्ला मालाय गिबि गथया थाखोनैआव  
फरायलायबाय।

रिमोनला: ए जाम्बिया, मोगथाड, मा, सिमां एबा सानबोलावरिया मा बेखौ  
मिथियाखैथ-। जेब्ला मोगथांजो फोलाजागोन-होमब्लासो मेगनाव मोदै,  
खुगायाव खुदै लानानै आगोर मोनै खारफा बायनांगोन।

बिरबाइना: मोगथाड मा बायदि ?

रिमोनला: मोगथाड जादों बै जे डाक्टरफोरनाव मोदोमबो गैया, बिगुरबो गैया  
माबा हाराल ब्रेव-ब्रेव, हाराव-राव मानसिनि सावगारि दोनो बे बायदि।  
आरो मोगथाड भुट आंग्रोमोन्दा फोरबायदि हाथाय रजं-रजं लानानै  
होसोयो, हा बे बैसोयावखि नों खारनो हायो ?

बिरबाइना: नंगौ नामा ? नंधारगौ ना ? मोगथाड नों बुंनाय बायदिथार ना रिमोनला ?

रिमोनला: औ, आं नोंखौ मानो फोलानो होमब्ला, सना, आंनि जीउ।

बिरबाइना: नों आंखौ जोबोर अनथारगोन ना आदा ?

रिमोनला: अनाब्ला, नोंखौखि अनाब्लानो थानो हायो ?

बिरबाइना: मोगथांखौ थोर-थोर जोबोर गिथारोना नों आदा ?

रिमोनला: औ, गिगौमानि गगौ।

बिरबाइना: बिदिब्ला नों आंखौ हाबा खालामनो गियो ?

## मोदोमफ्रु रेष्टुरेन्टआव सोदोममिनि खबाम

**रिमोनला:** (गोनो गोथोजॉ) गिनो, नॉखौ हाबा खालामनो गिनो ? सोर बुडनो फालाय ?

**बिरबाइना:** आं मिथिगौ, नॉ आंखौ हाबा खालामनो गियो, थारमाने नॉ मोगथांखौ इनायनो गियो ।

**रिमोनला:** होत नडलै, गिया, मोगथांखौबो, गिया, नॉखौबो हाबा खालामनो गिया ।

**बिरबाइना:** गियाना, नॉ गियाना, गिथाराना ?

**रिमोनला:** (गिहां-गिहां:) ओहो, गिया, गिनाय मोना ।

**बिरबाइना:** सानबोलावरि ना सिमां ना रमान्स बेखौ मानो इनायनो मोजां मोनो होन्दोमोनलाय नॉ ?

**रिमोनला:** बेयो औरै बायदि आराम-मोन्नाय-जायखौ जॉ बयबो अराइ सम हास्थायबाय थायो नाथाय हमथानानै लाखिबाय थानो हाया ।

**बिरबाइना:** मानो बयबो मोन्नो लुबैयो, नाथाय मानो मोनजोबा ?

**रिमोनला:** नॉ रांखान्थि बिगियाननि फरमुलाखौ मिथियाखै । रां खान्थियाव दड- Demand आ बारा जाब्ला Supply आ खम जायो आरो Supply आ खम जाब्ला मुवानि आंखाल जायो । रमान्स एबा सानबोलावरिखौ- बयबो हास्थायोखायनो बेखौ मोननाया खोब गोब्राब जायो । आरो खोनासं बिरबाइना-सानबोलावरिनि राइजोयाव थायोब्ला सुखु- गोजोननि आंखाल गैया, थैनायबो गैया, दुखु-दाहाबो गैया । बोरायनायबो गैया, बेमार आजारबो गैया ।

**बिरबाइना:** नॉनि जोनोमा मोगथांनि ना सानबोलावरिनि ?

**रिमोनला:** (गोनो गोथो) मोगथांनि ।

**बिरबाइना:** होमब्ला नॉ जिउनि गुमुखौ नेवसिग्रा मोगथां गिग्रा- अंखा बिख्लो गोसोनि बिलाइ गोरान ।

**रिमोनला:** बिरबाइना..... ?

**बिरबाइना:** नॉ हाबाखौ माब्ला खालामगोन ?

**रिमोनला:** फैगौ-बोथोरफोरावनो खालाम थारनोसै । आफाया न गंसे लुनो होन्नानै बुंदो- बै नखौ लुखांब्लानो हाबाखौ खालामनोसै । ( बाइजोजॉ



## मोदोमफ्रु रेष्टुरेन्टआव सोदोमस्रिनि खबाम

नायहरनानै) हनै सोरबा फैबावगौ, बै खनाथिं थुदो ।

**बिरबाइना:** (रिचेप्टसनथिं आवगाय लांनानै खनाथिं जिरायहैयो) चिकेन पलाव;  
आरो पर्क पकडा ।

(दावहारु आरो गाइथें मोनहा आखायजों आखाय हमलायनानै मिनि  
मिनि हाबबोयो आरो बनानै दोन्नाय टेबुल सेयाराव जिरायफैयो)

**दावहारु:** नों जिंगा दासि गायथें, नोंनि मिजिं, नोंनि हास्थायनायफोरा गासिबो  
मोगथाडव जाफुं जोबगोन ।

**गाइथें:** आंबोथ बेखौनो सानो । नोंजों-आंजोंनि दिनफोरखौ लानानै आं खोब  
बोदोर जायो । एखनब्ला लाजिनोबो ओंखारो ।

**दावहारु:** लाजिनोबो ओंखारो नड ना गायत्री ?

**गाइथें:** औ हाय, बे बैसोयावबो खाफालनि सिन्दुरब्ला थुनानै ग्रें-ग्रें..... ।

**दावहारु:** गायत्री, नोंनि थाखाय आं इसोरखौ साबायखर बावयो ।

**गाइथें:** आंनि थाखाय ?

**दावहारु:** औ, नोंनि थाखाय । मानोना ब्रैजिनि लांगोना मोनलायनाय बैसोयावबोदि  
नोंनि देहानि रुगआव लाइमोन सेंग्राफोरा दाबो नायगोमो बावयो ।

**गाइथें:** थोत, नों मानो बिब्दि होमब्ला ।

**दावहारु:** सयथि, आं नंथारगौखौसो बुंदों नडदा ।

**गाइथें :** पुलिच-दार 'गा, मास्तार, केरानी जायफोरनो आंनाव जौ लोंनो फैयो-  
बिसोरनो सावले-सावले सावलेनानै थानोनो सम बावगोमायो ।

**दावहारु:** नों आंखौ गोसोखाडेना गायदे ?

**गाइथें :** औ, गोसो खाडब्ला । जायजों गोसो लालाय होलाय खालामबाय,  
जायजों गोसोया दोरफो दोरफो मावबाय-बि बायदि मानसिखौ गोसो  
खाडब्लाखि ओरैनो थानो हायो ।

**दावहारु:** आंबोथ बेखौनो सानो ।

**गाइथें :** सोड नंब्लाबो सोंबावनाय जानोसै, गाज्रि दामोनसै ।

**दावहारु:** मादि बुंनाय जायो । आं बेखौनो गाज्रि मोनो ।

**गाइथें :** माखौ गाज्रि मोनो ?

## मोदोमफ्रु रेष्टुरेन्टआव सोदोमसिनि खबाम

दावहारु: गाञ्जि दामोनसै होन्नायखौनो गाञ्जि मोनो आं ।

गाइर्थे : आरे बाबा, दिनैनिफ्राय बुंला, बुंधारलिया आं, गोरान्थियावबो ।

दावहारु: माथो मोन नों सोंनो होन्नायलाय ?

गाइर्थे : ए, जेबो नड । माबासो आरो ।

दावहारु: मा मोनलाय ?

गाइर्थे: जेबो नडहाय, सोब्लामालाय मा सोडब्लामाय मा.

दावहारु: मा मोन लाय ?

गाइर्थे: माबासो हाय । जेबो नड । बे माबाखौसो सोंनो सानबावनायालाय आं ।

दावहारु: मा माबाखौ सोंनो सानदोंमोन लाय ?

गाइर्थे: अखाथारहाय-नों । सान्दोंमोन आं सोंनो, नाथाय गोसो जायाखै । सानफिनदों  
आं नोंहा नयाव सोर सोर दडमोनलाय ?

दावहारु: रावबो गैया । आइ बुरै आरो हाबा जालानाय बिनानाव सासे ।

गाइर्थे: नों मानोथो दाबोनो हाबा खालामाबालानो थाबाय थादों ?

दावहारु: हाबानि सोमोन्दै सान्नायाथ गोबावसै । उनाव बुजिबाय आं हाबाया  
जौनि गोसो जानायजौल जाया । बेवहाय नांदेरथारगौ इसोरनिबो गोसो ।  
बेनिखायनोथ हाबा खालामनो नागिरग्रा गोबाडनो हिन्जाव एबा हौवाखौनो  
नागिरब्लाबो मोना । आंहाबो बिब्दिनो जादों । दस नाम्बारनि नाथखौ  
बार नाम्बारनि रेन्जजों खुलिनो हायै बायदि जाहैदों ।

गाइर्थे: नोंनि गोसोया जोबोर रमान्तिक थारना ?

दावहारु: र 'मान्तिक जायाब्ला थाब बोरायो, बेमार-आजारफोरा नाखेबनो बोलो  
मोनो ।

गाइर्थे: जागोनानो गय ।

दावहारु एक्सुयेलि-आं जेसेबां रमान्तिक दिन्थियो सिडव आं बे बायदि  
रमान्तिकद्राय नड ।

गाइर्थे: हा जादों मोथो जाखो ।

दावहारु: नड, मानसिफोरा गाञ्जि बुंनो हागौथ' ।

गाइर्थे: मानसिफोर बुंनायालाय मासै ।

## मोदोमफ्रु रेष्टुरेन्टआव सोदोमसिनि खबाम

**दावहारु:** एक्सुयेलि आं देहाखौ बेमार आजार बोरायनायनिफ्राय रैखा खालामनोसो रमान्सआव थाबाय थायो । आमेरिकानि मोनसे इउनभारचिटिनि स्कलारफोरा रिचार्च खालामनानै फोरमान होबाय जे रमान्सआ बैसोखौ 20 बोसोर बाडय खालामनानै होयो ।

**गाइथें:** जागारनोबो हागौ । जों गामिनि बुरलां माहाजोन साबा बिसि दं । दाबोनो बोरायखौनो नुया ।

**दावहारु:** आर्सा, नों बिहारि जनायखौ मा सानो ?

**गाइथें :** आं मोबायजोंबो नायनो हाया ।

**दावहारु:** नोंनियालाय ?

**गाइथें :** आंनियाथ' बिहारि जालिया ना । हौवाया आंखौसो गिनानै खारदों, बियो गुबुन हिनजाव हाबा खालामहैफिनदों हादानाव । आंखौबो लिनहरदोंमोन, थाडखैहाय आं ।

**दावहारु:** हाबायाथ इसोरानो खाखानानै होनाय जुलिसो होन्नानैदि बुंदों ।

**गाइथें :** इसोरखौ फोथायब्लाथ राहा गैलिया । इसोरानोथ एखनब्ला आवल लगायनानै होयो । थेवब्लाबो आं गदायखौ हले जाथारनाय नड ।

**दावहारु:** मानो ?

**गाइथें :** मानोना गदाया नंगौब्लाबो, नडब्लाबो गोबां बदनाम दड । तेजिमला, रामनि बिमा गदाय बर' सल 'बाथाफोरनि बिमा गदायफोरानो बेखौ हांगार फुनखानानै दोनबाय । ( बे समावनो रिगाव, सानै हिनजाव लोगो आरो सासे हौवा लानानै फैगोन । बिसोरखौ नुहुरनानै दावहारु आरो गाइथें मोनहा चिकेन फ्राइ अर्दार होनानै गुबुन फारसेजों जिरायहैगोन । रिगाव मोनहा सानैया जिरायगोन, गुबुन सानैया गसंगोन । साथामा चिगारेट सोबगोन ।)

**राखेब :** मेदाम, हार्द ना सफ्ट लानो ?

**रिगाव :** सफ्टखौनो बिहरदो ।

**राखेब :** थांनाय सफ्ट गंनै आरो जाग्रा मा रेदिमेद दडलानानै फै । पर्क प्राइ फ्लेटनै अर्दार होबो । ( सासे आइजोया रिचेप्टसनाव थांनानै बियार गंनै आरो

## मोदोमफ्रु रेष्टुरेन्टआव सोदोमसिनि खबाम

जोमै मोन अर्दार होनाय पर्क पकड़ाखौ लानानै फैयो । गिलासाव लुयो,  
लोडो आरो जायो ।)

**रिगाव:** राखेब, हिसाबा खालामनानै बिसोरनो बहननानै हरदो । रां नांगौनो बिसोरनो ।

**राखेब:** मबे मोनसेनिखौ मेदाम ।

**रिगाव:** बै गावसोर लागोनि बान्दोनिया ।

**राखेब :** बेखौथ सिफायनो हानाय नड । मानोना गामिनि गावबुरा, चेक्रेटारीफोरा  
खबर लाहरगासिनो दंथारो ।

**1. नं आइजो:** बे बान्दोनिखौ नांला, बेखौ मावगु बैनांगोन ।

**रिगाव:** बेखौ नडब्ला माखौथो ?

**2. नं आइजो :** बै कालभार्ट गंबानिया । बेखौसो बिदों जों ।

**1.नं आइजो:** मावथारनांगौ बान्दोनिखौथ जों बिया, बैजे गैयैखौनो दं होन्ना  
गंबा कालभार्टनि 25 लाख बरनखांबाय ।

**रिगाव :** राखेब- बे फैसाखौ बहा बाहायामोनलाय ?

**राखेब:**मेदाम, बेखौ जों दांनो नो मोनाखै, अफिचनिफ्रायनो पार्टिया बाइहा-बाइहा  
बोश्रोदनानै लांदो ।

**रिगाव:** होमब्ला बबे रांखौथो हरनो हायो बिसोरनो ?

**राखेब :**गावसोर रिक्स लायोब्ला बान्दोनिलसो दड ।

**2. नं आइजो:**बबेनि पार्टिया लांखो ?

**1.नं आइजो:** जोंथ सोंजोबबाय, रावबो लाडखौनो । आरो अफिचनियाथ मेदामनि  
थाखाय सारखौनो लाबोदों होन्ना नै बुडो ।

**राखेब :** बखनायथ आंनो बखनांगोन । सोरनो हरदोंमोन-बेखौ बोरै बुंलायखो ।  
बेफोर स्रोत सैथो इंराजीयाव बुडो अपेन चेक्रेत ।

**1. नं आइजो:** बिदिब्ला जों मोनमारनाय नंलिया नामा ?

**रिगाव:** मोनगोन, नाथाय आं बबेनिफ्राय हरलायखो ?

**राखेब:** रांआनो बेबायदि बिबाय थाजायो ना ?

**2 नं आइजो:** जोंनो सफ्टासेनि गेजेराव कालभार्टनि रांखौ खावसे हराब्ला  
जलंगानि मावजिखौ बहनगोन जों ।

## मोदोमफ्रु रेष्टुरेन्टआव सोदोमसिनि खबाम

**रिंगाव:** सिरिथा, मेगन दं होन्नानै जायखौनो मोनो बेखौनो दानाय, खुगा दं होन्नानै जायखौनो गोसो जायो बेखौनो दाबुं- ।

**राखेब :** आरो खोमा दड होन्नानै गासैखौबो दा खोनासं ।

**1 नं आइजो:** सोर साबैसेनि मेगन, खोमा एबा खुगाखौ बेसे गोबाव सिरि दोन्नो हाय मेदाम ?

**रिंगाव:** थांदो थां, थांदो नोंसोर । सान्नेसोनि उनाव बेबस्था खालामगोन आं ।

**2 नं आइजो:** जेखि जाया सोदोब जाखायो मेदाम, जेखि सड मोदोम खायो ।

**राखेब :** सोदोब जायोना मोनामो, जों दड थांदोल नोंसोर ।

**1 नं आइजो :** थाडब्ला माथो, जों बे बायदि वृन्दाबन गारदेनाव बारा गोबाव थानो हानाय नड । थुदो थु आइजो सानैया ओंखारलाडे बिसोर ओंखारलांब्ला राखेबा काउन्टाराव थानानै रिमोनलामोन अर्दार होनाय पर्क पकड़ाखौ लाबोयो । बिरदावआ गावसोरनि अर्दार होनायखौ सेफोरनानै जाफैनायनि थाखाय राखेब मोनखौ रायफैयो ।)

**बिरदाव:** गुबुननि अर्दार होनायखौ सेनानै जाग्रा सोर बबेनि बसलै नों ?

**राखेब:** सिरि सिरि था । मानि थै गरम जादोंफालाय ?

**बिरबाइना:** जोंनि अर्दार होनायखौबो लाबोनानै जाफैदोंनो ?

**रिंगाव:** (चियाराव जिरायनानै) राखेब, मानि सोर दावराव खालामफैदों ? सारनानै हर ।

**राखेब:** बेसेबां रां नांगौ नोसोरनो ? बेसेबां जानो नोंसोरलाय ? (रां बहनो आरो हरनो नागिरो)

**बिरदाव:** जोंनो रां नाडलै, देमुक दा देखाय ।

**बिरबाइना:** राइजोनि रां थगाइनानै जानायजों एफाबां थिफुदला ?

**राखेब:** लागाम हमनानै बाश्रा बुं बिनानाव ।

**बिरदाव:** धोरोमखौ दहाय होनानै आखल दिन्थि नोंबो ।

**रिंगाव:** एफाबां आखल गोनां बबेनि सोर जाखो नों सेंग्रा । (बे समावनो गाइथें फैदेरबावयो)

**गाइथें:** ओइ दुइ नम्बारीफोर, बे जायगाया दावराव खालामनो थाखाय नड,

## मोदोमफ्रु रेष्टुरेन्टआव सोदोमस्रिनि खबाम

लिरनाय दंखायो 'अन्नानै सिरि-सिरि जा ।'

**जोमै:** ( फैदेरनानै ) बिरदाव, मानो दावराव खालामनांगौ, फै ।

**बिरदाव:** र' जोमै ।

**रिमोनला:** बिरबाइना, बे दावरावआव मानो थाफाहैखो ? फै ।

**बिरबाइना:** र, रिमोनला आदा ।

**दावहारु:** ( आवगायबोनानै ) गाथें, रेस्तुरेन्ताव बेबायदि दावरावजों जाया, गुबुना दावराव खालामदों- नोंहालाय मानो नांदेरफाफैखो ?

**गायथें:** र, दावहारु नों मिथिया ।

**रिगाव:** ( जोमै, रिमोनला आरो दावहारु मोननि मुं खोनाब्ला बागदावखाडो ) आरो गिदिंनानै मोखां जायोब्ला ननि बयखौबो नुयो । बिसोरो साफ्रोमबो गावजों गाव गल'-गथ' नायलाबाय थायो, नायगडो आरो लाजिनाय दिन्थियो ।

**गायथें:** बहानि सोर महारानि हाय नों आइजो गरानि ? गोदोब्ला दखना सुरि गानब्लाबो आगोर मोने, दिनैब्ला राइजो राजानि रां जाखुमानायजों खावलायफोरानो फुंगा-फुंगा जालायथारदों । खाफालावलाय माथो सिन्दुरबो दंगारो, थेवब्लाबो रग' जानाय सेंग्रा लानानै सिंलाब-सिंलाबबाव माथो नोंलाय आइजो गरानि ? न' दडना गैया नोंहालाय ?

**रिगाव:** ( गोबारै होगदावनानै खर' सिथिब्रबो ) सोरनि सिगाडव सोरखौ लानानै मा बाश्रा बुंलाबाय थादों नोंलाय लाजि गैयै ?

**बिरबाइना:** अफिस आदालतफोरावबो राइजोनि रां सेफोटनानै जानो थोया, रेस्तुरेन्टफोरावबो गुबुननि आदार सेनानै जानो थोया । सेनानै जानायानो नोंनि हुदा नामा आइजो ?

**बिरदाव:** फिसा-फिसौ दडना गैयासै बेबाइदि आइजोआलाय, न' बां दडना गैया जाखो सुन्दाव-सुन्दावलाय ?

**राखेब:** मिथिगौना नोंसोरो-बि मेदामा सोर ? सोरनि सिगाडव मा बाश्रा बुंदों बायदि मोन्दों नोंसोरलाय ?

**गाइथें:** अखा-बांखा, खैदां-खैफोटनिफ्राय बेंनानै लाग्रा बदिगार्डआ नोंनो नामा

## मोदोमफ्रु रेष्टुरेन्टाव सोदोमस्रिनि खबाम

आदा खावनिया सेंग्रा ?

**बिरदाव:** न'खर बेंनो नागारै गुबुन आइजोखौसो ख-ख बेंग्रा ।

**बिरबाइना:** नोंसोर बायदि बिमाफोरानो बे बायदि असामाजिक आखल-आखु दिन्थियोब्ला जों फिसाफोरा मा सोलोंनांगौ आइजो ।

**गावदां:** (आखाय खबै खबै दावगाबोयो) जोलैया गोखैब्ला फिथायफोराबो जेब्लाबो गोखैखा । जैरै एमाव मोजांब्लासो जुमाइआबो गोथाव जायो । बेखौ सोर मिथिया, नाथाय नों-आं साबैसेया बेफोर बाथ्राखौ गोसोयाव लायो ? बुंनायसाय आइजो-गरानी आरो गोसोजों बोरायनो रोडै-बोराय-सेंग्रा ?

**बिरबाइना:** बबेनि मा आदर्श फोसावनो फैलायखौ नों आब' गावदां ?

**गावदां:** आदर्शनिल' बाथ्रा नड, सैथो बाथ्राखौबो खिन्थानो फैबाय आं ।

**बिरदाव:** मा सैथो बाथ्रा बेलाय ?

**गाइथें:** सोरनि मा सैथो बाथ्रा बेलाइ ?

**बिरबाइना :** बुंदे आब, सोरनि सैथो बाथ्रा बेलाइ ?

**गावदां:** रावनिबो नड ( साफ्रोमखौ आसि खिन्थानानै ) रावनिबो नड, नाथाय नोंनि, नोंनि, नोंनि आरो नोंसोर गासिबोनि थार बाथ्रा ।

**बिरबाइना+गाइथें+रिन्दाव+राखेब:**-जों बयनिबो..... ! जों बयनिबो मा थार बाथ्रा फालाय ?

**गावदां:** खोनासं, थार बाथ्राखौ नोंसोर बयबो खोनासं । नैबे सिख्ला ( जोमै ) आ नैबे सेंग्रा ( रिमोनला ) नि बिनानाव, नै बि बोरायनो रोडैया बिसोरनि बिफा आरो नैबे भि. चि. डि. चिनि सेयारमेना रावबो नड बे बोरायनो बाग्रानि बिसि । थारमाने बिफा, बिमा, फिसाज्ला आरो फिसाजो । बिसोर साब्रैबो आंनि मोदोमफ्रु रेष्टुरेन्टाव सोदोमस्रिनि खबाम हगारफैदों । ( गाइथेंआ दावहारुखौ, बिरबाइनाया रिमोनलाखौ, बिरदावआ जोमैखौ आरो राखेबा रिंगावखौ गोमोहाबै सोडे । )

**गाइथें:**(दावहारुखौ नायनानै) बिदिब्ला नों हान्द्रेट पार्चेन्ट थगायदों ? उननि जोनोमाव सालाइखौनो मोन्नाय नंलिया नों । जौ फान्नानै जाग्राब्लाबो

## मोदोमफ्रु रेष्टुरेन्टआव सोदोमसिनि खबाम

थगायनानै जाफेराखौ आं । इसोरनि दहाय लानानै थगायग्राया इसोरनिनो साव मोनर्थो ।

**रिगावः** नों गावबो रां खामायनो रोड, आंनि खामायनाय रांजों नों रान्दि बुरै बरायग्रा दावहारु ?

**गाइर्थेः** -ओइ-आइजो, आं रान्दि नड, फिसाइ गारग्रासो आं ।

**रिगावः** इसोरनि फिसाइ थानानैबो हाग्रानि फिसाइ नागिरग्राखायनोथ गारजादों ।

**गाइर्थेः** नोंनियालाय ? नोंनिया ? नखर बेंनो नागारै हरखि-सान बाइजोआव थानानै दा मा नुखो ? लाजिगैयै !

**रिगावः** ओइ, आंखौ लाजि गैयै मा गैयै होन्नानै दा बुंबाय दाथा नों । लाजि रोडै हिनजाव ।

**गाइर्थेः** नोंनि जायगायाव आं मोनब्लाथाय ह बै आइ दैयाव बारसोम हैसिगौ आं ।  
( बिसोरनि बे बायदि नांज्लायबाय थानायावनो गुबुनफोरा साफा-साफा ओंखारलांजोबो )

**गावदांः** ओइ आइजो गरानीफोर, बे थावनिया जादों गावदांनि 'मोदोमफ्रु रेष्टुरेन्टसो' । बेयो टर्कजों जुद्ध होग्रा बिसारसालिय एबा आदालत नड । चेरारमेन आइजो रां खामाइनानैल' नखर दानो हाया, नखरखौ दाग्रोनानैसो रां खामायनो हायो । आरो खांखिनि गाइर्थे-जौनि बिदैजों बोनजानाय हौवाया माब्लाबाबो संसार जानायाव मोजां जानो हाया ।

**रिगावः** नों आंनि फिसायखौ जौनि बिदैजों बोदोर खालामनो नाजादोंमोन ?

**गाइर्थेः** नोंनि सुन्दावरिनि थाखायसो नोंनि फिसाइआ.....

**रिगावः** ( बारसनानै गोबारै ) है, फिसाइजों गारजाग्रा ।

**गाइर्थेः** ( बिबो गोबारै ), ओइ, लाजिरोडै ।

( सानैनि होगदावनाय, नेरलायनाय, रागा जोंलायनायजों फैसालि गोग्लैयो । )

( फैसाली गोग्लैयो )



रुगुं गोबोरलांनाय संसार

## रुगुं गोबोरलानाय संसार

## रुगुं गोबोरलानाय संसार

### आखलफोर :

- (1) बांबुला - 50 बोसोरनि, भि.चि.दि.चिनि चयारमेन ।
- (2) दोमैलु - बांबुलानि बिसि,
- (3) रमन - 20 बोसोरनि बांबुलानि फिसाज्ला ।
- (4) रुम्बां - 17 बोसोरनि बांबुलानि फिसाजो ।
- (5) गायलां - 70 बोसोरनि बांबुलानि बिफा ।
- (6) सासे डाक्टर,
- (7) रुम्बांनि सानै सेंग्रा लोगो ।

## रुगुं गोबोरलांनाय संसार

(बेलासे सम, बांबुलानि न'। फैसाली बोलानाय लोगो-लोगो नुनो मोनगोन साबना-हामना न' खथा, गोदान गोदान दानलबनि जिरायग्रा, साखाथियाव स्टान्ड गोनां टेबुल फेन। गायलांआ गामसा गान्नानै आखायाव लावथि गंसे, मोदोमाव गामसा फिसा गांसे लानानै गुजु-गुजु न'नि फारसे दरजाजों हाबायो आरो खथानि गेजेराव गंदब लायनानै गुजुनानै जसोनानै थायो। बे समावनो बांबुला आरो दोमैलु मोनहा बाइजोनिफ्राय न'याव हाबबोयो। सानैबो आखायाव गांथामसो दखना, चसमा, लंपेन्ट आरो जुथाफोरनि बेग थागोन।)

**गायलां** :साला बुरै गाइदे मिनिहर नों-गाइदे, बारानसायाव थानानै मिनिहर, बिफां दालाइफोराव बानानै नायखोमा हर। आफाखं दामै-दामै रंजा हर नों। (दान्दिसे सिरि थायो।)सुख-सान्थि बुरै नोंहासो, जोबोर सुख-सान्थि।आंखौबो लांफैदो-बुरै, नोंनि गोदान गामिनि गोदान नबथियाव। रबनाय देहानि खस्थखौबो सहायनो हालिया, मेगनजों नुनाय आरो खोमाजों खोनानायखौबो सहायनो हालिमा। बानाय मोनथारबाय बुरै, अहानाय मोनथारबाय आं।

**बांबुला** : अर जोंथारबायलै माथो बिमा-बाजारा अर जोंथारबाय।

**दोमैलु** : हा दाम बारानि बारा- दालाय जिनिस्फ्रा मालाय साबसिन नडा होनब्ला। खम दामनि नांगौबालाय खम दामनिबो दालाय गैया होनब्ला।

**बांबुला** : नोंसोर बायदि हिन्जावफोरनियाथ दाम बारब्लानो जिनिस्फ्रा मोजां जायोलै।

**दोमैलु** : बिब्दिनो नडाथाय माथो। हा बे फानग्रा बेफारिफ्रामालाय एफाबां अनथाइ बिखाना बिसोरो- जानला-मोनला दाम लाला बायनो मुं गैया फिसा फिसौ कम्पानीफोरा दिहुन्नाय खौखि जॉलायनाय एचिनि show-room आव दोनफैयो? बुंनायफ्राबो हाय। (जिरायो।)

**बांबुला** : कौटि रांनि गारियाव गाखोब्लानो- गिदिर मानसि जाया, कौटि कौटि

## रुगुं गोबोरलांनाय संसार

रांनि अट्टालिखायाव थायोब्लानो मोजां मानसि जाया, थिख बिब्दिनो बेसेन बुरजानिब्लानो बेसादफोरा गाहामथार जाया मिथिबाय ?

**दोमैलु :** नोंलाय मा मिथिनोसै ?

**बांबुला :** गाज्जि मुवा एबा खमनि जानायाल खि-हासुदै जाबोया, नों जानाय गोथाव ना-बेदर, फिथाइ सामथाइफोराबो खि जायो-आरो फाइखानानि बाखियाव थाहै नांगौ जायो-मिथिबाय ?

(बे समाव गायलांआ गुजुयो । फिसाज्ला-बिहामजो मोनहा नायसनो)

**दोमैलु :** हे बोराया-माथो-बेवहायसो जसोनै दडलायो । गावनि नयाव थांनो थिनाब्लानो नोंना लोमोफोर फैगौया ।

**बांबुला :** हा गावनि रुम थानमैनो मानो बेफोर मोजां आलासिफोर फैब्ला जिराय-ग्रायाव फैनांगौ जाखोब्रा ? बे बोरायखौ हाथारलियाल आं ।

**दोमैलु :** हमनानै बोनानै लानानै थाडब्लानो ।

**गायलां :** आं फैनो होन्नानै फैयाखैमोनलै आफि, मा बोरैबा फैफ्रांबाय । दाबसे जायगायावनो थाबाय थानोबो बाखांनाय मोनबायनालाय ।

**बांबुला :** हारसिं रुम होखादों-थाबाय था, उन्दुबाय था । जानो लोंनो मोनै बायदि सुन-सुनलै बे बोराया । (बोखांनानै)थु नोंनि रुमाव ।

**गायलां :** बोखांनांलायालै आफा स'ना, सिखांनो थाबायनोखौ आं हाखायो-हारसिंनो ।

**दोमैलु :** लामाफोराव बेरायहैब्लानो जायो, आलासिफोर जिरायग्रा बे रुमावसो खैखानो फैबावयो आरोमा । हाया हाया फैबावयो आरोमा-जिउ लावनाय बाधि दानखानाय बोराया । (रागा, बांबुलाया फिफाखौ बाइजोर्जों लानानै थाडे) ।

**दोमैलु :** गुजुखेब-बोराय । मरं-खरं थाबाय थायो माबा जाखोमादों-लोंखोंमादोंसो सानो ना मायो थाय । थाबायनो हायाब्लाबो थखन थुगथाब थुगथाब मानज्रं-मानज्रं बेरायबाय थायो । खुरिया बोराया । फिसाजो बिजामादै, फोरनावबो थांनानै थाहैगारालायो । (बाजारनिफ्राय बायनानै लाबोनाय ट्रेस फोरखौ बहन-बहन नायो । बेवहायनो मिस्टि थरसेबो गब जायो ।

## रुगुं गोबोरलांनाय संसार

बे समावनो मबाइलाव कल फैयो)

आं नयावनो दडसार, औ सौहैगोन, सासे लोगोखौ लानानै बाइकजों थांधार गोन आं। औ, जागोनदे सार, नमस्कार।

**बांबुला :** (हाबबो फिनो) चाहा कापसे ज्रो लोंजासिगौमोनलै दोमै।

**दोमैलु :-** अमझियाव लोंबोनानै थाजिम जाबोयाखै होमब्ला नींहा ? दा बाइजोयाव ओंखारलांब्लानोबा गोजा-गोमो-गुफुर रं बेरंनि माखौ लानो, माखौ दोन्नो जागोन।

**बांबुला :** बेथ' जाखागोन। थेवबो.....

**दोमैलु :** आंहा सम गैया, सारया दानोसो लिंहरबावबाय, थाब थांधारनांसिगौनो

**बांबुला :** बिब्दिब्ला बिसोरहानि बार्ट देयाव नों थांलिया होमब्ला ?

**दोमैलु :** थांगोन, सार लिंहरनायाव थांग्रोथारनांगोन। दा बाईदेयाव लोगो हमलाय-नोसै।

**बांबुला :** नों माजों थांगोन ?

**दोमैलु :** सारआनो गारि थिनहरगासिनो दड। (सिडव हाबलाडे बे समाव बांबुलाया सोरजोंबा मबाइल राइज्जलायहरो।)

**बांबुला :** (मबाइलजों राइज्जलायनाय राव) बेखौ नोंसोर आसादाखालाम सेलै। सारआ मानिनाय नड।

**मबाइलजों फैनाय राव :** बेखौबो आसा दाखालाम, बैखौबो मोननाय नंलिया-माखौथो मोनबाव नांगौथो जाखो जों ?

**बांबुला :** मोनथावखौ मोनगोनब्रा, मोनथाव नडैखौ लुबैब्लामालाय जौरै मोननांगौ जाखो नो ?

**मबाइल :** ना मावयाखौबो नोंसोरनो मनयो, सिंगि-मागुरखौबो नोंसोरनो खबायाव सोजोबो-जोंनो माखौथो बाहागो दोनोलै नोंसोरो ? नोंसोरहाल उदै दड-जोंहा उदै गैया नामा ?

**बांबुला :** बिब्दि नडलै बाश्राया। नोंसोर बुजिनो नाजब्रा।

(बे समाव दोमैलुया हाबबोयो)

**मबाइल :** नोंसोरहा धि-माखन जानानै जोंहाब्ला उदै दन्ध्रा नांनानै थानांगौ ?

## रुगुं गोबोरलानाय संसार

नोंसोरहा दालान नयाव आलो-आलो उन्दुनानै जोंहाब्ला गेग्रेब देरा  
गिजियाव उन्दुनांगौ नामा ?

बांबुला : होत नोंसोर - हेबनोल मिथिथारगौलै मानसिफोरा ।

मबाइल : आन्दलनखौ नोंसोरल' खालामाखैलै, जिवन दानखौ नोंसोरल' होयाखै  
आसोल जिवन दान होनानै आन्दलन खालामग्रा होन्नानै बुंब्ला जोंसो ।  
नोंसोर बायदिया- पुलिचजों बुजादों ना होसो जादों ? जोंसो देहा-मेलेम,  
जिउ-सम्पति ख'हा खालामनानै आन्दलन खालामनानै फैनाया ।

बांबुला : बेखौथ' जोंनि सारमोनहाबो मिथिगौब्रा नोंसोर बुंलाय नाड ।

मबाइल : नोगोरफोराव थाखोमा थाखोमा दैमुनि निज्रा बोहैनाय बायदि रां  
खांनानै लांग्राफ्रा- दिनै जोंखौ खरयाव हाथुराजों देनानै फोथैनो  
नागिरदों- दोन रांखौ मोनाब्ला खिन्थु माबा मोनसे जागोनलै ।  
( मबाइलखौ दान्नानै होयो ) ।

बांबुला : बेफोर बायदिजों माजानोसै जाथियालाय ।

दोमैलु : सोरमोन बिसोरलाय ?

बांबुला : सोर जानो-बिसोरनोसै आरो बे माथा गला हान्जायानोसै ।

दोमैलु : निसा सोबै-सोबै देहाफोराबो गेरेबलांबाय-गोसो आखल-आखुफोराबो  
गेना गोनां जालांजोबबाय बिसोरो । आं थांनोसै-बिफा, नोंहा दा उनाव  
फैदो । ( थांहां जायोब्ला- फिसाज्ला रमनआ बाइजोनिफ्राय हाबबोयो ।  
लंफेन्टआ जिन्स हास'नाय, गस्लाया गोसोम-खानाय जायला, खोमायाव  
तामानि इंटि गान्नाय । जौ फेनानै फैदों । )

रमन : बहा थांनो आइ स'ना माइनाव ?

दोमैलु : ( रागा आरो नेवसिनायजों ) नों दामानि फाग्लामिनि आखल दिन्थि  
बोगासिनो दड दे आफा- ।

रमन : आं मा फाग्लामि खालामबोदों आयै ?

दोमैलु : नों जौ लोंदों, गुबुन निसा जिरात जादों आरो जाथावथारै आखल-आखु  
दिन्थिदों ।

रमन : जानोबो हागौ नाथाय आंहा जेबो गोसोयाव गैथारा ।

## रुगुं गोबोरलांनाय संसार

**बांबुला :** बे बायदि फाग्लामिनि आखल-आखु दिन्थिनानै जिबनखौ फोजोबनानै लादो लै नों मोसौ गथ ।

**रमन :** आं खिन्थु भारत एबा आसाम एबा बड 'लेण्डआ दिहुन्नाय बेसातफोरखौसो जादोंदे-आं निजा दिहुन्नाय जायाखै । आंसो नोंसोरखौ लानानै लाजिनाय मोनोदे ।

**बांबुला :** जोंसो नोंखौ लानानै लाजिनांगौ ना नोंसो जोंखौ लानानै लाजिनांगौलै ?

**रमन :** नोंसोरखौ लानानै आं । मानोना नाय जौया जौ, निसाया निसा । फाइभ-एबा ट्रि स्टार हटेलाव लोंब्लाबो बे निसा । सोरबा बुरैनि गेग्रेब देरा गिजियाव लोंब्लाबो निसा । जेरावखि लोड बेयो फेहो खागोन, आरो देहा सिडव हाबलाडोब्ला बेयो देहाखौ गाग्लोबखागोन । (बे समावनो गायलाड हाबबोगोन) ।

**दोमैलु :** नोंनि आवनायनाया दोन रमन ।

**रमन :** आंनि बिनायखौ दाबोनो मानो ग्रेन्ट खालामाखै नोंसोरो ?

**दोमैलु :** नोंनि मा बिनाय ? खट बेसाद नोंनो होबो गासिनो दंथारो- मानि मा आंखाल जादों नोंहा ?

**बांबुला :** नों जोंनिफ्राय लाब्लालनो जानाय नडअथ 'नोंबो जोंनो होनांगोन ।

**रमन :** औब्रा, बैखौनोनथ 'बुंदों आं ।

**बांबुला :** मा होदों नों जोंनो ? मा होनो हागोन नों ?

**रमन :** होगोनब्रा आफा, होथारगोन आं ।

**दोमैलु :** मा होगोन नों ? जोंनो होनो हानाय मा दड-नोंहा ?

**रमन :** आं नोंसोरनो बिहामजो आरो फिसौ होनो हागोनब्रा-आयै-सयथिबो ।

**बांबुला :** नोंसोरबायदि लांसुनिया नावलाय सोर फैनोब्रा-गथ, नोंसोर सोरखौ मोन्नो ?

**रमन :** दडब्रा-आंजों खाबजानाय खथ 'बाइसेत्रा सिख्लाफोर दड । लाख 'नोंसो हानाय नड आडे । जोंहानि गेटआव बेन्दपार्टि दामनाय खोनाब्लानो दानो होंगो दोंगो साफिफैगोन खथ सिख्लाफोर । आंनो सुइफ्ट दिजाइरखौल' थाबैनो बायनानै होदो ।

## रुगुं गोबोरलानाय संसार

दोमैलु : सोर खानि-खुजियालाइ नौनाव खारसन फैनोसै ?

रमन : बे संसाराव आं बायदिया आंल' नडथ, आरो सेंग्राफ्राल' आं बायदि जायाखैब्रा, गोबां सिख्लाफोर दड- आं बायदि बिमा-बिफाफोरनि बोर मोन्नायफ्रा। नौंसोरलाय मा मिथिनोसै।

बांबुला : लेखाफराबो सोलौंआखिसै आखल-गियानबो दानानै लारोडखिसै।

दोमैलु : सोरांस्लाब मोनै खालि दाबिनाय, आरो दाबिनाय। जौं गैयाब्लादि मा जागोनथाय ?

रमन : संसार जानो लेखारौंलाय नाडथ। बिब्दिब्ला गोदोनि दिन्निफ्रालाय मा बौरैथो संसार खुंबोनाय ?

दोमैलु : गोदोनिया आलादा, दानिया जुदा। गोदोनिया दानिजौं मिलिया, मिलिथारलिया।

रमन : गोदोनिजौं दानिजौं मानो गोरोबा जानोब्रा बिब्दिब्लाया नौंसोर बायदि जागोन आरो।

गायलां : नौं थिगखौनो हमदों आबौ।

बांबुला : जौंफोरबायदि मालाय माबौरै जानो हाबावनो सै नौंलाय ?

रमन : जेबो जालायनांलियालै, आं जेबो जानांगौनि गोनांथिबो गैयालिया।

दोमैलु : जेबो जानांलियाब्लालाय नौंनि संसारखौ लाय सोरथो नायनांगौ जाखोनो ?

बांबुला : नौंखौ सोर जाहोगोन, नौंनि नखरखौ सोर खांगोन ?

रमन : आं हारसिआवलाय माथो सिन्थाब्रा।

दोमैलु : हारसिआसो बांसिन जानांगौ मानोना बिहा उन-सिगां रावबो गैया।

रमन : बेनिखायनोथ' आं Problem free ब्रा, उनसिगां गैयाखायनोनथ' आंहा जेबो हेंगाम गैया। No Problem, I am free.

बांबुला : फाग्ला जाबाय गोनलै बे मानसिया।

रमन : फाग्ला जायाखैलै आफा, आं आंनि गोजोन इयुन खौसो नौंनो खिन्थादों। आं Problem free, माने नौंसोर खामायनाय जथ सम्पति नौंसोर थैलां-नायनि उनाव आंनि सिफियावनो हाबफै जोबखागोन नालाय।

दोमैलु : लाजिरोड, मालाय खामायनायखौ खुगा हां-हां सिनानै जमनानै थाग्रा। सिथोर-बाथोरनो।



## रुगुं गोबोरलानाय संसार

**रमन :** आंनो खामायाखैथाय, सोरनोथो खामायदों नोंसोरलाय ? दिने-राति,  
आगदा आगसि खामायनाय सम्पतिखौ सोरनोथो होलांगोन नोंसोर ?

**बांबुला :** लेखा-फरा गैयै नोंसोर बायदियालाय बौरै सामलायनो रोंनोब्रा ?

**रमन :** थाखा-फैसा सामलायनो लेखा फरा नांलायगौ नडलै आयै-खालि  
मोनसेल 'नांगौ बेनो जादों निसा, निसा सोबनांगौ आरो बुद्धि बाहायनांगौ ।  
दानि जुगाव सोर लेखा-फरा गोरोंफोरनियाव थाखो थाखो न' दड; सोरनियाव  
दामि-दामि गारि दड आरो सोर ले खा गोरोंफोरनि बिसि-फिसाफोरा  
जाबखो जाबखो स'ना गान्दों थोब्रा ? नांथारगौया जादों सोलो आरो दम  
होनो हानाय सक्ति ।

**गायलां :** बिनि आखला बहानिफ्रायबा बेरबोनानै रजफैनाय नड, बेयोथ' नोंसोर  
फोनाय बेगरनिफ्रायनो रज 'नाय बिफां फुलि । बे फुलिया रोमोलांदोंब्लाबो  
बेनि गुदिया नोंसोरनो बांबुला । नोंसोर जैरै जाजानो लुबैदोंमोन, बिब्दिनो  
जादों ।

**रमन :** हा आफा नोंनो नायदोब्रा, नों बि.ए. पास जाबाय- मास्टर साखि मावबाय  
बेखौ गारबाय-मन्थ्रि-इ.एम. फोरनि थाम्फै होफाग्रा जाबाय-दिनै सम्पतिनि  
बिगोमा जाबाय । नोंलाय मानोथो लेखा फरायनायनि बेसेनखौ गारबोखो ?

**दोमैलु :** नोमफाया बिब्दि मावआब्लानोथ' हावरियासो जालांगौमोन नों ।

**बांबुला :** लेखा रोंनायखायसो जों सुजुग मोन्दोंब्रा ।

**रमन :** नों एसे लेखा रोंगौमोनब्लाबो नोंनो टाका दौग्राफोरा फुद्दा रोंखाथाराब्रा  
आफा ।

**दोमैलु :** जों बाइजोआव थांनो नागिरदों- खर 'याव एम्फौनि बासालानानै नयाव  
बे बादि दिगदार दाहोफै नों-बैजात ।

**रमन :** सानफ्रोमबो बिलिडव नोंसोरो बहाबा नड बहाबा पार्टि खालामलाय-  
नायखौ आं मिथिजोबगौब्रा आयै- । जौनि गात्रि एम्फौआ बांद्राय-  
जायोब्ला नोंसोरो गावगावनि नखर, फिसा-फिसौ बावलानायखौबो  
आं मिथिगौ । आइ न इभेरिटि इन दिटेइल ।

( रागाजों बिमाबो बिफा सिडव हाबलादों )

## रुगुं गोबोरलानाय संसार

गायलां : नंगौ आबौ रमन, नों थिग थारखौनो हमदों । न निफ्राय ओंखारलानाय समाव गोगो आरो ख्लां-ख्लां गोसोयै-ओंखारलाडे हाबफै फिन्नाय समाव थैहाबनाय सोलेर लानानै हाबफैफिनो । ओंखारलानाय समाव पुर्निमानि सानथाम सिगांनि गावदां अखाफोर जानानै ओंखार लाडे, नाथाय हाबफै फिन्नाय समाव अमाबैसानि साननै सिगांनि जहाबनाय अखाफोरनि महर लानानै नयाव हाबफैयो ।

रमन : आबौलै-आंखौ हाबा होदोना ।

गामलां : सोरजों हाबा होनांगौ फिसौ ?

रमन : आंहा गोसो थोखानाय सानै दड; आंखौ गोसो थोग्रा साथाम दड। आं जायखौ गोसो थोयो-बिसोरखौ आरो गुबुनफोराबो गोसो थोबावयो । आंखौ जाय गोसो थोयो- बिसोरखौ रावबो नायफिनथारालायो ।

गाइलां : खाफाललै आबौ सना, खाफाल, नोंखौदि साथाम गाहाम सिख्लाफोर गोसो थोयो ।

(बे समावनो बिमा-बिफा सानैबो रुमाव हाबबो फिनो । गायलां आरो रमन मोनखौ नायख्लेनानै ओंखार लाडे । रमना राव होब्ला बिसोरो थाथफिनो ।)

रमन : हारे सिबिनां आइ-आफामोन-जोंखौ नायख्ले-नायख्ले हरना गुना बहा थांनो नागिरदों नोंसोरलाय ?

दोमैलु : जों जेरावखि थाड मानो नोंनोलाइ, मानो ?

बांबुला : नयाव थाबायथा, जों थाबैनो फैफिनगोन ।

रमन : सान हाबनायनि उनाव गंसे नयाव बिमा महरनि आइजो थायाब्ला न नि भाइनावा बोराबो होन्नायखौ मिथिगौना मिथिया नोंसोरलाय ?

दोमैलु : राबननि खुगायाव आदर्शनि राव, बे बेसेबां फोथायथाव जाखो ?

रमन : गुस्लायनाय राबन-बालमिकिनि सोरजिलु मेलेमजों रामायण जोनोम जानाय नोंसोर मिथियाखैना आयै ?

बांबुला : आं थांग्रोनोसै, आंहा सारमोनहा नेगासि दंथारो ।

रमन : आफा, बाइजोयाव नेदों बाइजोनि सोरबा सुबुड, नयाव नेगासिनो दड-

## रुगुं गोबोरलांनाय संसार

न 'नि माइनावा !

**दोमैलु :** जों नयाव थाबाय थायो मोनब्ला बे नख 'राव माइनावानो साफिनाय नडामोन-मिथिगौ नों ।

**रमन :** सान हर नोंसोर खामायनाय खायनोन्था आं जेबो खामायनो गोसो जायाखैलै आइ आरो आफा ।

**बांबुला :** (रागा) मुख्र साला, जलंगायाव जेबो गैजारोड गुबुननो माइ माइरं जासिदों जेबो लेखा-फरा गौजारोड-आदर्शनि गुण गायदों ।

**रमन :** गुण गायनाय नडालै आफा, नोंसोर बुजियाखै । थुनलाइन रावखौ बुजिसनो हायाब्ला-आं थोंजोडै-बुनोसै, नोंसोर बानानै लाबोनाय माइनावखौ नेनो सासे नेग्रानि गोनां जानानै फैबाय ।

**दोमैलु :** नोंलाय माथो नेनो ? नों बहाथो थैदों ?

**रमन :** हौवा मानसिजों माइनाव साफियालै आयै । माइनावा गाव हिन्जावखाय बियो हिन्जावफोरजोंसो सथबो । आरसा नोंसोर थांदोल थां, माइनाव बेंग्रा आंनि लोगोखौल' थाबैनो लानानै होफैदो न 'याव, आं दंसै बाइह्रा-याव नोंसोर बहा मा खालामहैयो खालामहैबाय थादो ।

(बे समावनो सानै सेंग्राया रुम्बांखौ हमथा-हमथा न 'याव लानानै फैयो । बिमा बिफा, बिबौ आरो बिदा मोनहा नायगोमोयो । रुम्बांनि गान्नाया हान्थुनि गोजौयाव दावखोनाय हाफ पेन्ट आरो स्पर्टिं गेन्जि । खानाया जाइलि-लि मेगना खाजल फुनफबनाय गुस्टियाबो गोजा गाबनि लिप्सटिक गाननाय आसिगुरफोरा गोथां गाब फुन्नाय । आधिडव गोसोम पावार जुता । खर 'याव गोसोम ससमा थुखोनानै लादों ।- बुल्लिया दान्दिसे सिरि, निजोम गोग्लैयो । सेंग्राफोरा रुम्बांखौ सफायाव ओलैस्रो जिराय होयो । रुम्बाड मिज्लिउ मिज्लिउ नायो)

**रुम्बां :** हारे, माइ दस्त, आंखौ बहा लानानै फैखो नोंसोरलाय ? नोंसोर थानोमोना, हर थालांनांगौ । आयै बिसोरखौ हर लाखि । आं हले एसे जौ फेबायलै मादार एन्ड फादार । द'न्ट माइन्ड दे । (बे समावनो गोबायो । सेंग्रा सानैया थांहा फैहां जाबाय थायो । दोमैलुया फिसाजोखौ खानायाव

## रुगुं गोबोरलांनाय संसार

हमना नै खेबनै सोबयो ।)

**दोमैलु :** जॉनि मान सन्मान जानो नागिरदो नों फाफि ? कलेज फरायनायखौ गारनानै बिब्दिसो सोलोंदों नों । बे बायदि पापनि हाबा मावनोसो सानप्रोमबो रां बियो नोडे ? बिफा डाक्टर लिंगरदो । (बांबुलाया मबाइलजों डाक्टर लिंगरो ।)

**रमन :** बेनोब्रा आयै आरो आफा, नोंसोर ख-ख-खांबोनाय नोंसोरनि इयुनि अन्जाली सना माइनाव रुम्बांआ । आं जौफोर लोडेब्लाबो बेबायदि बेहुस जालायनाय लोडदे-मिथिबाय । आंनिया सिन्था खारहोनो थाखाय-लसो लोंनाय । थौ आबौ-जोंहा बहाबा ओंखारलानोसै । दिस्टाब सोलै बे जायगाया ।

**बांबुला :** (सानै सेंग्राखौ) बहा मोनबोखो नोंसोरो बिखौ ? आरो बियो मानो बे बायदि जाबोखो ?

**1थि सेंग्रा :** बै गौरां पार्कनि रेस्टुरान्टावमोन । फिसा पार्टि दडमोन, बेनिनो एसे एरेन्जमेन्ट दडमोननालाय आदै-जों एसे पुर्ति खालामलायदोंमोन ।

**2थि सेग्रा :-**जों एखे फरायजाबलायनाय लोगोनालाय ।

**दोमैलु :** नोंसोर आंनि फिसानो जौ दौदों ।

**1थि सेंग्रा :** जोंथ' जों दौयाखै, जों बादा होग्रासो ।

**2थि सेंग्रा :** जोंथ' जौखौनो लोंखाया । जों बादा होग्रासो । गावसोरनो बांद्राय बांद्राय लोंनो नागिरथारो ।

**रमन :** नोंसोर जौ लोंग्रा, निसा जाफाग्रा नडब्ला माबोरैथो लोगो जाखो ? गोबालायनानै न'याव दोनबोग्रा दस्ट जाखो ?

**दोमैलु :** नोंसोरो थगायदों नोंसोरो दिनै लाफा गाबोन लाफा आंनि फिसानो जौ आरो निसा दौबोदों । नडब्ला आंनि फिसाया बिब्दि जाथारनो नाडमोन ।

**बांबुला :** (फिसाजोखौ दांनानै) रुम्बां आइ, नों जौ लोदों ना ? नोंनि खाफालाव मानि थै ?

**रुम्बां :** जौखौथ' लोंनो होन्नानैनो दिहुनखादों, बेखौथ' स्व'केसाव साजाइनानै दोन्थ' दिहुनाखौ ।

## रुगुं गोबोरलानाय संसार

दोमैलु : रुम्बां, बुं- नों गुबुन निसाबो जादों ? (जिरायफायो) ।

रुम्बां : एफा-एफा निसा जानानै सानबोलावरिनि मोदोमफु मुलुगाव दान्दिफा  
गोजोमनांगौ आइ । आं औरैनो निसा जाया, बेनि थाखायसो एखनब्ला-  
एखनब्ला एसे एसे ।

रमन : यै सेंग्रा फान्टाव गेल्लाफोर, आंनि सौनायनि फिन्नायखौ मानो दोनखोमाखो ?  
आरो बुं रुम्बांनि खाफालाव मानि थैसाम ?

1थि सेंग्रा : दिनै जों लोडखैलै आदा ।

2थि सेंग्रा : बिसोरो बुलायलायदों ।

रमन : सोरजों ?

2थि सेंग्रा : बिबारि होन्नाय सासे सिख्लाजों ।

रमन : मानो ?

1थि सेंग्रा : मानोना बिसोर सासे सेंग्राखौनो गोसो थोयो । औरैनोथ' सेंग्रायाबो  
रुम्बांखौनो गोसो थोयो । बे बुलायलायनायावनो गोग्लैलानानै इन्जुराव  
सौदाव हैदों ।

रमन : आं बुजिनो बाखि गैलिया, नोंसोर थांदो थां । नाव इउ मे ग ।  
(सेंग्रा सानैया ओंखारलाडे)

रुम्बां : मेरी प्यारी दष्टों, प्लिच दन्ट ग । प्लिच बि हेयार उइट मि ।

बांबुला : (अन्नाय गारांजों) रुम्बां आइ, नों मानो गावखौनो आवसारि खालामदों  
आइ ?

दोमैलु : नों जोंनि आसा-मिजिंखौ नेवसिगारनो नागिरदों ना आइ ? जोंनि  
अन्नायखौ हांगारफुन्नो नागिरदों ? नोंदाया सिलिंबाय सिलिंबाय, नोंबो  
सिलिंलाडेब्ला जोंनि इयुना मा जाबावनांगौ आइ ?

रमन : (रागाजों) आं सिलिडखैलै आयै । आं मेट्रिक पाच, कलेज फरायनानै  
फैनाय । चार्टिफिकेटल 'सो गैया नडदा आंनाव । आंखौ बेबादि मुखा दा  
गानहो, आं रागा जोडे ।

गायलां : रमन आबौ, नों नाय आंबो दड ।

रुम्बां : गोरलै समाव बिमा-बिफानि अन्नायजों सोलिबाय, देरनानैबो सोलिबावनांगौ

## रुगुं गोबोरलांनाय संसार

नामा ? दानि जुगा नोंसोरनि गोदोनि जुगजों खथ गोबां सोलायबोबाय । दानि जुगा बिराट एडभान्स जाबायथ' । न' सिडव एरसोनानै थानायनि दिन नड । लेखाखौ न' सिडवल' एरसोनानै फराया । दानि जुगाव लेखाया जेरावबो दंसै । रेष्ट्राण्ट, बार, बेफोरो लोंनाय जानाय, रंजानायनिल थावनि नडथ', बेफोरावबो लेखा फराय जासै, बेफोरावबो गोबां गियान आरजिनो हासै । लेखानिफ्रायल' मोन्नाय गियाना जोख्लोब गियान-बेखौ इंराजिया बुंदों, Closed Education, नाथाय बैफोर जायगायाव मोन्नाय गियानफोरा जादों Open Education, Forward Education बेखौ Modern Education होन्नानैबो बुंदों । (लासै-लासै बुंनानै-उदै सादों होन्नानै खेंखायो । बे समावनो डाक्टर सौंफैयो ।)

**डाक्टर :** मा जादों ? सोर लोमजादों ?

**बांबुला :** नै फिसाजो एसे असुख जादों ।

**दोमैलु :** सार, नायनाय फिसाजोया मानोबा उदैबो सादों होन्दों ।

**डाक्टर :** ( गावनि नायग्राजों नायो, मेगन, सालायफोरखौबो नायो, प्रेसारबो नायो ।)

**दोमैलु :** मा जादों सार ? निसाखौ बांद्राय लोंदों मोन नामा ?

**रुम्बां :** आंहा जेबो जायाखौ डाक्टर बाबु नों थांफिन्नो हासिगौ नोंनि सेम्बाराव । जानो हागौ गात्रि आरो गिदिर बेमार जानाय मानसिफ्रा नोंखौ नेगासिनो दड । बेवहाय आंहा जेबो जायाखै । जायखौ नों जादों सान्दों-बेयो जानो हागौ नोंनि रिदिसनि गोरोन्थि ।

**रमन :** अफ्रिनि एमफौया खरयाव दावखोबाय नालाय बोरेथो सिरि थाबावनो हानो बिलाइ ।

**रुम्बां :** आं नोंसोर बायदि अफ्रि जाग्रा नड दे होमब्लाबो ।

**बांबुला :** देनाय डाक्टर बाबु-मा जादों मुलिनि नाम लिरलांदों ।

**डाक्टर :** जानायाथ' जेबो जायाखै ।

**दोमैलु :** जेबो जायाखैब्ला माथो जादों ? खर'यावबो दुखु मोन्दों, माबा उदैबो सादोंनो, बिब्दिथ' उदै सानाय खिन्था फेराखैमोन ।

## रुगुं गोबोरलांनाय संसार

**डाक्टर :** जानायाथ' बिब्दि जेबो दुखु मोनाखै। आंहा एसे सन्देह जाबाय-  
बडइगावआव अनिता दासनाव खेबसे लांनानै देखायहैब्ला रोखा जागोन ।

**दोमैलु :** अनिता दासनियाव लांलाय नांलाय मा जादों ?

**डाक्टर :** आं बुंनायखौ नोंसोर फोथायनाय नड, नोंसोर हजों लादों थां ।

(बे समाव रुम्बांआ उदै सानाया बारा जानायजों खेंखाइबाय थायो ।)

**बांबुला :** मा जादों डाक्टर, मा प्रब्लेम मोन्दों ?

**डाक्टर :** आं मा होन्नानै बुंनो- समाजाव गनाय जाथाव नडैमोनसे बेराम जाबाय  
जानो हांगौ बिहा । आं थांनोसै जेंनाया एसे बेले बेजेयाव दड-लांनानै  
देखाय हैदो ।

**दोमैलु :** जेबो मुलि लिरनानै होलांला नामा सार ?

**डाक्टर :** दा आं मुलि होनांगौ बायदि बिहा जेबो बेमार जायाखै ।

**दोमैलु :** माथो जादों ? उदैदि सादों । गेसफोर जादोंखोमा ।

**डाक्टर :** फिसाजोयाथ रावजोंबो हाबा जाथवाखैमोन नंदां ?

**दोमैलु :** जायाखैमोन, माथो जादों ?

**डाक्टर :** नोंसोर ब्रा-ब्रा सोंथारोब्ला आं खिन्थानोसै फिसाजोया दानथामनि बिमा  
जाखोमानानै दड, आंनि मोन्नाय बादियै बे दा आं थांनोसै । नोंसोर मा  
सिकित्सा खालामो खालामदो । (ओंखारलाडे । बयबो गोमोयो आरो  
दुखु जायो, रुम्बाड उदै सानानै गाबखेनोबाय थायो ।)

**दोमैलु :** बे मा माखो आइ रुम्बां, डाक्टरा जोंनो मा खिन्थालांखो ? सोरजों नों  
बिब्दि जाबोखो ?

**रुम्बां :** बियो डाक्टर नड आयै, बियो अजासे, बियो दाइनासो । आंनि देहायाव  
बिब्दि जेबो जायाखै ।

**दोमैलु :** मानो गावनि इयुन, बिमा-बिफानि मान-सन्मान सेव हांगार खालामलां-  
जोबखो रुम्बां आइ ? नोंनि इयुनखौ नों मानो खोमसि खालामनानै  
लाखो ? दा मा जाबावनांगौ (फिसाजोखौ बुज्राव-बुज्राव गावो) ।

**रुम्बां :** आंखौ बिब्दि होन्नानै दल दादाम नोंसोर । सोर भा मोन्दों मोनबाय था,  
सोर मा सान्दों सानबाय था- सोर लाजियो लाजिबाय था, आंहा जेबो

## रुगुं गोबोरलांनाय संसार

फाजाया । सोरजों मा जानायमोन आंहा बेफोरखौ गोसोयाव गैया, गोसोयाव लानांगौ होन्नानैबो आं सानाखै ।

**बांबुला :** हाइ, मा सान्दोंमोन मा जाखो, मा मिजिंधिदोंमोन मा सौफैखो ? जाय गथ सानैनि थाखाय मास्टार साखि गारलायनानै लामा गिदिं-गिदिं रां खामाय-बाय जों, गासैबो फैमाल । फिसाफोरनि इयुननि थाखायबो हरखि सान रां खामायनो खामानि मावबायजों- फेलें, गेसावसो जाबोबाय । इयुननि धोन-दौलत फिसा सानैयानो जोंखौ सोगाबबाय, गोबोनि सना फिथर आमय थख्ल फोरानो सेवलांजोब्बाय-जों खामायनाय हा-हु, धोन-दौलत फोरखौ जोंनो मानोथोबाव ? (बिमा बिफा सानैबो गाबो) । जों बहा गन्थं दोनखोमा बावनो बिमा ? जोंखौ बयबो निन्दा होसिगोन- बयबो मिनिसिगोन ।

**दोमैलु :** दाबोथ' रावबो मिथियाखै-डाक्टरलसो मिथिदों-डाक्टरनियाव लांनानै सुगार हैजागोन बे- गाबोन्नो थुदो ।

**बांबुला :** बेखौनो खालामनांसिगोन ।

**गायलां :** एन्जर गोथैनि मोनायनाया जेरावबो गोसारो बांबुला आरो आफि । बेनि गाज्जि मोनामनायखौ जों दोनखोमानो हानाय नड । जाय फिसाफोरखौ नोंसोरो अमृत फिथाइ सान्नानै ख-ख-खांबोदोंमोन- आगसि आग्दा रां हरन्दोंमोन-बै फिसाफोर दिनै दावखा खामपलाय फिथाय जानानैल' थायाखै, बिसोरनिफ्राय मोनसे गाज्जि गेसबो ओंखारबाय-जायखौ लामानि मानसिफोरा गन्थं हमथे-हमथे थाबायलांनांगासिनो दड ।

इयुनखौ दानोब्ला नागारलायनानै इनायै रां खामायखौ खामायनो आं बुंबोबाय थानायखौ नोंसोरो आंखौ गाज्जि मोन्दोंमोन । आं मिथिगौ-नोंसोर जाय राहाजों रां खामायदों, धोन-दौलत दादों-बेफोराव पापनि एसे नड एसे बाहागो फैफाथारो । फैफानाय बे पापनि बाहागोयानो गुबुन फोरखौ फेसेवजोबनानै होयो । दिनै नोंसोरनि जिउयाव जाखैफोट नुजा-फैबाय-बे खैफोटजों मोगा-मोगि जानानैनो नोंसोर खामायनाय रां-रुपाया खंखला जालांगोन ।



## रुगु गोबोरलानाय संसार

**बांबुला :** नंगौ आफा, नों थिगखौनो बुंबोदोंमोन, आंनि मेगना दिनैसो गेवबाय ।  
फिसफोरखौ अन्नायजों आनज्ले त जानाय मेगना दिनैसो रोखा-रोखा नुनो  
मोनबाय अन्नायनि गेजेरजों आं फिसाफोरखौ दानो सान्दोंमोन, आंखाल  
होन्नायखौ आं बिसोरनो मोन्दां होयाबालानो बिसोरनि जिउखौ दालांनो  
सान्दोंमोन ।

**गायलां :** “ जिउआ गलाब बिबारनि एम नड्ड’ होन्नाय बाश्चाखौ नों फरायसाफोरनो  
फोरोडे, नाथाय गावनि गथ ‘नो फोरोंनो बावयो ।

**बांबुला :** नंगौ आफा, दाव-दाव खांबोनाय, मोझोम जोसि जोसि मोज्जाय अरसि-  
अरसि, अखाडव दोनहां, हायाव दोनहां फिसा खांबोनायनि साजाखौ  
आं दिनै मोनबाय । दिनै आं बुजिबाय जिउआ Theory नि नड्ड, बेयो  
जादों Practical निसो; आं बुनो गोसो जाबाय Practical आसो  
सासे मानसिखौ आबुं महरै दानो हायो ।

**गायलां :** आंनि 70 बोसोरनि गोलाव समाव आं गोबां मानसि लोगो मोनबोबाय,  
गोबां बायदि जाथायफोर नुबोबाय आरो बायदिसिना सोलायनायबो  
नुबोबाय । आं नुबोनाय गोदोनि मानसिफोरा नोंसोरबायदि धोन-दौलत  
गोनां मोनब्लाबो नाथाय नोंसोरबादि आखल-गियान गोमाजानाय दुथां  
नड्डमोन । बिसोरो नोंसारबायदि हरसेनि गेजेरावनो धोनि जानाय नड्डमोन  
खायनो जानो हागौ बिसोरो धोनि जानायनि गुणखौ बुजिनो हादोंमोन ।  
नोंसोर दानि धोनिफोरनि उल्टायै बिसोरो धोन-दौलतजों साफा-साफा  
गुनि-गियानी, मानिजाथाव जानो हादोंमोन ।


आं नुबाय दिनैनि धोना आइ लक्षीनिफ्राय फैनाय नड्ड नंदां ।  
जानो हागौ सोरबा फान्दायसुलानि आखायनिफ्रायसो फैनाय । बेनिखायनो  
दिनैनि नोंसोर बायदि धोनिफोरजों आखल-गियाना साफिफानाँ थायाखै ।

दिनै नोंसोर बुं-हरसेनि गेजेराव खामायनाय धोनजों लोक्षि  
थाफाया, थाफायो-दुथां-फान्दायसुला राइक्षसीसो; गोरलैयै खामायनाय  
धोना गलांफिन्नो बायसेत्रा गब्लं दड्ड । नोंनि नखरनि रुगु गोबोर लानायनि  
दाइनिगिरिफोरा नोंसोर सानैयानो ।

## रुगुं गोबोरलानाय संसार

**बांबुला** : आफा, बेफोर बाश्राखौ बुंनानै आंखौ आरो लाजि दाफोनांसै । नंगौ, आं हरसेनि गेजेराव धोन खामायनो नागिरनानै फिसा सानैनि आखल-आखुखौ नोजोर होनोनो सम मोनाखिसै । आं दासो बुजिनो हाबाय-फिसा-फिसौफोरखौ आखल गियान फोरोंनायासो जोरसुमा धोन सोरिजनाय, नडब्ला हा-हु, सना-रुपा-न'-बांफोरनि धोना हां खुनसेनि थाखायल' सोरिजनाय धोन । हाय भगवान-बे गियानखौ दिनैसो मानो हरखो नों आंनो ? बोसोरनैसोनि सिगां मानो हरै नों ? (बांबुला आरो दोमैलु मोनहा गाबो) ।

( फैसाली गोग्लैयो )



CONFIDENTIAL

The following information is being furnished to you for your information only. It is not intended to be used for any other purpose. The information is being furnished to you on a confidential basis and should be treated as such. It is not to be disseminated to any other person without the express written consent of the person or persons to whom it was originally furnished. If you have any questions regarding this information, please contact the person or persons to whom it was originally furnished.

(continued)



लिरगिरिनि सिनायथि : (01-03-1971)

(1) जोनोम, खुलि आरो फरायनाय:

लिरगिरि :- आदाराम बसुमतारी, बिफानि मुं :- हँला बसुमतारी।

बिमानि मुं :- तिलेश्वरी बसुमतारी। जोनोम गामि :- गालापारा।

ला: सो: - बर' बाजार। जिल्ला :- सिरां।

आथिखालनि खुलि :- बड' फा नोगोर (कद' मतला), प्रफेसार कल' नी, तितागुरि, कक्राझार। फरायसा सम :- गुदि फरायसाली- 347 नं गालापारा गुदि

फरायसाली। मेट्रिक :- सेथि थाखो (बर' बाजार गोजौसिन फरायसाली, 1987)। H.S. नैथि थाखो- (बर' बाजार गोजौसिन फरायसाली, 1991) बि.ए. :- इंराजी मेज'र (बिजनी कलेज 1994)।

एम. ए. :- इंराजी (1996), बर (1998), गुवाहाटी मुलुग सोल्लोसालि।

पि. एडच. डि. - (2011) गुवाहाटी मुलुग सोल्लोसालि।

(2) साखि मावनाय :-

इंराजीनि एम. ए. आनजात होखांनानौनो रिजाल्टनि सिगांनो बडाइगाव कलेजाव बर' आयदानि टिउट'र हिसाबै 1997 इं माइथायाव दानथाम फोरोंगिरिनि हाबामावयो। बे बोसोरनिनो सेप्टेम्बर दान्निफ्राय जनता कलेजाव बर' आयदानि फोरोंगिरिनि हाबा मावबो गासिनो दड। बेनि गेजेरावनो 1998-99 इं माइथायाव कक्राझार गार्लस कलेज आरो गु:मु:सो: नि कक्राझार बादायाव पार्ट टाइम फोरोंगिरिनि हाबा मावबोदों। 1999 इं नि 22 एप्रिलनिफ्राय बर' बाजार गोजौसिन फरायसालियाव इंराजीनि आयदा फोरोंगिरि हिसाबै 18 दान साखि मावयो आरो आथिखालाव जनता फरायसालिमानिनो सासे फोरोंगिरि।

(3) थुनलाइ सोरजिनाय :- फरायसा समनिफ्रायनो लिरनो सोल्लोबोनाय लिरगिरिया दिनैसिम बिजाब महरै साफायनानै दिहुनबौनाय बिजाबफोरा जादों:

(1) 'गोजोन संसार नागिरनानै' (2005) खौरां गासे फावथायनि जथायनाय।

(2) 'सावरायनाय थुनलाइ' खोन्दो से (2007) थुनलाइयारि सावरायनाय।

(3) 'हुखोमोर जाय सिन्दुरनि दाहा' (2008) खौरां गासे फावथाइनि जथायनाय।

(4) 'सावरायनाय थुनलाइ', खोन्दो नै, (2009) थुनलाइयारि सावरायनाय।

(5) 'लैथोमानि हाब्थियारिफोर' (Riders to the Sea, 2007) राव दानस्लायनाय, खौरां गासे फावथाइ।

(6) 'जि.एल. एक्सप्रेस' (2010) सुंद सल'नि जथाइनाय।

(7) मोनफिन्नाय जिउनि रुगुं (2011) (खौरां गाथाम फावथाइ)।

(8) एक्सिदेन्ट (2012) खौरां गासे फावथाइनि जथायनाय।

मख'नो गोनांदि 'गोजोन संसार नागिरनानै' बिजाबा कक्राझार जिल्ला

बर' थुनलाइ आफादनिफ्राय 2007 इं माइथायाव 'बिन'द ब्रह्म

थुनलाइयारि बान्था' आरो 'हुखोमोर जानाय सिन्दुरनि दाहा'

या 2009 इं माइथायनि बिजनी जिल्ला थुनलाइ आफादनिफ्राय

'सावसिन बिजाब' नि बान्था मोनखाबाय।



अनशुमै लाईब्रेरी, आर. एन. बि. र'ड, क'कराझार ।